

佛說觀佛三昧海經

佛陀跋陀羅譯



佛說觀佛三昧海經

東晉天竺三藏佛陀跋陀羅譯

①	六譬品	3
②	序觀地品	14
③	觀相品	26
④	觀佛心品	138
⑤	觀四無量心品	170
⑥	觀四威儀品	177
⑦	觀馬王藏品	228
⑧	本行品	255

⑨	觀像品	271
⑩	念七佛品	288
⑪	念十方佛品	293
⑫	觀佛密行品	301

南無本師釋迦牟尼佛

自歸於佛 當願眾生 紹隆佛種 發無上意

自歸於法 當願眾生 深入經藏 智慧如海

自歸於僧 當願眾生 統理大眾 一切無礙

佛說觀佛三昧海經

① 六譬品

如是我聞：一時，佛住迦毘羅城尼拘樓陀精舍。

爾時，釋摩男請佛及僧供養三月，七月十五日僧自恣竟。

爾時，父王閱頭檀，佛姨母憍曇彌，來詣僧房供養眾僧。禮拜既畢，奉上楊枝及澡豆已，呼阿難言：吾今欲往至世尊所，為可爾不？

爾時，阿難即宣此言以白世尊。

佛告阿難：父王來者，必問妙法。汝行遍告諸比丘僧，及往林中；命摩訶迦葉、舍利弗、目犍連、迦梅延、阿那律等，彌勒菩薩、跋陀婆羅十六賢士，一時來會。

如此音聲，遍至諸方。

爾時，天主、夜叉主、乾闥婆主、阿修羅主、迦樓羅主、緊那羅主、摩睺羅伽主、龍主等，及諸眷屬，皆悉已集。

爾時，父王及釋摩男、三億諸釋入佛精舍。當入之時，見佛精舍如頗梨山，為佛作禮。未舉頭頃，即見佛前有大蓮花，眾寶所成。於蓮花上有大光臺。

父王見已，心生歡喜，歎未曾有，遶佛三匝，却坐一面。

是時，父王即從坐起，白佛言：世尊！佛是吾子，吾是佛父。今我在世，見佛色身，但見其外，不覩其內。悉達在宮，相師皆見三十二相。今者成佛，光明益顯，過踰昔日百千萬倍。佛涅槃後，後世眾生，當云何觀佛身色相，知佛光明常行尺度？惟願，世尊！今當為我及後眾生，分別解說。

爾時，世尊入遍淨色身三昧。從三昧起，即便微笑。諸佛笑法，有五色光。時，五色光，化五百色。從佛口出，照父王頂。從父王頂，照光明臺。從光明臺，照于精舍，遍娑婆世界，還入佛頂。

爾時，世尊告父王言：諦聽！諦聽！善思念之！如來當說「來世眾生得見佛法」。

父王白佛：唯然，世尊！我今願聽。

佛告父王：閻浮提中，有師子王，名毘摩羅。其師子法，滿四十年，牝牡乃會。一交會已，跳踉鳴吼，婉轉自撲，體無損傷。其師子子在胎之時，如父獸王，等無有異。父王！當知：欲使胎中便能鳴吼飛落走伏，未有斯事。

父王白佛：獸王之子，在母胎時，頭目牙爪與父相似？

佛告父王：與父無異。但其力能，不及其父，百千萬倍。

佛告父王：如是。如是，未來世中，諸善男子善女人等，及與一切，若能至心繫念在內，端坐正受觀佛色身。當知：是人，心如佛心，與佛無異。雖在煩惱，不為諸惡之所覆蔽。於未來世，雨大法雨。

復次，父王！譬如伊蘭俱與栴檀，生末利山。牛頭栴檀，生伊蘭叢中，未及長大，在地下時，芽莖枝葉如閻浮提竹筍。眾人不知，言「此山中純是伊蘭，

無有栴檀。」而伊蘭臭，臭若膻屍，薰四十由旬。其花紅色，甚可愛樂。若有食者，發狂而死。牛頭栴檀，雖生此林，未成就故，不能發香。仲秋月滿，卒從地出，成栴檀樹。眾人皆聞牛頭栴檀上妙之香，永無伊蘭臭惡之氣。

佛告父王：念佛之心，亦復如是。以是心故，能得三種菩提之根。

復次，父王！閻浮提中及四天下，有金翅鳥名正音迦樓羅王。於諸鳥中，快得自在。此鳥業報，應食諸龍。於閻浮提，日食一龍王及五百小龍。明日復於弗婆提，食一龍王及五百小龍。第三日復於瞿耶尼，食一龍王及五百小龍。第四日復於鬱單越，食一龍王及五百小龍。周而復始，經八千歲。此鳥爾時死相已現，諸龍吐毒，無由得食。彼鳥飢逼，周憊求食，了不能得。遊巡諸山，永不得安。至金剛山，然後暫住。從金剛山，直下至大水際。從大水際，至風輪

際。為風所吹，還至金剛山。如是七返，然後命終。其命終已，以其毒故，令十寶山同時火起。

爾時，難陀龍王懼燒此山，即大降雨澍如車軸，鳥肉散盡，唯有心在。其心直下，如前七返，然後還住金剛山頂。難陀龍王取此鳥心以為明珠，轉輪王得為如意珠。

佛告父王：諸善男子及善女人，若念佛者，其心亦爾！

復次，大王！雪山有樹名殃伽陀，其果甚大，其核甚小。推其本末，從香山來，以風力故，得至雪山。孟冬盛寒，羅剎、夜叉在山曲中屏隈之處，糞穢不淨，盈流于地，猛風吹雪，以覆其上，漸漸成塹，五十由旬。因糞力故，此果得生，根莖枝葉花實滋茂。春陽三月，八方同時皆悉風起，消融冰雪，唯果樹

在。其果形色，閻浮提果，無以為譬。其形團圓，滿半由旬。婆羅門食，即得仙道五通具足，壽命一劫，不老不死。凡夫食之，向須陀洹。阿那含食，成阿羅漢，三明六通，罔不悉備。有人持種至閻浮提糞壤之地，然後乃生，高一多羅樹，樹名拘律陀，果名多勒，如五斗瓶。閻浮提人有食之者，能除熱病。

佛告大王：善男子及善女人，正念思惟諸佛境界，亦復如是。

復次，大王！如帝釋樹生歡喜園，名波利質多羅。天女見之，身心喜悅，不自勝持。帝釋見之，即生欲想。八萬四千諸姝女等，即得樂覺。此樹生時，曲枝在地，即於地下花敷成果，其果金色，光明赫奕，且其花葉終不萎落，十色具足，開現光明，有諸樂音。至秋八月，從地踊出，高三百四十五萬由旬。諸天見之，喜悅非恆。

佛告大王：觀佛三昧，在煩惱地，亦復如是。其出生時，如彼寶樹，嚴顯可觀。

復次，大王，如劫初時，火起一劫、雨起一劫、風起一劫、地起一劫。

地劫成時，光音諸天，飛行世間，在水澡浴。以澡浴故，四大精氣，即入身中。身觸樂故，精流水中，八風吹去，墮淤泥中，自然成卵。經八千歲，其卵乃開，生一女人。其形青黑，猶如淤泥，有九百九十九頭。頭有千眼，九百九十九口，一口四牙，牙上出火，狀如霹靂。二十四手，手中皆捉一切武器。其身高大，如須彌山，入大海中，拍水自樂。有旋嵐風吹大海水，水精入體，即便懷妊，經八千歲，然後生男。其兒身體，高大四倍，倍勝於母。兒有九頭，頭有千眼，口中出火，有九百九十九手八腳，海中出聲，號毘摩質多羅阿修羅

王。此鬼食法，唯啖淤泥及蕒藕根。

其兒長大，見於諸天，姝女圍遶。即白母言：「人皆伉儷，我何獨無？」

其母告曰：「香山有神名乾闥婆，其神有女，容姿美妙，色踰白玉，身諸毛孔，出妙音聲，甚適我意。今為汝娉，適汝願不？」

阿修羅言：「善哉！善哉！願母往求。」

爾時，其母行詣香山。到香山已，告彼樂神：「我有一子，威力自在，於四天下，而無等倫。汝有令女，可適吾子？」

其女聞已，願樂隨從適阿修羅。

時，阿修羅納彼女已，心意泰然，與女成禮，未久之間，即便懷妊。經八千歲，乃生一女。其女儀容，端正挺特，天上天下，無有其比。色中上色，以自

莊嚴。面上姿媚八萬四千，左邊亦有八萬四千，右邊亦有八萬四千，前亦八萬四千，後亦八萬四千。阿修羅見，以為瑰異，如月處星，甚為奇特。

憍尸迦聞，即遣使下詣阿修羅而求此女。

阿修羅言：汝天福德，汝能令我乘七寶宮。以女妻汝。

帝釋聞此，心生踊躍，即脫寶冠持用擬海。十善報故，令阿修羅坐勝殿上。

時，阿修羅踊躍歡喜，以女妻之。帝釋即以六種寶臺，而往迎之。於宮闕中有大蓮花，自然化生八萬四千諸妙寶女，譬如壯士屈申臂頃，即至帝釋善法堂上。爾時，天宮過踰於前百千萬倍。釋提桓因為其立字號曰悅意。

諸天見之，歎未曾有，視東忘西，視南忘北。三十二輔臣，亦見悅意，身心歡喜，乃至毛髮皆生悅樂。

帝釋若至歡喜園時，共諸綵女入池遊戲。

爾時，悅意即生嫉妬，遣五夜叉往白父王：「今此帝釋，不復見寵，與諸綵女自共遊戲。」

父聞此語，心生瞋恚，即興四兵往攻帝釋。立大海水踞須彌頂，九百九十九手同時俱作，撼喜見城、搖須彌山，四大海水一時波動。

釋提桓因驚怖惶懼，靡知所趣。

時，宮有神白天王言：「莫大驚怖，過去佛說《般若波羅蜜》，王當誦持，鬼兵自碎。」

是時，帝釋坐善法堂，燒眾名香，發大誓願：「《般若波羅蜜》是大明呪、是無上呪、是無等等呪，審實不虛，我持此法，當成佛道。令阿修羅，自然退

散。」

作是語時，於虛空中，有四刀輪，帝釋功德故自然而下。當阿修羅上時，阿修羅耳鼻手足一時盡落，令大海水赤如絳汁。

時，阿修羅即便驚怖，遁走無處，入藕絲孔。彼以貪欲、瞋恚、愚癡鬼幻力故，尚能如是，豈況佛法不可思議！

佛告大王：諸善男子及善女人，繫心思惟諸佛境界，亦能安住諸三昧海，其人功德，不可稱計。譬如諸佛，等無有異。

② 序觀地品

云何名為觀諸佛境界？

諸佛如來出現於世，有二種法以自莊嚴。何等為二？①先說十二部經，令諸

眾生，讀誦通利。如是種種，名為法施。②以妙色身，示閻浮提及十方世界，令諸眾生見佛色身具足莊嚴，三十二相八十種隨形好，無缺減相，心生歡喜。

觀如是相因何而得？皆由前世百千苦行，修諸波羅蜜及助道法，而生此相。

佛告父王：若有眾生，欲念佛者、欲觀佛者、欲見佛者、分別相好者、識佛光明者、知佛身內者、學觀佛心者、學觀佛頂者、學觀佛足下千輻相輪者、欲知佛生時相者、欲知佛納妃時者、欲知佛出家時者、欲知佛苦行時者、欲知佛降魔時者、欲知佛得阿耨多羅三藐三菩提時者、欲知如來轉法輪時相者、欲知如來寶馬藏相者、欲知如來昇忉利天為母摩耶夫人說法時相者、欲知如來下忉利天時相者、欲知如來行住坐臥四威儀中光明相者、欲知如來詣拘尸那降度力士相者、欲知如來伏曠野鬼神毛孔光明相者。

佛告父王：佛涅槃後，若四部眾，及諸天、龍、夜叉等，欲繫念者、欲思惟者、欲行禪者、欲得三昧正受者。

佛告父王：云何名繫念？

自有眾生，樂觀如來具足身相者。

自有眾生，樂觀如來諸相好中一一相好者。

自有眾生，樂觀如來隨順相好者。

自有眾生，樂觀如來逆相好者。

自有眾生，樂觀如來光明者。

自有眾生，樂觀如來行者。

自有眾生，樂觀如來住者。

自有眾生，樂觀如來坐者。
自有眾生，樂觀如來臥者。
自有眾生，樂觀如來乞食者。
自有眾生，樂觀如來初生者。
自有眾生，樂觀如來納妃時者。
自有眾生，樂觀如來出家時者。
自有眾生，樂觀如來苦行時者。
自有眾生，樂觀如來降魔時者。
自有眾生，樂觀如來成佛時者。
自有眾生，樂觀如來轉法輪時者。

自有眾生，樂觀如來昇忉利天為母說法時者。

自有眾生，樂觀如來降伏曠野鬼神者。

自有眾生，樂觀如來於那乾訶羅降伏諸龍留影時者。

自有眾生，樂觀如來在拘尸那城，降伏六師、尼提賤人，及諸惡律儀殷重邪見人者。

如是，父王！我涅槃後，諸眾生等，業行若干、意想若干，所識不同，隨彼眾生心想所見，應當次第教其繫念。如我住世，不須繫念。譬如日出，冥者皆明。唯無目者，而無所覩。

未來世中，諸弟子等應修三法。何等為三？①誦修多羅甚深經典。②淨持禁戒，威儀無犯。③繫念思惟，心不散亂。

云何名繫念？

或有欲繫心觀於佛頂上者， 或有欲繫心觀佛毛髮者，
或有欲繫心觀佛髮際者， 或有欲繫心觀佛額廣平正相者，
或有欲繫心觀佛眉間白毫相者， 或有欲繫心觀佛眉者，
或有欲繫心觀佛牛王眼相者， 或有欲繫心觀佛修直鼻相者，
或有欲繫心觀佛鷹王嘴相者。

自有眾生，樂觀如來髭鬚如蝌蚪形流出光明者。

自有眾生，樂觀如來脣上腭際者。

自有眾生，樂觀如來脣色赤好如頻婆果者。

自有眾生，樂觀如來下脣如鉢頭摩花莖者，其色紅赤上入頻婆果色中者。

自有眾生，樂觀如來口四十齒相者。

自有眾生，樂觀如來齒白齊密相者。

自有眾生，樂觀如來齒上印文相者。

自有眾生，樂觀如來齒畫界者。

自有眾生，樂觀如來上腭相者，八萬四千畫了了分明。

自有眾生，樂觀如來下齶如優曇鉢花莖色者。

自有眾生，樂觀如來咽喉如琉璃筒，狀如累蓮花相者。

自有眾生，樂觀如來廣長舌相蓮花葉形，上色五畫五彩分明，舌下十脈眾光流出，舌相廣長遍覆其面者。

自有眾生，樂觀如來咽喉節中有三相者。

自有眾生，樂觀如來咽膺相如金翅鳥眼者。

自有眾生，樂觀如來頭相者。

自有眾生，樂觀如來八萬四千髮相者。

自有眾生，樂觀如來毛右旋者。

自有眾生，樂觀如來一一毛孔一毛旋生者。

自有眾生，樂觀如來頭皮者。

自有眾生，樂觀如來肉髻骨者。

自有眾生，樂觀如來腦者。

自有眾生，樂觀如來耳普垂睡者。

自有眾生，樂觀如來耳輪郭相者。

自有眾生，樂觀如來耳旋生七毛相者。

自有眾生，樂觀如來缺盆骨滿相，於彼相中旋生光臺者。

自有眾生，樂觀如來腋下滿相，於其相中懸生五珠，如摩尼珠上跂佛腋者。

自有眾生，樂觀如來臂臑纖圓如象王鼻者。

自有眾生，樂觀如來肘骨如龍王髮婉轉相者，文彩不壞，節頭蟠龍不見其迹，手指參差不失其所，於指節端十二輪現。

自有眾生，樂觀如來赤銅爪，其爪八色了了分明。

自有眾生，樂觀如來合縵掌相，張時則見斂指不見，如真珠網了了分明，勝閻浮檀金百千萬倍，其色明達過於眼界，於十指端各生卍字，卍字點間有千輻輪，眾相具足如和合百千蓮花。

自有眾生，樂觀如來掌文間成如自在天宮，其掌平正，人天無類，當於掌中生千輻相，於十方面開摩尼光，於其輪下有十種畫，一一畫如自在天眼，清白分明，然後入掌相中。

自有眾生，樂觀如來手背毛上向靡，如紺琉璃，流出五色光入網縵中者。

自有眾生，樂觀如來手足柔軟如天劫貝。

自有眾生，樂觀如來手內外握者。

自有眾生，樂觀如來胸德卐字印相，三摩尼光相者。

自有眾生，樂觀如來臍如毘楞伽寶珠。

自有眾生，樂觀如來脇肋，大小正等，婉轉相者。

自有眾生，樂觀如來諸骨支節，蟠龍相結其間密緻者。

自有眾生，樂觀如來鈎鑠骨卷舒自在不相妨礙者。

自有眾生，樂觀如來骨色鮮白，頗梨雪山不得為譬，上有紅光間錯成文，凝液如脂者。

自有眾生，樂觀如來伊尼鹿王蹲相者。

自有眾生，樂觀如來踝相者。

自有眾生，樂觀如來足趺平正相者。

自有眾生，樂觀如來足趺上色閻浮檀金色，毛上向靡，足指網間如羅文彩，於其文間眾彩玄黃，不可具名者。

自有眾生，樂觀如來赤銅爪相，於其爪端有五師子口者。

自有眾生，樂觀如來脚指端蚤文相，如毘紐羯磨天所畫之印者。

自有眾生，樂觀如來足下平滿不容一毛，足下千輻輪相，轂輞具足魚鱗相次，金剛杵相者。

足跟亦有梵王頂相，眾蚤不異，如是名樂順觀者。

自有眾生樂逆觀者，從足下千輻輪相，從下觀至足指上，一一相、一一好、一一色，從下至上了了逆觀，是名逆觀法。

自有眾生，樂觀如來金色，佛生閻浮提故，作色中上色，如百千日耀紫金山不可得具見者。

自有眾生，樂觀如來巨身丈六者。

自有眾生，樂觀如來圓光一尋者。

自有眾生，樂觀如來舉身光明者。

自有眾生，樂觀如來說法時瑞應相者。

自有眾生，樂觀如來臍，上向相、下向相者。

③ 觀相品

佛告父王：云何名觀如來頂？

如來頂骨，團圓猶如合蓋，其色正白。若見薄皮，則為紅色。或見厚皮，則金剛色。髮際金色，腦頗梨色。有十四脈，眾畫具足。亦十四光，其光如脈，分明了了。於腦脈中，旋生諸光，上衝頭骨，從頭骨出，乃至髮際，有十四色圍遶眾髮。髮下金色，亦生眾光，入十四色中。是名如來生王宮中頂腦肉髻。

唯其頂上，五大梵相生。

時，摩耶及佛姨母，皆悉不見。其五梵相，開現光明，至於梵世。復過上方

無量世界，化成雲臺。諸佛境界，十地菩薩之所不見。

今為父王說生頂相。若有聞者，應當思惟佛勝頂相。其相光明，如三千界大地微塵，不可具說。後世眾生，若聞是語，思是相者，心無悔恨。如見世尊頂勝相光，閉目得見。以心想力，了了分明，如佛在世。雖觀是相，不得眾多。從一事起，復想一事。想一事已，復想一事。逆順反覆，經十六反。如是心相極令明利，然後住心繫念一處。如是漸漸舉舌向腭，令舌正住，經二七日，然後身心可得安隱。復當繫心，還觀佛頂。觀佛頂法，光隨毛孔入。

佛告父王，及敕阿難：諦聽！諦聽！善思念之！如來今者，頭上有八萬四千毛，皆兩向靡，右旋而生，分齊分明，四抓分明。一一毛孔，旋生五光，入前十四色光中。

昔，我在宮，乳母為我沐頭。

時，大愛道來至我所：「悉達生時多諸奇特。有人若問我：『汝子之髮，為長幾許？』我云何答？今當量髮知其尺度。」

即敕我申髮，母以尺量。長一丈二尺五寸。放已右旋，還成蚤文。

欲納妃時，復更沐頭。

母復敕言：「前者量髮，正長一丈二尺五寸，今當更量。」

即申量之，長一丈三尺五寸。

我出家時，天神捧去，亦長一丈三尺五寸。

今者，父王！欲看髮相不？

父王白言：唯然，世尊！樂見佛髮。

如來即以手申其髮，從尼拘樓陀精舍，至父王宮，如紺琉璃，遶城七匝。

於佛髮中，大眾皆見若干色光，不可具說。是一一光，普照一切，作紺琉璃色。於琉璃色中，有諸化佛，不可稱數。

現是相已，斂髮卷光，右旋婉轉，還住佛頂，即成蚤文。

是名如來真實髮相。

若有比丘，及比丘尼、諸優婆塞、優婆夷等，欲觀佛髮，當作是觀，不得他觀。若他觀者，名為邪觀、名為狂亂、名為失心、名為邪見、名顛倒心。設得定者，無有是處。

如是，父王！佛真髮相，事實如此。

觀髮相已，次觀髮際，如赤真珠色，婉轉下垂。有五千光，間錯分明，皆上

向靡，圍遶諸髮。從頂上出，遶頂五匝，如天畫師所作畫法，團圓正等，細如一絲。於其絲間，生諸化佛。有化菩薩，以為眷屬。諸天八部、一切色象，亦於中現。色如日輪，不可具見。是名觀佛髮際。

如此觀者，名為正觀。若異觀者，名為邪觀。

佛告父王：此名如來髮際實觀。

云何觀如來額廣平正相？額廣平正相中有三相：

一者所謂白毛相。

佛初生時，王與夫人將太子詣阿私陀仙，令相太子。仙人披氎，初見太子眉間白毛旋生，於白毛邊，有諸輪郭，隨白毛旋。相師舒毛，見毛長大，即取尺度，量其長短，足滿五尺，如琉璃筒。放已，右旋如頗梨珠，顯現無量百千色

光。是名菩薩初生時白毫相光。

至年八歲，姨母復觀悉達年大，其眉間毛亦隨年長。今試看之，即舒白毛，見毛正直，如白琉璃筒。於其毛端，出五色光明，還入毛孔。母甚憐念，情無己已，告語諸人：「我子毛相，乃至如此。」諸人見已，如前右旋甚可愛念。是名菩薩童子時白毫毛相。

云何名菩薩納妃時白毫毛相？

耶輸陀羅父自遣相師來相太子。見三十二相，炳然如畫，唯於白毛，其心不了。相師即言：「地天太子！其餘眾相，同金輪王，唯此白毛，流出眾光，非我所明。今欲舒看，為可爾不？」太子告言：「隨汝所欲。」爾時，相師以手申毛，其毛流出如牛王乳，射相師眼，其眼明淨，即於毛中見百千轉輪聖王七

寶千子皆悉具足。相師驚愕白言：「地天太子！我申白毛，欲觀長短。不知何意，如牛王乳來射我眼，為是實見、為是夢見、為是狂亂？今者悉忘。太子相好，一切都盡，唯見百千轉輪聖王七寶千子及四種兵從四面起。我心歡喜，如婆羅門得梵世樂。」語已放毛，右旋婉轉，還復本處。

爾時，相師名牢度跋多，見此事已，五體投地，禮於太子：「太子眾相，不可具見。如我相法，見一相者，王四天下，快得自在。今太子相如摩醯首羅，自在神力，不可記錄，當云何知？」太子告言：「吾不達此，汝自歸家，往白汝王。」

爾時，相師即還本國，以如上事，具向王說。王聞是語，駕乘名象，導從百千，詣迦毘羅城，到淨飯王宮，以水澡太子手，持女上之，因為作禮：「地天

太子！願受我女，可備灑掃。相師所見上妙毛相，我今欲見，為可爾不？」太子告言：「隨意看之。」

爾時，耶輸陀羅父，以手申太子白毛，見其白毛，如頗梨幢，節節相當。於眾節間，見有無量百千梵王、釋提桓因，諸勝天子與宮殿俱，了了而見，如於明鏡自觀面像。見已歡喜，尋復放捨。如前右旋，還住眉間，光明赫奕，四面布散，入輪郭中，不可悉說。是名菩薩納妃時白毫相。

佛告父王：佛涅槃後，四部之眾，其欲觀菩薩為童子時及納妃時白毫相者，當作是觀。如此觀者，是名正觀。若異觀者，是名邪觀。

佛告父王：云何名如來出家時白毫相？

我欲出家時，父王及母遣諸姝女，常以衛護。門施關鍵，開闔有聲，如師子

吼。於窗牖間，密懸諸鈴，金鎖相鉤，龍、鬼、夜叉，無從得入。爾時，四天王於虛空中，遙發聲言：「地天太子！日時已至，宜當學道。我今欲往供養太子，恐殿有聲，無緣得入。」爾時，太子以手申毛，至四天王所，色如天繒，柔軟可愛。時，四天王見，心甚愛敬。以愛敬故，即於毛中，見化菩薩結跏趺坐，形如太子。一一菩薩，復有無量諸大菩薩，共為眷屬。此相現時，無量諸天龍夜叉等，俱時得入。敕語車匿：「汝往後廐鞞捷陟來。」車匿白言：「今此地中，若舉足時，此地振吼如大象聲，云何得往？」爾時，太子復申白毛，令車匿見，猶如蓮花，葉葉相次，其白如雪。車匿見已，心眼即開，於其葉間見化菩薩結跏趺坐，猶如微塵不可稱數。是諸化人，眉間白毛，亦復如是。

爾時，車匿見宮中地如頗梨色，表裏堅實猶如金剛，躡足無聲，疾至後廐，

鞞馬金鞍，牽至殿前。車匿白太子言：「諸天顛顛合掌叉手，住在空中，同聲讚歎出家功德，太子宜時速疾乘馬。」

爾時，太子復舒白毛持擬諸女，令諸侍女，身心悅樂，猶如比丘得第三禪。

爾時，此毛婉轉右旋，還入眉間。

諸天復見太子眉間有百千光，譬如乳河，周流一切。於乳河中，有化菩薩，乘化蓮花，皆共讚歎出家功德。一一化菩薩，眉間乳河流出光明，亦復如是。

佛告父王：是名菩薩出家時白毛相種種瑞應。

若佛滅後，諸四部眾，欲觀如來出家時白毛相者，當作是觀。若異觀者，是名邪觀。

佛告父王：云何名苦行時白毫毛相？

如我踰出宮城已，去伽耶城不遠，詣阿輸陀樹。吉安天子等百千天子皆作是念：「菩薩若於此坐，必須坐具，我今應當獻於天草。」即把天草清淨柔軟，名曰吉祥，菩薩受已，鋪地而坐。是時，諸天諦觀菩薩，身相可愛，復見白毛圍如三寸，右旋婉轉，有百千色，流入諸相。是諸天子觀白毫時，各作是念：「菩薩今者，唯受我草，不受汝草。」時，白毛中，有萬億菩薩結跏趺坐，各取其草，坐此樹下。一一天子，各見白毫中有如此相。是時，吉安天子而讚歎言：「善哉！勝士！修大慈悲。慈悲力故，得大人相。於其相中，無量變現，能滿諸天一切善願，不生諍訟，起菩提心。」

釋梵諸天，見於菩薩坐此樹下，各獻甘露持用供養。菩薩是時，為欲降伏彼六師故，不受彼供。天令左右自生麻米。菩薩不食。諸天皆曰：「此善男子！」

不食多日，氣力憊然，餘命無幾，云何當能成辦菩提？」菩薩是時，入滅意三昧，三昧境界名寂諸根。諸天啼泣，淚下如雨，勸請菩薩「當起飲食」。作是請時，聲遍三千大千世界，菩薩不覺。

有一天子名曰悅意。見地生草，穿菩薩肉，上生至肘，告諸天曰：「奇哉男子！苦行乃爾！不食多時，喚聲不聞，草生不覺。」即以右手申其白毛，其毛端直，正長一丈四尺五寸，如天白寶，中外俱空。天見毛內有百億光，其光微妙，不可具宣。於其光中，現化菩薩，皆修苦行，如此不異。菩薩不小，毛亦不大。諸天見已，歎未曾有。即放白毛，右旋婉轉，與光明俱，還復本處。

爾時，諸天諦觀白毛，目不暫捨。見白毛中，下生五筒，從面門入，流注甘露，滴滴不絕，從舌根上，流入于身，表裏清徹，如琉璃山。百千萬億諸大菩

薩於己身內現。諸天見已，合掌歡喜：「前言愚癡，言『此大人命不云遠。』今見是相，必當成佛了了無疑，無上慧日照世不久。」作是語已，遶百千匝，各還宮殿。如此音聲，聞六欲天。

佛告父王：佛滅度後，若四部眾，欲觀如來苦行時白毫相者，當作是觀。如此觀者，是名正觀。若異觀者，名為邪觀。

佛告父王：云何名菩薩降魔時白毫相光？

魔王波旬遙以天眼觀閻浮提，見釋迦子棄國如唾，坐道樹下肌骨枯槁，形體羸瘦，如久病人，唯有金色光明益顯。其眼陷黑，如井底星。骨節相踣，失蟠龍文。波旬喜曰：「瞿曇體羸，骨如腐草，雖有光色，餘命無幾。曼道未成，宜往敗之。」瞋目大怒，敕諸夜叉：「速集軍眾。吾今欲行，下閻浮提，往征

瞿曇。」

是時，魔子名薩多羅，長跪白父：「淨飯王子，其生之時，萬神侍御，光徹眾天。其人慈悲，普覆一切。今為群生，坐於道樹。父王云何興惡逆意？」魔即怒曰：「汝幼無知，乃言『瞿曇有勝道德』。瞿曇身羸，如枯骨人，竟何所能，而言慈悲？」子復白言：「瞿曇體羸，不食故爾。觀其光色，如金剛山，紫焰流出。恬坐六年，心無傾搖。觀其面貌，曾無畏色。惟願，大王！且住天宮，不願往攻。」波旬復言：「汝但默然，何須多云？」

時，夜叉主名曰翅陀，即至魔所，頭面著地，為魔作禮，白言天王：「何所敕令？」波旬告曰：「汝以我聲，遍敕六天，告下鬼王并諸八部，及曠野鬼、十八地獄閻羅王神：『一切皆集，往瞿曇所。』」

是時，諸鬼，猶如雲起，從四面集。

或有諸鬼，首如牛頭，有四十耳，於其耳中，生諸鐵箭，赤焰上起，高一由旬，有十八角，角端擎山，山上有龍，銜熱鐵丸。

復有諸鬼，首如狐頭，有十千眼。眼睫長大，如霹靂炎。項上有口，口吐熾火。身上諸毛，猶如劍樹。

復有諸鬼，倒住空中，有十二脚，於其足跟，有千刀輪，頭如太山，於其頭上，五百劍樹，樹頭火起。

復有諸鬼，婉轉腹行，負鐵圍山，穹脊而至。

復有諸鬼，一頸多頭，口有千舌。於其舌上，生棘刺樹。毛鬣上衝，毛端雨血，吐刺疾走，騰空而至。

毘舍闍鬼，發大惡聲，氣踊如雲，雨熱鐵丸，倏忽而到。

鳩槃荼鬼，蹲踞土埵，現其醜形。

富單那鬼，其形黑瘦，頭戴大鑊，盛熱鐵丸，手執刀輪，左脚踏狗，右脚踏狼，奔走而至。

諸羅刹王，背黑如漆，胸白如月，眼如盛火，頭髮蓬亂，如縛刺束，狗牙上出，狀如鋸劍，手十指爪，利如鋒芒，脚有十爪，縱橫如劍，以鐵羈頭，疾走而至。

曠野鬼神大將軍等，一頸六頭，胸有六面，膝頭兩面，舉體生毛狀如箭鏃，奮身射人，張眼焰赤，血出流下，與諸兇類疾走而到。

復有諸鬼，首如虎頭，有十二眼。鼻如象鼻，有十三鼻。左肩擔山，右肩負

火。手捉利劍，脚躡師子，哮吼而至。

復有諸鬼，其身如雲，霹靂火起，如團雲頭。於團雲邊，有百千萬龍，不見其身，但見吐毒。於十方面，一切惡事，如雲而集。

鬼子母神將其諸子，各執一石，辟方十里，巖嶠可畏，競馳而至。

復有諸鬼，捲脊挾尾，以鼻嗅地，鼻出諸火，火焰上化，化生諸鬼，掩面而走。

是時，魔王顧視夜叉，告令諸鬼：「今者，鬼兵既已雲集，瞿曇善人，或能知呪，當興四兵。」

以魔王珠，化作四兵，象馬車步列仗如林，甚可怖畏。直從空下至道樹邊。

魔復更念：「如此軍眾，或不能淹降伏瞿曇。」

復脫寶冠，持擬地下。其冠光明，逕至下方，當閻羅王化人宮上，高聲大呼告敕諸鬼：「汝等獄卒及閻羅王！阿鼻地獄刀輪劍戟、火車鑪炭，一切都舉向閻浮提，欲滅瞿曇擲置其中。」

阿鼻地獄，縱廣正等八萬由旬。七重鐵城下十八鬲，四面劍林亦十八行。東方復有十八小地獄，以為圍遶。南方十八鬲以為圍遶，西方十八鬲以為圍遶，北方十八鬲以為圍遶。地下自然有熾猛火，燒燃鐵城，鐵網俱熾，一切熱焰周迴還旋，下過十八鬲。若有眾生犯五逆者，身滿其中，受如此苦，晝夜不息，間無空缺，劫欲盡時，四門自開。諸罪人等，見東門外一切劍林，如清涼林，從下鬲起至第二鬲，第二鬲起至第三鬲，乃至於上走趣東門。羅刹獄卒以熱鐵叉逆刺其眼，精如融銅，流出于地。即時蹙倒，遍滿十八鬲中，其心迷悶，滿

一小劫，爾乃還起，復向南門。如是四方，如前無異。晝夜受苦，經一大劫。劫盡更生餘小地獄。其餘眾獄，形狀大小，受報輕重，形類好醜，一切雜報，慈三昧中，當復廣說。

時，諸獄卒，城東八千，三方亦爾。一一獄卒，頭髮如山，生刀輪劍戟，耳如驢耳，有百千種。一一耳中，烟焰俱起。脣口牙齒，過於羅剎百千萬倍。角如牛角，角端生劍，五方異見。身體赤黑，如癩病狗，有四百尾。於其尾頭，膿血沸屎，有鐵嘴蟲纏其身體。手捉鐵叉，脚下踏輪，刀輪上刺，直徹心髓，駛疾如風。各以鐵叉，叉罪人腰，直上而走。阿鼻地獄如影隨形，逐罪人來。

俄頃之間，到道樹邊。一時雲集，欲興惡逆。菩薩，是時儼然不動，入勝意慈。魔王譁張，奮武振吼，敕諸兵眾：「汝等速疾逼害瞿曇。」

上震天雷，雨熱鐵丸。刀輪武器，更相加積，交橫空中。

四面諸鬼，同時俱作，然其火箭，不近菩薩。

是時，菩薩徐舉右臂，申眉間毛，下向用擬阿鼻地獄，令諸罪人見白毛中流出眾水，澍如車軸雨大火上，大火暫滅，唯烟氣在，令受罪人，心得小悟。自憶前世百生、千生、百千萬生所作諸罪。諸獄卒等持大鐵叉舉起罪人，盡其身力不能得動。忽然自見大鐵叉頭如白銀山，龕室千萬，有白師子盤身為座，於其座上生白蓮花，有妙菩薩入勝意慈，如是莊嚴如須彌山。放叉擲地，有七寶花生叉根下，有白色光明，照諸地獄及獄卒身，令閻羅王及諸獄卒作白銀山，猶如電光暫時得見。諸受罪人，六情諸根，猛火速起，節頭火燃，筋脈生釘，暫得一起，合掌叉手，向白毫相，即時心開。見白毛中人，如己無異，坐蓮花

床，以水澆灌諸罪人頂，令心熱惱暫得清涼，即皆同時稱「南無佛」。以是因緣，受罪畢訖，直生人中，諸情完具，正見出家。既出家已，破二十億洞然之結，成須陀洹。

魔見是相，憔悴懊惱，却臥床上。魔有三女，長名悅彼，中名喜心，小名多媚。時，魔三女至父王所，長跪叉手，為父作禮，啟言：「父王！今日，何故愁悴乃爾！」其父答言：「沙門瞿曇，結誓深重，今坐道樹，要壞我民，是故愁耳！」女白父言：「我能往亂，願父莫愁。」即自莊飾，著雜寶冠，容媚挺特，過踰魔后百千萬倍。眄目作姿，現諸妖冶，瓔珞晃耀，光翳六天，乘羽葆車，安施寶帳，垂諸天花。於花鬚頭，諸化玉女，手執樂器，鼓樂絃歌，聲萬種音，凡在世人之所熹樂。一一玉女，從五百女以為侍御，繪蓋幢幡，如雲而

下。身毛孔中，香烟芬馥，有百千色，玄黃昱爍，甚適人目，安庠徐步，至菩薩所，下車合掌禮敬菩薩，旋遶七匝，白菩薩言：「太子生時，萬神侍御，七寶來臻。何棄天位，來此樹下？我是天女，盛美無比，顏貌紅輝，六天無雙，今以微身奉上太子，供給左右，可備灑掃。我等善能調身按摩，今欲親附，願遂下情。太子坐樹，身體疲懈，宜須偃息，服食甘露。」即以寶器獻天百味。

太子寂然，身心不動，以白毫擬，令天三女自見身內膿囊涕唾、九孔筋脈一切根本，大腸小腸、生藏熟藏，於其中間，迴伏婉轉踊生諸蟲，其數滿足有八千戶，戶有九億諸小蟲等。蟲遊戲時，走入小腸，皆有四口，張口上向。大蟲遊戲，入大腸中，從大腸出，復入胃中。冷病起時，胃管閉塞，蟲不得入，故食不消。脾、腎、肝、肺、心、膽、喉嚨，肺腴肝鬲，如是中間，復生四蟲，

如四蛇合，上下同時啜食諸藏，滓盡汁出。入眼為淚，入鼻為涕，聚口成唾，放口涎流。薄皮厚皮，筋髓諸脈，悉生諸蟲，細於秋毫，數甚眾多不可具說。

其女見此，即便嘔吐，從口而出，無有窮盡。即自見身，左生蛇頭，右生狐頭，中首狗頭，頭上化生九色死屍，如九相觀。

九相觀者：

①新死相。或見死人，身體正直，無所復知。想我此身，亦當復爾，與此無異。故曰新死相。

②青瘀相。或見死人，一日，至于七日，身體青腫瘀黑相。我所愛身，亦當復爾，與此無異。故曰青瘀相。

③膿血相。或見死人，身已爛壞，血流塗漫，極為可惡，不可瞻視。我所愛

身，亦當復爾。故曰膿血相。

④絳汁相。或見死人，身體縱橫，黃水流出，狀似絳汁。我所愛身，亦當復爾。故曰絳汁相。

⑤食不消相。或見死人，為烏鳥所食，蟲狼所啖，為蠅所蛆，其肉欲盡，或半身存。我所愛身，亦當復爾。故曰食不消相。

⑥筋纏束薪相。或見死人，皮肉已盡，止有筋骨相連，譬似束薪，由是得成而不解散。我所愛身，亦當復爾。故曰筋纏束薪相。

⑦骨節分離相。或見死人，筋已爛壞，骨節縱橫，不在一處。我所愛身，亦當復爾。故曰骨節分離相。

⑧燒焦可惡相。或見死人，為家火所燒，野火所焚，焦縮在地，極為可惡，

不可瞻視。我所愛身，亦當復爾。故曰燒焦可惡相。

⑨故骨相。或見久昔乾骨，若五十歲，至百歲、二百歲、三百歲時，骨還變白，日曝徹中，火從骨上，焰焰而起，火燒之後，風吹入地，還歸于土。

是名略說九相，是為菩薩始在樹下初開不淨觀門。

時，三魔女，自見背上，復負老母，髮白面皺，脣口喎僻，手脚繚戾，顏色津黑，猶如僵尸。胸前復抱一死小兒，於六竅中流出諸膿，膿中生蟲，正似虻蟲。諸女見此，愕然驚嗥，却行而去。低頭視臍，臍生六龍，龍吐水火，耳出諸風，體堅如鐵。自見女形，醜狀鄙穢，乃當如是。於其鄙處，有諸小蟲，蟲有四頭，二上二下，啜食女身。口出五毒，毒有五脈，上至心下，乃至咽喉，從六根中生諸脈根，九十有九，直下流注，至諸蟲頂，共相灌注，徹諸蟲心。

諸女人等，從無數世造諸邪行，惡業因緣，獲得如是不淨醜身。復有諸蟲，如手臂釧，團欒相持而有眾口。口生五毒，啖食女根。諸女人等，先世之時，邪淫行故，獲臭惡身以為莊嚴。

諸女見已，心極酸苦，如箭入心。却行之時，匍匐而去，如羸駝步。初舉足時，節節火起。其髮黃黑，如刺棘林，以白纏身。呼嗟歎息，至魔王前。

魔王心怒，奮劍豎色，即欲直前。

魔子諫曰：「父王無辜自招瘡疣。菩薩行淨，難動如地，云何可壞？」

作是諫時，菩薩復以白毫光擬，令魔眷屬身心安樂，譬如比丘入第三禪。

餓鬼見白毛，毛端皆有百千萬億諸大菩薩，是諸菩薩亦入勝意慈心三昧，各以右手捋左指頭，爪端生乳，灑滅猛火。猛火滅已，即得清涼。自然飽滿，身

心踊悅，發菩提心。因是心故，捨餓鬼苦。是諸鬼等自見其身，如似白玉，似瑠璃山、似頗梨山、似黃金山、似馬瑙山。身諸毛孔，似真珠貫。眼目明淨，似明月珠。身諸烟焰，如雜寶雲。所執刀杖，似七寶臺。七寶臺內，重鋪綉縵安置丹枕，左右自然，有化梵王。見化菩薩，坐於花臺，各各異說諸罪人報：「汝等前世，坐作惡業故，獲如此可惡之形。」說是語時，是諸鬼神有發無上菩提心者，有種聲聞辟支佛因緣者，有於來世當生人天勝樂處者。

是時，魔王忽然還宮，白毫隨從，直至六天。於其中間，無數天子天女，見白毛孔通中皆空，團圓可愛如梵王幢。於其空間，有百千萬恒河沙微塵諸寶蓮花，一一蓮花，無量無邊諸妙白色以為其臺，臺上有化菩薩放白毫大人相光，亦復如是。諸菩薩頂有妙蓮花，其花金色，過去七佛在其花上，是諸化佛白說

名字，與修多羅等無差別。

復有諸天宿善根者，見化菩薩一毛孔中生一菩薩，菩薩頂上皆有化佛，如前不異。

時，諸化佛眉間出花，百寶莊嚴，諸天世間無色可比。有化光臺，臺上化佛如前不異。諸化菩薩身毛孔中，化出一切十方眾生所希見事。化人足下有化光臺，生諸天宮，勝過六欲魔王宮殿，亦勝大梵儼身之宮。諸梵頂相，從化菩薩足輞間生。如是白毛上至無色，遍照一切無量無邊諸天世界，皆如白寶頗梨明鏡。

諸天見此勝瑞相已，不樂天樂，發菩提心。魔王八萬四千天女，視波旬身，狀如死狗，亦似焦木。但瞻菩薩白毫相光，心意悅樂，無以為譬。怒恚波旬：

「前所為事，規欲壞他，自失軍眾。」作是語時，百千無數天子天女，復發無上菩提道意。

佛告大王：如是種種諸勝相事，但從菩薩眉間白毫而生此耳！不勞其餘身分功德。

佛滅度後，諸四部眾，若能暫時捨離散亂，繫心正觀菩薩降魔白毫相者，滅無數劫黑業惡障，亦除十惡諸煩惱障，能於現世見佛影像，了了分明。如是種種觀相境界，不可具說。

如我滅後，欲觀如來降伏魔時白毛相者，當作此觀。

如是觀者，名為正觀。若異觀者，名為邪觀。

云何名為如來成佛時大人相、覺人相、不動人相、解脫人相、光明人相、滿

智慧人相、具足諸波羅蜜相、首楞嚴等諸三昧海相？

菩薩摩訶薩，從勝意慈三昧起，入滅意定。從滅意定起，還入首楞嚴。從首楞嚴起，入慧炬三昧。從慧炬三昧起，入諸法相三昧。從諸法相三昧起，入光明相三昧。從光明相三昧起，入師子音聲三昧。從師子音聲三昧起，入師子奮迅三昧。從師子奮迅三昧起，入海意三昧。從海意三昧起，入普智三昧。從普智三昧起，入陀羅尼印相三昧。從陀羅尼印相三昧起，入普現色身三昧。從普現色身三昧起，入法界性三昧。從法界性三昧起，入師子吼力王三昧。從師子吼力王三昧起，入滅諸魔相三昧。從滅諸魔相三昧起，入空慧三昧。從空慧三昧起，入解空相三昧。從解空相三昧起，入大空智三昧。從大空智三昧起，入遍一切處色身三昧。從遍一切處色身三昧起，入寂心相三昧。從寂心相三昧

起，入菩薩摩訶薩金剛相三昧。從金剛相三昧起，入金剛頂三昧。從金剛頂三昧起，入一切三昧海。從一切三昧海起，入一切陀羅尼海三昧。從一切陀羅尼海三昧起，入一切佛境界海三昧。從一切佛境界海三昧起，入一切諸佛解脫、解脫知見海三昧。從解脫、解脫知見海三昧起，然後方入無量微塵數諸三昧海門。從諸三昧海門起，入寂意滅意三昧。從寂意滅意三昧起，入金剛譬定大解脫三昧相門。

爾時，道場地化似金剛，滿八十里，其色正白，不可具見。此相現時，菩薩眉間白毫相光，端潔正直，矗然東向，長一丈五尺，有十楞現。

彌迦女人，同類五女，無數萬億天、龍、鬼神，彌勒賢劫諸菩薩等、跋陀婆羅等無量無邊阿僧祇微塵數諸大菩薩，亦見此相。

此相現時，佛菩提樹，白毛力故，根下自然化生寶花，縱廣正等四十由旬。其花金色，金剛為臺。佛眉間光，照此花臺。其光直下至金剛際，於金剛際，自然化生二金剛座，互相振觸，聲振三千大千世界，令此大地六種振動。其金剛座上衝蓮花，至蓮花根，其蓮花根亦是金剛，三種金剛共相振觸，直還下過至金剛際，往旋十返，白毫光明圍遶十匝，令金剛座，鏗然不動。

佛坐此坐，消除三障，成菩提道。佛心境界，說不可盡。若廣說者，一切眾生至十地菩薩，亦不能知，亦非所解。是故，於此白毫相中，隱而不說。

如是，白毛光明力故，令菩提樹，金剛為莖，根亦金剛，鬚七寶成，鬚上生光，各各有七，圍遶佛身，化成寶縵。樹葉金色，花百寶色。花上有光，百千寶色，諸天寶光不得為譬。果白寶色，夜摩天上微妙白寶不得為比。其果光明

化摩尼網，彌覆樹上，於其網間猶如白絲，婉轉下垂，化成寶鈴。

鈴四角頭，有大寶臺。其臺高顯，過於上方無量世界。過是界已，復更化成諸大寶臺，其臺高妙不可具說，光顯微妙，譬如和合百千萬億諸須彌山。於其臺上，有大寶蓋，純金剛成，雜色間錯，微妙光明。光明下垂，化成幡帳。於幡帳中，雨寶蓋雲。寶蓋雲中，雨幢幡雲。幢幡雲中，雨妓樂雲。妓樂雲中，雨寶光雲。寶光雲中，雨諸香雲。諸香雲中，雨師子座雲。師子座雲中，雨花鬘雲。花鬘雲中，雨妙音雲。妙音雲中，雨偈頌雲。偈頌雲中，雨諸珍寶供養具雲。如是等種種供具，皆從菩提樹白毫相光明中出。

時，白毛光下垂照地，令道場邊金剛地上化作七池，池生德水，水有七色，七色分明，色有十光上照樹王。其池四岸，眾寶合成。一岸，百寶所共合成。

一寶，流出百億光明。池底純是金剛摩尼，以為底沙。水生諸花，純黃金葉。葉上千光，化成光輪。池有七渠，水自湧出。池中生花，葉葉相次，於蓮花鬚流出諸水，如琉璃珠映徹分明。於渠兩邊，列生諸花，八萬四千，眾寶嚴飾。此渠中水，更相灌注。當水流時，光亦隨轉，映菩提樹。此樹光中，一一葉上生寶蓮花，其花遍布一切世界。於其花上化白寶臺，遍至十方無量世界，其白毫光從佛眉間出。寶蓮花團圓正等滿一由旬。如是相次過於上方，無量無邊不可算數微塵世界。花花相次，一一花上見一佛坐，身黃金色，方身丈六，結跏趺坐坐蓮花臺。其金剛座及菩提樹，如上所說，等無有異。乃至十方，亦復如是。

於白毫中復出寶花，勝前寶花百億萬倍。花上有佛，如釋迦文，等無有異，

一花鬚頭，復有一佛，身亦丈六，入深禪定，心不傾動。

如是光明，照於東方無量無數百千世界，令諸世界，皆作金色。彼眾生見化佛毛孔開現光明，亦復如是出無量百千寶光，一一光中，復有無量百億化佛。

時，諸天、龍、鬼神、夜叉、乾闥婆等，覩此光明遶佛千匝照十方國。見十方國，高下大小，了了分明，如執明鏡，自見面像。是諸大眾，波旬眷屬八萬億眾，諸鬼神、天、龍、夜叉等，各見白毫端直丈五，十方光現，映蔽眾目，如萬億日，不可具見。但於光中，見無量無數百億千萬化釋迦文，眉間白毛，正長丈五，一一毛中出無量光，一一光中無量化佛，化佛眉間亦復如是。是白毫光輪郭之中，流出眾光上至佛額，顯發額廣平正之相，額上諸毛毛皆上靡，其毛根下梵摩尼色，適眾生心，毛端流光如融紫金，光相上靡入於髮際，婉轉

垂下至耳輪邊，然後布散上入髮間，圍遶蚤文數百千匝，從枕骨生，如金蓮花葉，日照開敷。蓮花葉間及蓮花鬚，如帝釋臺，了了分明，眾色異現。於其色間，無量化佛。一佛，七菩薩、諸天以為侍者，手執寶花白中白者。花有五光五色分明，隨從化佛，不失其所。此名如來初成佛時白毫相光。

因白毫光，初生頂光。生王宮時，此光如日，見不了了，圓光一尋，別白當說。

時，諸八部覩白毫光，所見不同。有見白毛，猶如諸佛。有見白毫，如諸菩薩。有見白毛，如己父母，一切世間可尊敬事，悉於毛端，了了得見，見已歡喜。有發無上菩提心者，有發聲聞、緣覺心者。如是諸鬼見白毛者，自然慈心無諸惡意。

佛告父王：如來白毛，自從初生乃至成佛，於其中間微細小事可得觀見。既成佛已，白毫光明眾相具足，諸修多羅中佛已廣說。白毫相光究竟之處，十地菩薩爾乃得見。先說小者，應諸世間此事易見。」

佛告父王，及敕阿難：諦聽！諦聽！善思念之！傳語後世諸弟子等，皆令得知。若我滅後，諸比丘等若問是事，此白毫相，菩薩本昔修何行得？汝當答言「佛白毫相，從無量劫，捨心不慳，不見前相，不憶財物，心無封著，而行布施。以身心法，攝身威儀。護持禁戒，如愛雙目。然，其心內豁然虛寂，不見犯起及捨墮法。心安如地，無有動搖。設有一人，以百千刀屠截其身；設復有人，以諸棘刺鞭撻其身。菩薩初無一念瞋恚。設復有人，頭有千舌舌出千言，種種異辭罵辱。菩薩顏色不變，如淨蓮花，心無所著，身心不懈，無疲倦意，

如救頭燃。如身毛孔生那利瘡，求覓良醫，晝夜精進。心無染污，如琉璃珠表裏俱淨，攝身斂意，閉目叉手，端坐正受。其心如海，湛然不動。如金剛山，不可沮壞。雖作是意，不隨禪生，灰心滅智，無所適莫，亦無覺觀非不觀法。心智猛利，攝諸方便，不見有法，若大若小，有細微相，如是眾多名波羅蜜。亦從三十七助菩提法，復從十力、四無所畏、大慈大悲三念處諸妙功德，得此白毫。」

若我滅後，佛諸弟子，捨離諸惡，去憤鬧相，樂少語法，不務多事。晝夜六時，能於一時，於一時中分為少分，少分之中能須臾間，念佛白毫令心了了，無謬亂想，分明正住，注意不息，念白毫者，若見相好若不得見，如是等人，除却九十六億那由他恒河沙微塵數劫生死之罪。

設復有人，但聞白毛，心不驚疑，歡喜信受。此人，亦除却八十億劫生死之罪。

若諸比丘、比丘尼、優婆塞、優婆夷，犯四根本罪，不如等罪及五逆罪，除謗方等。如是眾人，若欲懺悔，晝夜六時，身心不懈。譬如人在深草中行，四面火起，猛風吹來，欲燒其身。此人作念：「若火燒我，未死之間支節解散，我當云何得滅此火？若不設計，命必不濟。誰有智者多諸方便能救我命？設命全濟，於彼人所，無所憫惜。」作是思惟已，如太山崩，五體投地號泣雨淚，合掌向佛，讚歎如來種種德行。作是讚已，誦懺悔法，繫念在前，念佛眉間白毫相光，一日至七日，前四種罪可得輕微。三七日時，罪相漸滅。七七日後，然後羯磨，事在他經。若比丘，犯不如罪，觀白毫光，闇黑不現，應當入塔觀

像眉間，一日至三日，合掌啼泣，一心諦觀。然後入僧說前罪事，此名滅罪。前五種罪，念白毫光，經八百日，然後復有別羯磨法。

佛告父王：如來有無量相好。一一相中，八萬四千諸小相好。如是相好，不及白毫少分功德。是故，今日，為於來世諸惡眾生，說白毫相大慧光明消惡觀法。若有邪見極重惡人，聞此觀法，具足相貌，生瞋恨心，無有是處。縱使生瞋，白毫相光，亦復覆護。暫聞是語，除三劫罪。後身生處，生諸佛前。如是種種百千億種，觀諸光明微妙境界，不可悉說。念白毫時，自然當生。

如此觀者，名為正觀。若異觀者，名為邪觀。

云何名觀額廣平正額廣平正相？

二輪光明，光明輪郭，千輻轂輞，成摩尼珠，形如毘紐羯磨天畫。於畫中流

出上妙金色之光，來入白毫，遶毫七匝，上入額上諸毛孔中。乃至髮際諸色相中，婉轉下垂，至于耳輪，上散入髮，遶髮七匝。從枕骨出，遶前蓮花相，團圓七匝，七畫分明，畫有七色，色生七花，花有一佛，有七菩薩以為侍者，恭敬圍遶，右旋而轉。如是額廣平正三相：髮際相、頭諸毛孔相、腦中相。腦中亦有十四光，現諸脈中，中外俱徹，明顯可愛，踊出白光，紅紫間錯，其色微細從枕骨出，亦遶前者三匝。一一畫間，有一佛坐，有二菩薩以為侍者，益更明顯，勝前數倍。

云何觀如來眉相？

左右二眉，形如月初，卷生諸毛，稀稠得所，隨月形轉，其色艷紫，毛端紺青。琉璃妙光，色無與比。眉光兩靡，散入諸髮，既入髮已，上至髮杪，其光

蚤起。蜂翠孔雀，色無以類。猶如聚墨，比琉璃光。亦復下垂，從枕骨出，右旋婉轉，遶光四匝。一一畫中，出一化佛，有二菩薩及二比丘翼侍左右，皆悉住立蓮花鬚上，明顯可愛，勝前數倍。眉下三畫及眼眶中，旋生四光，青黃赤白，上向艷出，入眉骨中。出眉毛端，亦如前法。從枕骨出，遶光四匝，四色分明：黃色化佛，身黃金色。白色化佛，身白銀色。青色化佛，身金精色。赤色化佛，身車渠色。如是右旋，益更明顯，勝前數倍。

云何觀如來眼睫相？

如來眼睫，上下各生有五百毛，柔軟可愛，如優曇花鬚。於其毛端，流出一光，如頗梨色，入前眾相。光明色中，遶頭一匝，從枕骨生，圍遶前光，純生微妙諸青蓮花。蓮花臺上，有青色蓋，有梵天王手執是蓋。此相現時，佛眼青

白，白者過於白寶百億萬倍，青者勝青蓮花及紺琉璃百億萬倍。上下俱眇，如牛王眼，眼雙眇頭旋出二光，如青蓮花，極為微細，遶髮一匝從枕骨出，映飾諸花，令花開敷，光明益顯。如是勝相，無量功德，名如來眼。

若有欲觀如來眼者，當作此觀。作此觀者，減損諸惡。閉目端坐正觀佛眼，一日至七日，於未來世常得見佛，終不盲冥，亦不生於邊地邪見無佛法處。慧眼恒開，不生愚癡。

佛告父王：是故，智者為除盲冥，當觀佛眼。

佛有五眼，此觀法中，先說肉眼。明淨光現，觀眼心利。傍生境界，不可具說。諦觀佛眼，於少時間，及觀像眼，未來世中經五生處，眼常明淨，眼根無病，除却七劫生死之罪。

佛告阿難，敕諸四眾：勤觀佛眼，慎勿休廢。觀佛眼者必獲無量微妙功德。髮際額廣，及髮螯文，眼眶眼眉，眼睫眼畫，如是等眾相光明，若能暫見，除六十劫生死之罪。未來生處，必見彌勒、賢劫千佛，威光所護，心如蓮花，而無所著，終不墮於三塗八難。若坐不見，當入塔觀。入塔觀時，亦當作此諸光明想，至心合掌踰跪諦觀，一日至三日，心不錯亂，命終之後，生兜率天，面見彌勒菩薩色身端嚴，應感化導。既得見已，身心歡喜入正法位。

佛告父王：如是觀者，名為正觀。若異觀者，名為邪觀。

佛告父王：云何觀佛耳？

佛耳普垂睡，旋生七毛，輪郭眾相，及生王宮初穿耳時，令兩耳孔，內外生花。此蓮花中，及耳七毛，流出諸光，有五百支，支五百色，色出五百化佛，

佛五菩薩，有五比丘以為侍者，遶光右旋，其數五匝，上下正等，映照佛耳。佛耳可愛，如寶蓮花懸處日光。佛在世時，一切大眾咸見是相。是名佛耳色相光明。

佛告父王：若四部眾遠離憤鬧，正念思惟佛耳相者。此人生處，耳根清淨，無諸穢惡。耳常得聞無上微妙十二部經。聞已信解，如說修行，除滅八十劫生死之罪。若不見者，如前入塔諦觀像耳，一日至十四日，亦得如向所說功德。是故，智者當勤修集正觀佛耳，勿使廢失。若病苦時，倚側偃臥，亦當觀佛清淨耳相。如是觀像耳，如前所想，心不懈退，後身生處，亦常得與陀羅尼人以為眷屬。聞法憶持，譬如貫珠。

如是觀者，名為正觀。若異觀者，名為邪觀。

云何觀如來方頰車相？

如來頰上六畫中，左右正等有妙光色，輝艷倍常，閻浮檀金光色遍照，令佛面相如淨金色，譬如和合百千日月。是名如來方頰車相。

佛滅度後，佛諸弟子，繫念思惟作是觀者，除滅百劫生死之罪，面見諸佛，了了無疑。

如是觀者，名為正觀。若異觀者，名為邪觀。

云何觀如來師子欠相？

佛張口時，如師子王，口方正等。口兩吻邊，流出三光。其光金色，過踰前光百千萬倍。上入耳光，圍遶諸髮。從枕骨出，遶前圓光。一一畫間，有三化佛。一一化佛，有二梵王以為侍者。是名如來師子欠相。

佛滅度後，四部弟子作是觀者，除滅十劫生死之罪。後身生處，口中恒有優鉢花香。有所宣說，人皆信受。譬如帝釋三十三天一切信用。如是觀者，是名正觀。若異觀者，名為邪觀。

云何名觀如來鼻相？

如來鼻高，修而且直，當于面門。如來鼻端，如鷹王觜，鼻孔流光，上下灌注。上者上入眼、眉、白毫相、髮際，如是直入頂肉髻骨，譬如金幢。從枕骨出，變成眾花，花上皆有天諸樂神手執樂器，遍入一切諸化佛間，以為導從，遶光十匝。下者直至入佛髭中，圍遶髭毛，令髭毛根有花開敷，如稊米粒，流入脣腭至諸齒間映飾咽喉，下至佛胸成光明雲，表裏清淨，無諸塵翳，如琉璃器成金光焰。是名如來真淨鼻相。

佛滅度後，佛諸弟子如是觀者，除滅千劫極重惡業。未來生處，聞上妙香，心意了了。不著於香，常以戒香為身瓔珞。

如是觀者，名為正觀。若異觀者，是名邪觀。

云何觀如來髭？

諸髭毛端，開敷三光，紫紺紅色。如是光明，直從口邊旋頸上照，圍遶圓光作三種畫，其畫分明。色中上者，一一畫間生一寶珠。其珠光明，有百千色。珠下白花，莖莖相跂，滿三匝已，然後彼光還入髭中。是名如來髭毛光相。

佛滅度後，作是觀者，除三十劫生死之罪。後身生處，身諸毛孔有自然光。心不樂著家居眷屬世間之樂，常樂出家，修頭陀行。

如是觀者，名為正觀。若異觀者，名為邪觀。

云何觀如來脣色赤好如頻婆果相？

於上下脣及與斷腭和合出光，其光團圓，猶如百千赤真珠貫。從佛口出，入於佛鼻。從佛鼻出，入於白毫。從白毫出，入諸髮間。從髮間出，入圓光中，映飾諸花。口四十齒，印上生光。其光紅白，光光相照，照四十齒，令四十齒根，自然齊白如頗梨璧，上下齊平，無參差者。齒間文畫，流出諸光，亦紅白色。如是眾色，佛在世時，映耀人目。佛滅度後，當以心眼觀見此色。

佛諸弟子作此觀者，除二千劫生死之罪。後身生處，脣口微妙，齒不疏缺，得色中上色。雖得是色，心不貪著。常見諸佛、聲聞、緣覺，為之說法，令心不疑。

如是觀者，名為正觀。若異觀者，名為邪觀。

云何觀如來廣長舌相？

如來舌者，是十波羅蜜十善報得。其舌根下，及舌兩邊，有二寶珠，流注甘露，滴舌根上。諸天世人、十地菩薩，無此舌相，亦無此味。舌上五畫，如寶印文。如此上味入印文中，流注上下入琉璃筒。諸佛笑時，動其舌根，此味力故，舌出五光。五色分明，遶佛七匝，還從頂入。佛出舌時，如蓮花葉，上至髮際，遍覆佛面。舌下亦有眾雜色脈。如此上味，流入脈中，其味力故，變成眾光，有十四色。

一一光上，照無量世界。一一光間，有一光臺，其色眾妙，不可具名。一一光臺，龕室無數。一一龕中，無量化佛結跏趺坐，聲聞菩薩一切大眾，皆悉圍繞。過於上方無量世界，化為一佛，佛身高顯如須彌山，如是諸佛其數無量，

皆出舌相亦復如是。

一一光下照至阿鼻獄，令阿鼻獄如黃金色。佛舌力故，令受苦人暫得休息，自慨前世所作惡事。如是下過無量世界，一一界中化寶花樹，葉如佛舌，舌相放光，光光相照變成化佛。其化佛身純白銀色，身相具足。一一化佛，出廣長舌，舌相光中，有諸化佛。如是化佛，其數無量。化佛光明，成一銀山，其山高，無量無邊。於其山間，純生銀樹、金花、銀果。樹下皆有白玉蓮花，花上復有白玉化人，玉人臍中化生六龍，其龍口黑，龍色純白。是化玉人，其數無量。復更下過照無量界，見白玉樹，從下方出，至娑婆界，復更蔭蔚至三界頂，枝條扶疏，其葉有色，色九十八，一一樹葉遍覆三界，其諸葉間復有龍、象、虎、狼、師子、毒蟲、惡獸、猫狸、鼯鼠，無事不有，其餘境界，坐者自

見。

見一光照東方，令東方地皆作金色，山河樹木一切火燒，火光、金光各不相障。於金光端，有諸化佛，佛佛相次。乃至東方無量世界，譬如稻麻，間無空缺。一佛皆有無量菩薩以為侍者。是諸菩薩亦出舌相，與佛正等。如是舌相，無量光明，化成光雲。於光雲中，如微塵等無量化佛結跏趺坐。如是光明，其數無量。時，火焰端有五夜叉手執利劍，頭有四口吸火而走。如是諸鬼，其數無量，乃至東方亦復如是。

一光照南方無量世界，令其世界作琉璃色，琉璃地上生黃金花，黃金花上生馬腦花，馬腦花上生車渠花，車渠花上生玫瑰花，玫瑰花上生虎魄花，虎魄花上生珊瑚花，珊瑚花上生金精花，金精花上生金剛花，金剛花上生摩尼光花，

摩尼光花一一葉間，有無量色百億寶花。一一花鬚，有無量釋迦牟尼，結跏趺坐，菩薩大眾以為圍遶。時，諸大眾身毛孔中亦出此花，一一花上現希有事，亦如上說。是諸化佛，出廣長舌相，開現光明，倍勝是相百千萬倍。於諸花間有妙寶座，高顯可觀如梵王床。一一床上有大菩薩，身相端嚴，猶如彌勒，亦出廣長舌相。其舌光明作摩尼網，覆諸化佛及與大眾。摩尼網間出大寶光。其寶光端，復有無量無邊化佛。一一化佛，各有無數比丘侍從。時，諸比丘坐金蓮花，身黃金色，安禪合掌，入念佛定。身諸毛孔，出金色光。此一一光，化成化佛，猶如金山，圍遶比丘。有化比丘，亦圍遶佛，如是眾多數不可說。

一光照西方，令西方地作頗梨色。頗梨地上有金剛雲，金剛雲中有白寶雲，白寶雲中有赤真珠雲，赤真珠雲中有白真珠雲，白真珠雲中有紫真珠雲，紫真

珠雲中有綠真珠雲，綠真珠雲中有紅真珠雲，紅真珠雲中有閻浮檀金沙雲，金沙雲中有金剛摩尼微塵雲，金剛摩尼微塵雲中有一切寶色微塵雲。如是一一雲中，有五十六億色，微妙鮮好，過於眼界，唯有寂心可與此合。如是諸相，復有無量微塵化佛，一一化佛，無量微塵諸化弟子，諸塵不大，諸佛不小，端嚴微妙如釋迦文，亦出舌相。

一光照北方，令北方地作車渠色，車渠地上有金剛塔。一一佛塔，百千妙塔以為圍遶，其數無量。塔極小者，高五十億那由他由旬。一一塔中，復有百億塵數龕窟。一一窟中，無量無邊諸寶色水自然踊出。是諸水上，有大蓮花開現光明，其光現時，香氣微妙，勝海此岸栴檀之香，百千萬倍。是香變為微妙光明，諸光明中有諸化佛，身色微妙。寶中上者，一切眾寶從舌相出。時，一一

窟無量光明，一一光明無量化佛，一一化佛復出舌相，光明無量，亦成香塔，過於北方無量世界，不可窮盡，但從念佛三昧海生。

一光照東南方，令東南方其地馬瑙色，馬瑙地上有虎魄山，虎魄山上生七寶林，七寶林間有十泉水，水十寶色，水色放光，普照東南方無量世界。光所照處有大寶山，一一山間一一樹下，生曼陀羅花、摩訶曼陀羅花。於花臺上有一化佛，純琉璃色，內外清徹，不可具名。雜寶色光，遶身千匝。一一光中，無量化佛。一一化佛，無量大眾，皆琉璃色以為圍遶。一一化佛，出舌相光明，化成寶山。如是寶山，復過東南方無量世界。

一光照西南方無量世界，令西南方地純珊瑚色。珊瑚地上，生碧玉樓。樓極下者，高五十億由旬。樓一億柱，此一一柱百億寶色。一一寶放無數光，此一

一光化為無量千億寶樹，一一樹下有六泉水。其水從樹根入，從樹條出，流出之時，有六寶色。一一水中，生一蓮花，其花鮮白。花上復有一白化佛，其身極白，過踰一切。白色之上，有五百色，微妙光明，圍遶佛身。一一光明，化無數佛。一一化佛，有無數菩薩。樓閣諸柱皆放光明。一一光中，無數化佛。青色化佛，在於珊瑚地上經行。白色化佛，在於青玉樓上經行。樓閣龕室，皆有如是無數化佛，亦出舌相放大光明，其光微妙，照西南方無量世界，不可窮盡。

一光照西北方，令西北方作虎魄地。於虎魄地上，生真珠山。真珠山上，有珊瑚樹、白玉葉、摩尼花、黃金果、金精鬚。樹下自然有大師子，其身七寶。師子眼中放大光明，照虎魄地，令虎魄地生一大蓮花，其花周圓無量無邊。一

一花上有光明雲，其雲紫色，雲上有網，綠真珠色。真珠網間，生金蓮花。金蓮花上，有一化佛，身紫金色，青黃赤白五色光明，以為圍遶。一一光中，無數化佛。一一化佛，無量大眾。是諸化佛出廣長舌相，亦復如是。如是遍照西北方無量世界，舌相光明不可窮盡。

一光照東北方，令東北方地純金剛色。於金剛地上生花，七寶合成。花上生幢閣浮金色。幢頭有花，其花無量百千寶色，有無數葉，一一花葉，化為無量百千寶帳。一一帳角，有七寶幢。一一幢頭，有七寶蓋。其蓋彌覆東北方地一切世界。蓋有五幡，純黃金成。幡有萬億無量寶鈴，鈴出妙音，讚歎佛名、讚歎禮佛、讚歎念佛、讚歎懺悔。出是聲已，寶帳下地大光踊出，其光微妙，無數千億。一一光中，無量化佛，結加趺坐，坐寶帳內。復有踊身住虛空中，東

踊西沒，西踊東沒，南踊北沒，北踊南沒，邊踊中沒，中踊邊沒。或現大身滿虛空中，大復現小，身如芥子。於虛空中，行住坐臥，身上出水，身下出火，身下出水，身上出火，履地如水，履水如地。水中生蓮花，大如車輪，花上有佛結跏趺坐。如是化佛，無量無邊。同時見佛踊身空中作十八變，火上生一金須彌山、星宿日月七寶莊嚴、諸龍、夜叉，及大海水。如是眾多須彌山，左右一切諸有，皆悉出現。如是眾山，其數無量。山頂有佛亦出舌相，舌相光明，遍照東北方無量世界，不可窮盡。

一光上照從閻浮提四天王宮，令四天王皆見釋迦牟尼世尊人中之日，乘七寶臺，與諸大眾往彼天上。諸天見已，發菩提心，乃至無色界一切諸天，皆見是相，了了分明，心不謬亂，令無色天不謗涅槃，起菩提想。

一光下照諸阿修羅、諸夜叉等、諸乾闥婆、諸迦樓羅、諸緊那羅、諸摩睺羅伽、諸龍、諸羅刹、諸富單那、諸金毘羅、諸啖人精氣鬼、諸鳩槃荼、諸吉遮、諸曠野鬼、諸餓鬼、諸食吐鬼、諸食涕唾鬼、諸食膿血鬼、諸食屎尿鬼、諸山神、諸樹神、諸水神。如是等若干百千諸鬼神等，其身暫時作天身色，柔軟悅樂，譬如比丘入第三禪。是諸鬼等，各隨業行，自發三種菩提之心。諸餓鬼等，舌相光現時，猶如冷水滅節間火。火既滅已，融銅墮地，直陷入地。時諸餓鬼皆悉張口唱言：「飢，飢，於千萬歲不曾見水。今遇此水，除熱清涼。是誰力耶？」空中聲曰：「愚癡餓鬼，有佛世尊放舌光明，其光照汝，令汝苦毒悉得休息。」作是語已，一一鬼前見一慈母坐蓮花臺，譬如慈母抱持嬰兒與乳令飲，使鬼飽滿。既飽滿已，發菩提心。既發心已，一一慈母化成一佛。時

一一佛亦放舌相救諸餓鬼。

佛攝舌相，此光千色，遶佛千匝。光有千佛，從佛頂入。入已，佛身嚴顯，三十二相八十隨形好，皆悉明耀，遍體流光，晃晃昱昱，勝於百千無數億日。

佛告父王：如來舌相及舌功德，觀舌境界，其事如是。

佛滅度後，念佛心利觀佛舌者，心眼境界，如向所說。作是觀者，除去百億八萬四千劫生死之罪。捨身他世，值遇八十億佛。於諸佛所，皆見諸佛廣長舌相。放大光明，亦復如是。然後，得受菩提道記。

佛告阿難：汝持佛語，莫令忘失，告諸弟子：「正身正意，端坐正受，觀廣長舌者，如我在世，等無有異。」若有眾生聞此說者，心不驚疑，不生誹謗，不惱念佛者、勸進念佛者，供養恭敬尊重讚歎。如是等人，雖不念佛，以善心

故，除却百劫極重惡業，當來生處，值遇彌勒，乃至樓至佛。於千佛所，聞法受化，常得如是觀佛三昧。

佛告父王：如是觀者，名為正觀。若異觀者，名為邪觀。

云何觀如來頸相、缺瓮骨滿相、臆德字相、卍字印相？

是眾字間，出生圓光。頸臆圓相，如琉璃筒，懸好金幢。咽喉上，有點相分明，猶如伊字。——一點中，流出二光。其——光，遶前圓光，足滿七匝，眾畫分明。——畫間，有妙蓮花。其蓮花上，有七化佛。——化佛，有七菩薩以為侍者。——菩薩，二手皆執如意寶珠，其珠金光，青黃赤白及摩尼色，皆悉具足。如是圍遶諸光畫中，是名佛頸出圓光相、胸德字文，卍字印中缺瓮滿相、腋下珠相。是諸相中，——勝相，有五百色雜色光明，共相映發，各不相妨。

一一色光，圍遶頸光，足五百匝。一一畫中，五百化佛。一一化佛，五百菩薩以為侍者。五百比丘，手執白拂侍立左右。諸化佛光、化菩薩光、化比丘光，於眾光中，皆悉顯現。大須彌山四天王宮、諸天宮殿、日月星辰、龍宮神宮、阿修羅宮，十寶山神、四海水神，及諸水性乾闥婆等。諸婆羅門所尊敬事，九十五種神仙異術，父母所親歷世因緣，如是等神，於佛光中，悉皆顯現。

復有百億無量鬼神，影現圓光，為閻浮提人，說孝養事。此影化人，見眾人時，皆自說言：「我是汝父，我是汝母，無量世中，汝字某甲，我名某甲。」如是眾多無量大眾，皆是眾生所尊敬事，於佛圓光，了了如畫，如鏡見面。如是眾相，名為圓光。圍遶佛頸，上亦一尋，下亦一尋，左亦一尋，右亦一尋，足滿八尺。於圓光中，流出化佛。一切眾生所希見事，皆於中現，了了分明。

於圓光上，有金色艷，如摩尼珠，嚴顯可愛。摩尼艷間化生花樹，其樹金色，百千萬億閻浮檀金，不得為比。一一樹下有寶蓮花，花上化佛真黃金色，如琉璃蓋以覆佛上，顯發金顏，分齊分明。如是化像，其數無量。

佛在世時，世尊行時，此光照地，前一由旬，純黃金色。後一由旬，純黃金色。左一由旬，純黃金色。右一由旬，純黃金色。有人近佛左右行者，其人臭穢，皆悉不現。人遠望之，同為金色。佛坐樹下，此光赫奕，如眾金花散祇樹間。有人諦觀佛項光者，前行看者見佛在前，從後看者見佛在後，左邊看之見佛在左，右邊看之見佛在右。八方人來遙見項光，各作是言：「瞿曇沙門，在金山中遊行自在，來向我所。」如是眾人各各異見，是名項光。

見此光時，佛頂肉髻生萬億光，光光相次，乃至上方無量世界。諸天世人、

十地菩薩，亦不能見其髮右旋上妙螭文。蜂翠孔雀，色不得比。有千光明，赫奕而起。此光起時，佛肉髻骨及佛頭中，一切妙相皆悉映現，滿足面相，光明可愛，人天淨國，報得妙花，不得為譬。佛面光明，益更明顯。佛頸、佛胸，及以佛臂，勝前數倍，光更明顯。佛膝出光，其光白色，分為四支，隨身上轉化作白花入項光下。臍出五光，光有二支，支有五色入脇骨中，如白玉筒盛眾色水，從兩肩後，自然踊出，如金摩尼，焰焰相跬。諸摩尼光有妙蓮花，一一蓮花上有七化佛，如畫如印，隨佛身轉，不相障礙，鹿王躡，鈎鎖骨，蟠龍結間。如是中間，出諸金光。此一一光，從一節出，入一節間。如是，和合成一大光，如金摩尼，住佛肘後，艷至頂光，赤銅爪，足指縵網，各各有光，其光赫奕，琉璃頗梨，備七寶色，從佛足趺，副稱佛身，如摩尼珠。亦如前光，上

至圓光。

足下輪相及長足跟，各生一花，其花微妙，猶如淨國優鉢羅花佛足跟出，圍遶諸光滿足十匝，花花相次。一一花中，有五化佛。一一化佛，五十菩薩以為侍者。一一菩薩，其頂上生摩尼珠光。此相現時，佛身毛孔，一一孔中，旋生八萬四千微細諸小光明，嚴飾身光，極令可愛。如是種種雜色，名為常光，名適意光，亦名隨諸眾生所樂見光，亦名施眾生眼光。此光一尋，其相眾多，瞿師羅觀佛此光隨小，乃至他方諸大菩薩，觀佛之時此光隨大，如《雜花》說。

佛告父王，及敕阿難：吾今為汝，悉現具足身相光明。

作是語已，佛從坐起，告阿難言：汝諸比丘，并諸釋子！皆悉起立，合掌向佛，諦觀如來，從頂光明下至足光，從頂肉髻下至足下，平滿之相。

復敕比丘：復從足下平滿相，上乃至肉髻，亦觀如來身光、項光。

復敕：從佛一一毛孔盡一身分，一一事觀，皆令了了。如人執鏡自觀面像。若生垢惡不善心者，若有毀犯佛禁戒者，見像純黑，猶如炭人。

釋子眾中五百釋子，見佛色身猶如炭人。比丘眾中有一千人，見佛色身如赤土人。優婆塞眾中有十六人，見佛色身如黑象脚。優婆夷眾中二十四人，見佛身色猶如聚墨。如是，四眾各各異見。比丘尼眾中有比丘尼，見佛色身如白銀色。優婆夷眾中有優婆夷，見佛色身如藍染青色。如是，四眾觀佛色身，所見不同。

時，諸四眾聞佛是語，啼哭雨淚，合掌白佛：我等今者不見妙色。

五百釋子自拔頭髮，舉身投地，鼻中血出：佛生我家。佛初生時，眾人皆見

純黃金色。唯有我等，恒見佛身，猶如炭人，亦如羸瘦諸婆羅門。我等宿世，有何罪咎？惟願，佛曰！為我解說。

說是語已，自拔頭髮，號哭如前，婉轉自撲。

爾時，慈父出梵音聲，安慰諸釋及諸四眾：善男子等！如來佛日出現世間，正為除滅汝等罪咎。汝等還起，佛自知時，當為汝說。

爾時，大眾從地起已，遶佛三匝，禮世尊足。

五百釋子詣阿難所，敬禮阿難，白言：尊者！我之與汝，俱生釋家。汝獨聰明，總持佛語，猶如瀉水置於異器。我宿罪故，不見佛身，何況聞法！

說是語已，對阿難哭。

爾時，如來以梵音聲，告諸釋子，及敕大眾：諸兄弟等！勿復號哭。過去有

佛，名毘婆尸，如來。應供。正遍知，出現於世，教化眾生。度人周訖，般涅槃後，於像法中，有一長者，名日月德，有五百子，聰明多智，廣知世間一切文藝、星宿、曆數，無不貫練。其父長者信敬佛法，常為諸子說觀佛心，亦說甚深十二因緣。諸子聞已，疑惑不信，言「父老耄，為諸沙門之所誑惑。我諸書籍，都無是義。父今何處，求覓得此？」時，父長者愍諸子故，隱匿佛法，不為宣說。是時，諸子同遇重病，父觀諸子命不支久，到諸子所，一一兒前，泣淚合掌，語言：「汝等邪見，不信正法。今無常刀，割切汝身。汝心煩悶，為何所怙？有佛世尊，名毘婆尸，汝可稱之。」諸子聞已，敬其父故，稱「南無佛」。父復告言：「汝可稱法、汝可稱僧。」未及三稱，其子命終。以稱佛故，得生天上四天王處。天上壽盡，前邪見業，墮大地獄。地獄受苦，獄卒羅

剎以熱鐵叉刺壞其眼。受是苦時，憶父長者所教誨事。以念佛故，從地獄出，還生人中貧窮下賤。尸棄佛出，亦得值遇，但聞佛名，不覩佛形。毘舍佛出，亦聞佛名。拘樓孫佛出，亦聞其名。拘那含牟尼佛出，亦聞其名。迦葉佛出，亦聞其名。以聞六佛名因緣故，與我同生。雖生此處，我今身相端嚴乃爾，汝見我身如羸婆羅門。我身金色，閻浮檀金色不得比，汝見我色猶如炭人。

佛告諸釋子：汝今可稱過去佛名，為佛作禮。并稱汝父，禮過去佛。亦稱我名，敬禮於我。未來有佛，號曰彌勒，亦當敬禮。說汝先世邪見之罪，今佛現世沙門大眾一切雲集，汝當向諸大德眾僧發露悔過，隨順佛語，懺悔諸罪。佛法眾中，五體投地，如太山崩。向佛懺悔，心眼得開，見佛色身，端嚴微妙，如須彌山，光顯大海。

既見佛已，心大歡喜，白佛言：世尊！我今見佛三十二相、八十種好，身黃金色，一一相好，無量光明。

作是語已，尋時得道，成須陀洹。

白父王言：我等今者，欲於佛法出家學道。

父王告言：汝自白佛，佛聽汝不？

即往佛所，白言：世尊！我欲出家。

佛告釋子：善來！比丘！

鬚髮自落，即成沙門，身所著衣，化成法服，合掌禮佛，稱「南無佛」。未舉頭頃，成阿羅漢，三明六通，皆悉具足。

佛告父王：大王！今者，見諸釋子懺悔除罪成阿羅漢不？

父王白佛：唯然，已見。

佛告父王：是諸比丘，前世之時，以惡心故謗佛正法。但為父故，稱「南無佛」，生生常得聞諸佛名，乃至今世遭值我出世，見佛色身及見眾僧，聞佛所說懺悔眾罪。因懺悔故，諸障消除。諸障除故，成阿羅漢。

佛告阿難：我涅槃後，諸天世人，若稱我名，及稱「南無諸佛」，所獲福德無量無邊，況復繫念念諸佛者，而不滅除諸障礙耶？

佛告諸比丘：汝等所以見佛色身如赤土者。汝等前世，於燃燈佛末法之中出家學道，既出家已，於師和上起不淨心。然，其和上得阿羅漢道，知弟子心，告言：「法子！汝於和上及眾僧所，莫起疑意。若起疑意，於諸淨戒，永無得理。」時，諸比丘聞和上說，心生瞋恨。是時，和上知弟子心，漸漸自制，不

為其說。時，千弟子隨壽修短，各欲命終。和上猶存，而不涅槃。是時，和上到弟子所，而說是言：「汝諸比丘！初受法時疑師、疑戒，虛食信施。汝等今者，欲何所怙？」諸人聞是，心驚毛豎，白言：「和上！為我說法。」和上告曰：「汝今事切，不宜餘處教汝懺悔，汝今但當稱燃燈佛。如來。應供。正遍知，十號具足。」

爾時，諸比丘用和上語，咸皆稱言：「南無諸佛」。既稱佛已，尋即命終，乘善心故，得生天上，上生忉利，封受自然。畢天之壽，下生世間，坐前世罪（虛食信施），墮餓鬼中，烱銅灌咽，壽命長遠八萬四千歲。餓鬼罪畢，生畜生中。畜生罪畢，還生人中，貧窮下賤，以為莊嚴。既生人中，聞諸佛名。因於前世出家力故，信心內發。如前宿識，稱「南無佛」。以稱佛名因緣功德，

八千世中，常值佛世，而眼不覩諸佛色身，況復聞法！乃至今日，遭值我世，見我身體狀如赤土。

佛告諸比丘：汝等先世，於不疑處，橫生疑見。於可信處，橫生不信。以是罪故，不見諸佛、不聞正法。如我今者，現生王宮，我色真正色中最上，汝見赤土。

時，諸比丘聞佛此語，各自悔責，偏袒右肩，合掌向佛，而作是言：我於前世無量劫時，邪見疑師、虛受信施。此因緣故，墮地獄中。今雖得出，於無量世不見諸佛，但聞其名。今見世尊身赤土色，正長五尺。

是時，世尊披僧祇支，示胸德字。令比丘讀誦德字已，知佛功德智慧莊嚴，於卍字印中，說佛八萬四千諸功德行。

比丘見已，讚歎佛言：世尊甚奇特。但於胸字，說無量義，何況佛心所有功德！

說是語已，向佛懺悔。五體投地，如太山崩。悲號雨淚，對佛啼哭。

是時，世尊軟言安慰，令諸比丘心得歡喜。既歡喜已，猶如風吹重雲四散，顯發金顏三十二相，炳然覩見。既見佛已，心大歡喜，發菩提心。

佛告父王：此千比丘，慇懃求法，心無懈怠。於未來世，過算數劫，當得作佛，號南無光照，如來。應供。正遍知，十號具足。其作佛時，地純金色，七寶行樹、妙寶樓閣，以為莊嚴。其土眾生，皆是慚愧懺悔之徒。純是菩薩，發無上意。如是千佛次第出世，亦如賢劫千菩薩等次第成佛。

佛告大王：是諸比丘疑師、疑僧，獲大重罪。如向所說，稱「南無佛」所得

果報，今於我世現前受記，何況正念思惟佛者！

諸比丘尼見佛銀色，從座而起，偏袒右肩，為佛作禮，白言：世尊！如來今者自說身色，除諸眾生無量重罪。我等何故，從生出家乃至今日，見佛銀色、銀花、銀光，諸莊嚴具，悉皆是銀？我等云何不見如來金光赫艷，亦不見佛三十二相果報功德？

是時，如來聞諸尼語，即便微笑，有金色光從面門出，遶佛銀身足滿十匝。此光現時，諸尼見佛身紫金色三十二相，光明顯照，不可具說。諸尼見已，觀眉間白毫相右旋婉轉。見已歡喜，應時即成阿羅漢道，三明六通，具八解脫。

諸比丘尼自識宿命，曾於前世無量劫時，有佛出世亦名釋迦文。彼佛滅後，有諸弟子出家學道，僧中一人遊行教化，見五百童女在山澤中歡娛自樂。時，

彼比丘攝持威儀，安庠徐步，至諸女所，敷尼師檀在地而坐。諸女見已，各各歡喜，而作是言：「此空閑處，神仙所遊，忽然有此勝士比丘來在此坐。此必非凡，我宜供養。」各脫銀環，散比丘上：「比丘精進德行純備，後必成佛，願我見之時，如所散環。」

汝等貪著銀寶色故，生生常在白銀山中，受銀山神寶女之身。以禮沙門奉獻銀環，今遭我世，沐浴清化，成阿羅漢。

爾時，比丘則我身是。時，諸女者，汝身是也。汝於前世，供養沙門禮諸佛故，從是已來恒值諸佛。

佛告父王：佛，人中寶，祐利處多。若聞名者，禮拜供養，獲大重報，何況繫念思佛正顏！

優婆塞眾中見佛世尊如黑象脚者，即從坐起，偏袒右肩，合掌向佛，而作是言：我生此國，我國王子出家成佛，阿私陀仙見三十二相，即為我說：「地天太子成佛無疑。」我聞是語，歸依於佛，從是以來，恒隨佛後，受三歸依、受持八齋、受五戒法。然我罪咎，但聞佛聲，不見佛形。每見佛時，如黑象脚，阿酷之甚！

說是語已，舉手椎胸，號泣躄地。

是時，如來以梵音聲，猶如慈父安慰其子，告諸優婆塞言：法子！還坐。佛當為汝除斷疑悔，滅諸障礙。

說是語已，告諸優婆塞：汝等先世無量劫時，於閻浮提，各作國王，王領諸國，快得自在。有諸沙門，為利養故，為汝邪說，不順佛教。法說非法、非法

說法。汝等諸人，皆信用之。是人，以此諸惡教故，命終之後，墮阿鼻地獄。汝等隨順惡友教故，命終亦墮黑闇地獄。由前聞法善心力故，今遭我世，受持五戒。汝今應當佛、法、僧前，說汝邪見邪友所教，誠心懺悔。

諸優婆塞聞佛此語，稱南無佛、稱南無法、稱南無僧。說諸罪咎誠心懺悔。

時，佛即放眉間大人相光，照諸人心，心意開解，同時即得須陀洹道。諸優婆塞既得道已，見佛色身，端嚴微妙，世間無比。求佛出家，成阿羅漢。

優婆夷眾中見佛色身猶如聚墨者，即從坐起，合掌向佛，雨淚號哭，悲不能言，舉手拍頭，氣絕躄地。

是時，世尊見是事已，以梵音聲，安慰諸女，告言：諸女！何故愁憂乃至如是？

是時，諸女聞佛語聲，諸情根開，即起合掌，白世尊言：佛日出世，普照一切。眾人皆見，如月盛滿，唯我不見。佛說法時，諸人皆聞八種音聲，我獨不聞，如生聾人。尊者舍利弗為我授戒，乃聞其說有五戒法。每至佛會，見佛世尊，猶如聚墨。惟願，天尊！大慈悲故，除我罪咎，令我得見。

是時，世尊於師子座，還坐申脚，出千輻輪相以示諸女。

諸女但見眾妙蓮花從輪相出，花上化佛，猶如墨人。復更合掌，向佛作禮，白言：世尊！為佛弟子已經多時，唯有今日見妙蓮花，見諸化佛猶如墨塗。宿有何罪，眼闇乃爾？

佛告諸女：諦聽！諦聽！善思念之！如來今者，為汝分別。

過去久遠無量世時，時世有佛，號一寶蓋燈王，如來。應供。正遍知。

彼佛滅後，於像法中，有諸比丘，入村乞食，執鉢持錫，威儀不犯，至姪女家。

時，諸姪女取比丘鉢，盛滿鉢飯，戲比丘言：「汝釋種子！顏色可惡，猶如聚墨。身所著衣，狀如乞人。汝之可惡，天下無比。自言無欲，誰當念汝？」

爾時，比丘聞此語已，擲鉢空中，飛騰而去。

諸女見已，慚愧懺悔，而作是言：「我等今者，施沙門食，願於來世，身得自在，猶如沙門。」

佛告諸女：爾時，諸女飯阿羅漢者，今汝等是。汝以善心施比丘食，二千劫中，常不飢渴。坐前惡罵姪欲因緣，六十小劫墮黑闇獄。由前發願善心不滅，今遭我世，得受五戒。乃是供養阿羅漢故，見舍利弗，不見我身。

爾時，世尊說是語已，即於臍中出大蓮花。其大蓮花，化成光臺。其光臺中有百千無數聲聞比丘，如舍利弗、目犍連等，於佛光臺神通自在作十八變。

諸女見已，心生歡喜，應時即以智慧火燒二十億洞然之結，得須陀洹道。諸優婆夷既得道已，見佛色身，端嚴微妙，唯不見佛白毫相光。

佛告父王：戲弄惡口，乃至得道，所見不明。是故，諸人當勤護口，專心正意觀佛三昧。以見佛故，獲無量福。

是時，世尊欲令大眾見佛色身，了了分明。佛即化精舍如白玉山，高妙大小猶如須彌。百千龕窟，於眾龕窟，影現諸像，與佛無異。

時，佛前地有大蓮花，其花千葉，葉有千光，光千化佛。佛千弟子，以為侍者。

佛告阿難：佛滅度後，佛諸弟子，若能割捐諸事，捐棄諸惡，繫念思惟佛常光者。佛不現在，亦名見佛。以見佛故，一切諸惡，皆得消除。隨其所願，於未來世，當成三種菩提之道。

佛告阿難：如此觀者，是名正觀。若異觀者，名為邪觀。

佛告父王：云何觀如來放常光相？

如來今者，為未來世諸凡夫人，當現少光。彼諸凡夫當學是觀，如是觀者，亦如今日見佛光相，無有異也。

爾時，世尊放肉髻光，其光千色，色作八萬四千支。一一支中，八萬四千諸妙化佛。其化佛身，身量無邊。化佛頂上，亦放此光。光光相次，乃至上方無量世界。於上方界有化菩薩，如雲微塵從空而下，圍遶諸佛。此光現時，十方

微塵世界諸佛亦悉得見，此光直照諸佛頂上。諸佛放光，其光亦照釋迦文頂。

佛告阿難：眾生欲觀釋迦文佛肉髻光明，當作是觀。作是觀者，若心不利，夢中得見。雖是心想，能除無量百千重罪。如是觀者，現身必見諸大菩薩。見菩薩故，聞其說法。聞說法故，得陀羅尼。其陀羅尼，名〈旋憶持〉。

如是觀者，名為正觀。若異觀者，名為邪觀。

佛告父王：云何名為觀於如來眉間光明？

如來今者，為此後世諸眾生故，當少現於白毫相光。

作是語時，時佛眉間即放白毫大人相光。其光分為八萬四千支，亦八萬四千萬色，遍照十方無量世界。一一光色，化一金山。一一金山，無量龕窟。一一窟中，有一化佛，結跏趺坐入深禪定，聲聞菩薩百千大眾以為眷屬。時，佛窟中

有諸化佛，皆放白毫大人相光，亦照十方無量世界，皆如金色。金色地上，有金蓮花。金蓮花上，皆有化佛，亦皆同號名釋迦文。諸佛眉間，亦放此光。其光遍照十方世界，猶如百千億須彌山王共合一處。諸須彌山，映現諸佛。佛身高顯，與山正等。是等化佛眉間光明，遶諸化佛，滿七匝已，還入釋迦牟尼眉間。此光入時，佛身毛孔一毛孔中有一化像，一一化像身毛孔中，化成八萬四千妙像，皆是三千大千世界，一切眾生所希見事。是名如來八十好中，一好光明。如是八十隨形好光，說不可盡。

如來少現白毫光明，父王所將眾中有八千人，遠塵離垢，得法眼淨。

佛告阿難：如來白毫相光，諸修多羅中佛已廣說。如是妙光，唯佛佛見，十地菩薩見不明了。是故，此中少分而說。說少分者，為凡夫人。

佛滅度後，如是觀者，名為正觀。若異觀者，名為邪觀。

此光除罪如向所說，唯見光者，心得了了見百億佛。見白毛者，是心想見。

云何觀如來額廣平正相、如來面上三輪相、髮際相？

如是眾相，一一相中，皆出金光。其金色光，化成金床。一一床上，有千菩薩，拘樓孫馱為始，下逮樓至，是千菩薩，皆放光明，坐金床上。如是百億千萬菩薩，百億千萬金床。其金床上，皆有寶帳。一一寶帳，有千光明。一一光明，成千寶幢。一一幢上，千萬寶蓋。眾寶蓋下，有諸寶幡。諸寶幡中，無量化佛。是諸化佛，皆說苦、空、無常、無我。說此偈時，一切化佛亦皆說此。釋迦文佛，方身丈六，在行者前，舉其右手，而作是言：「善哉！善哉！善男子！汝今能觀諸佛相好，我等先世行菩薩道，與汝無異。汝今能觀諸佛境界，

此境界者，但是汝心妄想所生。」作是語已，即滅不現。額上諸光復更明顯，其光流出有百千億。一一光明，照寶床上諸菩薩面。彼菩薩面，亦出光明，照釋迦文。此相現時，行者真觀佛面，了了無疑。

佛告阿難：佛滅度後，佛諸弟子，能如是觀真見佛面，與我住世等無有異。作此觀者，除却一億劫生死之罪。後身生處，面見諸佛，生諸佛家，諸佛菩薩以為眷屬。

如是觀者，名為正觀。若異觀者，名為邪觀。

云何觀如來鼻出光明？

鼻出光明，分為四支，上入佛眼、佛眉、佛睫。出大光明，其光鬖鬖，如龍象形，遍照十方無量世界，入諸佛眼。此相現時，十方大明。是時，行者見十

方界地及虛空，諸佛滿中。一一佛眼、眉睫、鼻孔放大光明，亦復如是。佛眼兩光其明遍照入諸佛眼，於虛空中，化成光臺。其光臺上，純是光雲。光雲青白世界無比。於青光中，有青色化佛。於白光中，有白色化佛。此青白色佛，左右分明，百寶色光以為其雲。如神通人，飛騰雲間。身諸毛孔，猶如花樹。一一花樹，上至梵世。諸花葉間，有百千億聲聞比丘。一一比丘，著千納衣，千納千色。一一色中，百千化佛，皆純金色。是諸比丘踊身雲中，亦隨佛後，如大龍象行，其子隨從。

佛告阿難：佛滅度後，佛諸弟子，若能正心觀佛眼光，即於現世重障得除。於當來世，常得觀佛，不離佛日。雖處母胎，常入三昧。在母胎時，見十方佛皆放眼光來照其身，胎殼中時，常受妙法，況出於外！

如是觀者，名為正觀。若異觀者，名為邪觀。

鼻出二光，其光遍照十方世界。其一一光，化成大水。其水住空流入諸光，此水入時，一切光明，唯更明顯。一一光間，出頗梨山。頗梨山間生七寶花，其花臺上踊出眾水，其水金色猶如金幢。其金幢內，有百千萬無量化佛。一一化佛，方身丈六，身毛孔中八萬四千上妙寶色。諸寶色中，復放光明。其光微妙，有恒沙色。

佛告阿難：佛滅度後，佛諸弟子，作是觀者，除却千劫極重惡業。後世生處，心無所著，不處胞胎，恒常化生。既化生已，身光具足，不離諸佛。

如是觀者，名為正觀。若異觀者，名為邪觀。

云何觀如來面門光明？

其光白色，猶如寶山，內外俱淨。於寶山內，無量化佛真金精色。時，諸化佛面門出光，其光五色，遍照十方，入諸佛面門。此相現時，行者行住坐臥，恒聞如來說四念處（身、受、心、法），并說境界，令行者聞。聞已憶持，閉目思惟。此光力故，即得四念處法。時，十方佛及釋迦文，於三昧中，各申右手，摩行者頂，而作是言：「善哉！善哉！善男子！汝能真實行念佛定。」

如是觀者，名為正觀。若異觀者，名為邪觀。

云何觀如來耳？

耳出五光，其光千色，色千化佛，佛放千光。如是光明，遍照十方無量世界化成一花，其花甚大，量不可知，除佛心力，無能知者。是蓮花中，百千萬億無量佛刹皆於中現，百千萬億諸大菩薩坐一蓮花鬚，花鬚不大，菩薩不小，亦

不相妨。如是菩薩耳普垂睡，如金蓮花懸處日光，亦於耳中旋生五光。此相現時，佛耳中毛，如帝釋樹，眾所喜見。

佛告阿難：佛滅度後，佛諸弟子，作是觀者，常聞百億千佛及諸菩薩說眾妙法，不壞耳根。

如是觀者，名為正觀。若異觀者，名為邪觀。

云何觀如來頸相？

頸相出二光，其光萬色，遍照十方一切世界。有諸眾生，善根熟者，遇斯光明，悟十二緣，成辟支佛，此光照諸辟支佛頸。此相現時，行者遍見十方一切諸辟支佛，擲鉢虛空，作十八變。諸辟支佛，一一足下，皆有文字，其字演說十二因緣（無明緣行、行緣識、識緣名色、名色緣六入、六入緣觸、觸緣受、

受緣愛、愛緣取、取緣有、有緣生、生緣老死憂悲苦惱。）。一字一光，一光十二音。一音說苦、空、無常、無我。一音演說十二因緣。如是辟支佛足下光中皆有是字，逆順往復凡十二遍，是名生死之根本也。此光照諸辟支佛已，還入佛頸。作此觀者，不生人中，生兜率天，值遇一生補處菩薩為說妙法。既聞法已，身心歡喜，學諸菩薩觀緣起法。

如是觀者，名為正觀。若異觀者，名為邪觀。

云何觀如來缺瓮骨滿相？

滿相光明，遍照十方，作虎魄色。若有眾生遇此光者，自然興發聲聞道意。是諸聲聞，見此光明分為十支，一支千色，十千光明，光有化佛。一一化佛，有四比丘以為侍者。一一比丘，皆說苦、空、無常、無我。分別四諦，說八人

義、說四果相、說三三昧，令彼眾生於此法中求出家法，出家不久成阿羅漢。如是光明，遍照十方諸阿羅漢頂。照頂之時，如人執瓶，灌藥入頂，其狀色貌猶如醍醐。從頂入已，貫徹表裏。爾時行者身心安隱，其心恬然，無有惡相，不見諸使及結相貌。如是，霍然成阿羅漢。此光復變作金色蓋，其數無量，一一蓋中，百千七佛。一一七佛，有四比丘以為侍者。一一比丘，入四大定。四大定中，遍現一切結使相貌，八萬戶虫婉轉而出，小虫種類亦皆隨從。此相現時，火大先起。火大起者，初如芥子，從毛孔出，後漸漸長，遍燒諸身，身如火聚。諸虫鳴吼，如師子聲。此聲出時，行者心怖，迷悶躄地。出定見身，如野火行，傍樹為焦。此相現時，復當起心，作一藥想。先作身想，身想既成，開頂令空，作梵王想、作帝釋想、作諸天手持寶瓶想、持藥灌想。藥入頂時，

遍入四體及諸脈中，見脈及身如瑠璃筒，但見諸虫如萎死花。

爾時，諸脈更相流注，唯有眾水。水至之處，火則隨滅。是時，行者節節水出，如人仰射，水至梵際。水水相次，至於梵天。見身中水，如四大海。但見諸虫，頭萎摧茹，手折足戾，唯心生火，分為十支。火入眾水，不相消滅。水光上衝，火光隨逐。水火二光，皆從心出，互相交錯，上極三界頂，下至阿鼻獄，盡一世界際，純見水火流。東西南北，火亦隨走。

爾時，心端自然生一黑毛。於其毛端，出大黑風。其風四色，隨心根起。如旋嵐風，狀如烟焰，其風遍吹一切諸水，其水波動，沫聚成積，火亦入中，得火力故，沫堅如冰。復有風來，吹諸塵穢，九十八種惡不淨物，持置冰上。冰力弱故，隨不淨敗，著處即解。此冰解時，八人執刀，斫冰段取，各持而去。

塵土全污，心悶而臥。風火水等，合聚一處。火力大故，燒壞眾物。有四惡蛇含一寶珠，從火焰出，凌虛飛逝。有六大龍，迎四小螭，吞吸而走。龍頂生樹至無色界。有一小草細若秋毫，色正金色，從樹稽生，下入樹根。從樹根生，上入樹莖。從樹莖生，散入枝葉。其花白色，亦有紅赤。其果欲熟猶作四色，至八月半，純黃金色。如此光明，照諸聲聞，變化無量百千境界。

如是觀者，名為正觀。若異觀者，名為邪觀。

若有比丘，入此定時，身如芭蕉，無有堅實。出定之時，身體支節，悉皆疼痛。若不服藥，發狂而死。應當隨時，眾藥消息。作是觀者，除無數劫生死之罪，如大水流，不久當得阿羅漢道。

佛告阿難：汝持佛語，真實莫忘，為諸比丘當廣宣說。

說是語時，五百比丘得四大定，同時皆得四沙門果。

云何觀如來胸德字、卍字相？

腋下摩尼珠皆放光明，其光紅紫，中有金花。其花開敷，化為無量百千萬億無數眾花。一一花上，有無量佛。是諸化佛各有千光，光一化佛，其光五色。若有眾生遇此光明，狂者得正、亂者得定、病者得愈、貧窮者自然得寶、盲者得視、聾者得聽、啞者能言、癱跛疥癩皆得除愈，遍入十方諸佛頂上。入已，諸佛胸中有百千光，從卍万字生。一一光中，歌百千偈，演說檀波羅蜜。如是眾光，演說六波羅蜜，其偈無量，行者正坐，聞無量佛皆說是法。一一化佛，遣一化人，端嚴微妙，狀如彌勒，安慰行者，而作是言：「善哉！善哉！善男子！汝繫念故，見諸佛光。諸佛光中，說無相施、說無相戒、說無相忍、說無

相精進、說無相定、說無相慧。汝聞此法，慎勿驚怖。過去諸佛繫念思惟，亦聞是法、亦解是相。解是相已，不畏生死，處大地獄阿鼻猛火盛不能燒，雖處地獄，如遊天宮。是故，卍字名實相印。諸佛如來無量無邊阿僧祇劫，學得此印。得此印故，不畏生死、不染五欲。」

佛告阿難：佛滅度後，佛諸弟子見佛胸相光者，除却十二億劫生死之罪。若不能見胸相分明者，入塔觀之。

如是觀者，名為正觀。若異觀者，名為邪觀。

云何觀如來臂臑纖圓如象王鼻相？

手十指合縵掌千輻輪，各各皆放百千光明。一一光明，分為千支純作紅色。如是眾光，遍照十方無量世界，照世界已，化成金水。金水之中，有一妙水如

水精色。餓鬼見者，除熱清涼。畜生見者，自識宿命。狂象見者，為師子王。師子見之，為金翅鳥。諸龍見之，為金翅鳥王。是諸畜生，各見所尊，心生恐怖，合掌恭敬，以恭敬故，命終生天。眾人見者，如梵天王，或如日月星辰。見已歡喜，命終生兜率天。行者見之，心眼即開，時十方界，滿中化佛。一一化佛手，出光明入行者眼，閉目開目，恒見諸佛。自觀身相，如妙寶瓶中有不淨。如是見者，雖未得通，遍至十方，歷侍諸佛。見一一佛，出手光明，亦復如是。

如是觀者，名為正觀。若異觀者，名為邪觀。

云何觀如來臍相？

如來臍中有萬億寶花。一一寶花，萬億那由他葉。一一葉，萬億那由他色。

一一色，萬億那由他光。此相現時，一切大眾見佛心相，如來心者如紅蓮花，金花映蔽，妙紫金光以為間錯，妙琉璃筒懸在佛胸，見佛身內萬億化佛。是諸化佛，遊佛心間，佛臍出光，其光熨然如須彌山。眾山中間，有無量寶山，如須彌山。此眾花上，皆有化佛，嚴顯可觀，如須彌山。其光千種，有十千色，分為十億支：億億支照下方，億億支照上方，億億支照東方，億億支照南方，億億支照西方，億億支照北方，億億支照東南方，億億支照西南方，億億支照西北方，億億支照東北方。如是十方各有諸花，花極小者猶如百億須彌山大，須彌上有百億萬諸大菩薩，身極小者如須彌山。諸化菩薩臍中各生一大蓮花，其諸蓮花遍覆三千大千世界，一一花間有金色光，其光猶如閻浮檀金。一一金光，化微塵數釋迦牟尼。一一釋迦臍中光明亦復如是。如是眾光合成光臺，其

眾光臺，亦有無量微塵恒沙諸大化佛，佛佛相次，放臍光明，其光大盛，直照上方無量世界，復過是界。如是眾界，數如三千大千世界無量微塵，是世界中皆有琉璃頗梨億寶以為佛窟。是眾窟中，各有萬億無量諸佛，諸佛臍中各各皆生一大蓮花，與前無異。是諸光明，照諸一切十地菩薩，是諸菩薩遇斯光已，即入微妙首楞嚴門，復得入於金剛譬定。諸天遇者，深發無上正真道意，心眼開明，見諸佛相。如此光明照菩薩已，令諸菩薩身諸毛孔，一毛孔中出阿僧祇諸供養雲及眾供具。蓋極小者，覆閻浮提。如是眾多雜寶供具不可悉說，此諸供具，從首楞嚴海生。

佛告阿難：若善男子善女人，作是思惟時，如是憶想者、夢見此事者，生生之處，恒常值遇普賢、文殊。是法王子，為眾行者夢中，恒說過去未來三世佛

法。說《首楞嚴三昧》、《般舟三昧》，亦說《觀佛三昧》，以為瓔珞。覺已憶持，無所忘失。此人現世功德，天女以為給使，除却十萬億劫生死之罪。

如是觀者，名為正觀。若異觀者，名為邪觀。

億億光照下方，令下方地如閻浮提水色，於眾水中有恒沙寶樓。眾寶樓下，有一寶城，如乾闥婆城。於寶樓上，有大寶樹，其樹枝葉，一切火起。其火光焰，上下俱燒，燒此眾水，化成琉璃。琉璃地上，復生諸樹，樹有四龍，其龍頂上有如意珠，其珠光明遍照龍身，令龍及樹，純黃金色。其龍奮迅，龍諸毛孔出金色光，其光直照下方無量世界，復過下方。復照無量世界，令下方地皆作金色。金色地上有金剛花，金剛花上有金天女。一一天女，百千天女以為眷屬。是諸天女，皆讚慈心三昧海。從下方出，直至上方迦毘羅城，其聲如雷，

讚說慈心。說是語時，諸龍毛端出諸寶雲，一一雲中有恒沙佛剎。一一剎中塵數化佛，一一化佛出此光明。此光現時，下方世界有百萬金山，於其巖間百億寶窟，如雲踊起，是眾窟中純諸白佛，白妙菩薩及聲聞眾以為侍者，金精寶光在佛左右，猶如斷山眾寶映錯。有妙寶蓋如須彌山無量寶成。一一寶間，百億光明，迴旋婉轉。於眾光中，有百億師子座。一一師子座上，有百億那由他菩薩大眾結跏趺坐。時，彼菩薩身毛孔中有阿僧祇光，一一光中有一化佛，其身修圓如須彌山。是諸化佛，以百千偈，讚說不殺。慈為根本、慈是妙藥，除生死患。慈為淨目，導諸天人。是諸化佛讚歎慈已，各作變化為琉璃山。於其山內百億菩薩，一一菩薩有萬梵王以為侍者，到行者前，於寶山內，異口同音皆說是法，告言：「善男子！汝於念佛海，應修慈心。諸佛菩薩以慈心故得佛大

慈，汝今應當修不殺戒，行大慈悲。」爾時，亦有天龍八部一切眾生，遇此光者、聞是語者，命終之後，必生梵世。

佛告阿難：汝持此語，慎勿忘失，告諸比丘令行是事。

佛滅度後，佛諸弟子，若聞是語，思是法者、有正念者、有正受者、三昧不動者、心不懈退者、發大乘者，當知是人，恒於夢中見此光明，亦聞化佛說慈心法。覺已憶持，深解義趣，思其義故，即得慈定。

如是觀者，名為正觀。若異觀者，名為邪觀。

佛滅度後，佛諸弟子，思是法者、持是法者，當知是人，其心清淨，如諸佛心，除却億劫生死之罪，常生梵世，值遇諸佛，請轉法輪。既聞法已，發菩提心，於未來世，必成佛道。

億億光照東方，乃至東方無量世界，令東方地，白如雪山。於眾山上，有白寶雲。其白寶雲，狀如寶臺。眾寶羅網，寶鈴萬億。眾鈴網間，有一億白光，是諸白光化成金臺，一金臺上有四化佛。一一化佛，四億菩薩以為侍者，佛與菩薩皆說慈法讚歎不殺，凡千億偈。

如是觀者，名為正觀。若異觀者，名為邪觀。

佛告阿難：佛滅度後，佛諸弟子，如是觀者，除半億劫生死之罪。

億億光照南方，令南方地皆作紅色。此紅色光，乃至南方無量世界，變成白雲，紅白分明。於眾雲間，有諸化佛，白真珠色，毘琉璃光。上妙金花，以為佛座。於金花上百億菩薩，皆黃金色。百億寶光，映蔽白雲。一一光中，五百化佛。是諸化佛，異口同音，亦讚不殺及大慈悲。

如是觀者，名為正觀。若異觀者，名為邪觀。

佛告阿難：佛滅度後，佛諸弟子，聞是法者、思是法者、觀是法者，此人恒於夢中見釋迦文放臍光明，持以照之。此光明相，如向所說。其人生處，不處胞胎，恒生淨國。若生天上，自然化生。

億億光照西方，乃至西方無量世界。其光雜色，如月如星。眾星月間，有七寶珠，一珠出水、一珠出火、一珠生樹，其樹七寶金剛為果、一珠生花。於月光中，有梵宮殿，梵王眷屬及梵眾寶，皆悉具足。其星光中，有摩醯首羅宮及其眷屬。——天宮，百萬億梵王。——梵王，無量無數諸天大眾以為眷屬，摩醯首羅等數不可知。是諸寶珠，出琉璃光。琉璃光內，有真金像。其真金像，坐白寶座，項佩赤真珠光。赤真珠光中，有綠真珠化佛。是諸化佛及諸天眾，

異口同音讚說不殺，勸進行者行大慈悲。

佛告阿難：如是觀者，名為正觀。若異觀者，名為邪觀。

佛滅度後，佛諸弟子，有憶想者、有思惟者、如此觀者，常於夢中夢見諸佛為說慈法，除却七億劫生死之罪。

億億光照北方，乃至北方無量世界。令北方地，皆珊瑚色，虎魄、玫瑰、真珠、馬瑙、頗梨等寶，以為間錯。一一寶中，有一億光。一一光化作一師子。師子背上，有七寶蓋，其蓋高妙，如須彌山，琉璃為竿，雜寶綵花以為莊嚴，一一花上有百億化佛。一一佛面，如閻浮檀金色、髮紺琉璃色、身百億寶色、臂紅真珠色、爪真金色、手中相白蓮花色、鹿王蹲優曇花色、足下相毘楞摩尼色。從足下放五色光，上至髮際。身諸毛孔，皆有化光。一毛孔中，有一億菩

薩。一一菩薩，臍有一大蓮花。其花高大，如須彌山，百寶所成。花上有佛，其佛高大，與花正等，亦出臍光。此相現時，眾寶師子奮迅若驚。師子眾毛，一一毛端，有百億佛刹。一一佛刹，無量百億眾寶蓮花以為莊嚴。其蓮花上，亦有百千大菩薩眾。是諸菩薩，亦出臍相如上菩薩。如是菩薩，眾色光明合成一山，其山高顯，如真金臺。其臺四角，有四梵幢。幢端皆有四億佛刹。一一刹中有百千塔，塔極小者，從閻浮提至於梵世，無數眾妙一切寶像以為莊嚴。是諸寶塔及化菩薩，皆共讚歎喜捨二法。若有眾生遇斯光者，得大智慧如舍利弗，總持不失猶如阿難。

佛告阿難：佛滅度後，佛諸弟子，欲見是相者，當發慈心，修不殺戒，普為十方一切眾生。行是行者，雖不坐禪，恒於夢中得見眾色如向所說。

佛告阿難：持是語者，即持佛心。作是觀者，能觀佛心。諸佛如來，以大慈悲而以為心，戒、定、慧、解脫、解脫知見，而以為身。十力、四無所畏、十八不共法、大悲三念處，而自莊嚴。如是觀者，名觀佛心。

佛告阿難：此臍相中，略而解之。佛心境界，後自當說。

如是觀者，名為正觀。若異觀者，名為邪觀。

佛滅度後，佛諸弟子，思是法者、持是法者、觀是法者，此人現世惡業罪障皆悉清淨。

億億光照東南方，乃至東南方無量世界，化成金輪。一一金輪，七寶隨從。一一金輪，百億轉輪聖王。一一轉輪聖王，千子四兵，皆悉具足。其神珠寶，出大光明，如烟如雲。一一光中有大蓮花，花花相合。合花之中，出大日光。

一一日光，有金色象，菩薩化乘。乘象之時，萬億瑞應不可宣說。諸菩薩光，合成一佛。其佛金色，身量無邊，亦出臍相。臍相光明，亦如上說。諸光中人皆讚五戒、說十善法，諸轉輪王手執金輪宣十善法。

佛告阿難：如是觀者，名為正觀。若異觀者，名為邪觀。

佛滅度後，佛諸弟子，憶想是者、思惟是者、觀是法者，除却二十萬億劫生死之罪，常生天上聞十善教。

億億光照西南方，乃至西南方無量世界。至彼界已，其光如雨，似雜色珠。一一珠中，出百億光。一一光，合成寶臺。一一臺角，有十二須彌山。一一須彌山，龕室無量。一一龕中，有無量化佛。一一化佛，有無量菩薩以為眷屬。是眾化佛及化菩薩，亦皆讚歎說十善法。

如是觀者，名為正觀。若異觀者，名為邪觀。

佛告阿難：佛滅度後，佛諸弟子，憶想是者、思惟是者、觀是法者，除十二億劫生死之罪。若欲往生他方淨刹，隨意無礙。

億億光照西北方，乃至西北方無量世界。其光玉色，頗梨紅紫，更相映飾。一一光中，百億寶車。白車白馬、紫車紫馬、紅車紅馬、諸馬毛鬣皆真金色。如是車上，有七寶軒。軒上皆悉有蓋，其蓋十層。於軒蓋中，有千光明，寶鬘垂下，光明隨流，迴入車中，化成化佛。佛身高顯，萬億由旬。一一佛臍中，出無數光，其光遍照無量化佛。遇此光者，永脫三塗，無三惡患。此光迴旋，正立空中，如雲上昇。一一雲間，百千化佛。一一化佛，百億弟子如大迦葉，勤修十二頭陀苦行，心無所著，厭離世間。

如是觀者，名為正觀。若異觀者，名為邪觀。

佛告阿難：佛滅度後，佛諸弟子，想是法者、思惟是法者、觀是法者，當知此人常見諸佛，速成大乘，除却十億劫生死之罪。

億億光照東北方，乃至東北方無量世界。其光清淨，無諸濁穢。如頗梨鏡，內外俱現。於彼光中，見十方佛，皆出臍相。一一佛臍，光明遍照十方無量諸佛刹土。一一佛刹，有微塵數化佛。一一化佛，微塵數菩薩以為眷屬。如是菩薩，臍相光明，猶如金柱。其金柱端，萬億天衣、寶箱寶篋，譬如雲臺，從空而下。一一箱篋，萬億光明。一億光明，合成一佛，一佛身中，無量微塵無數化光。於諸光端，有諸化佛，猶如芥子。此小佛身，亦出臍相，如上所說。此臍光明，遍照十方，入諸佛臍。從諸佛臍出，入諸菩薩胸。從諸菩薩胸出，入

諸聲聞頂。從諸聲聞頂出，譬如大雲，無量金色眾寶間錯，入佛足下。入足下已，足下千輻輪相中，出大光明，其光如花，花花相次，遶佛億匝。從赤銅爪足趺毛孔，乃至頂髻，佛身諸毛如蓮花敷。一毛孔中，有八萬四千蓮花。一蓮花上，八萬四千化佛。一一化佛，八萬四千諸大菩薩以為眷屬。一一菩薩，眉間眾光，出妙音聲，讚佛色身。

釋迦文佛現此光已，告大王言：如來色身，分別色相，除佛心已，其餘境界如向所現。

佛說是已。爾時，父王即從坐起，正衣服，為佛作禮，遶佛七匝，踟跪，合掌白佛言：世尊！如來身色一切覩見。唯佛心內，有何境界、有何相貌、修行何事、佛心所念為是何物、佛心光明何所像類？

是時，如來即便微笑。其舌相光，如上所說，遶佛七匝，從佛頂入。

爾時，如來入解脫相三昧，令父王見。如琉璃窟，成真金像。真金像內，於佛胸中如琉璃筒，從佛咽喉下，見如來心如紅蓮花，金花映飾，紅花金光，不開不合，團圓如心。八萬四千脈，一一脈，如天畫師所畫之脈。一一畫中，八萬四千光明。一一光明，八萬四千種色。一一色中，無量微塵數化佛。一一化佛，坐金剛臺。其金剛臺，放金色光明，其光無數，不可具說。一一光中，亦有化佛，數如上說。是諸化佛，皆出廣長舌相，上至髮際。一一佛舌，有一億光。其光合聚，為十千段。一一光上，有百億化佛，結加趺坐，入普現色身三昧。十方諸佛微妙色身，入此三昧海中。

當佛入此三昧時，迦毘羅城及尼拘樓陀精舍，并閻浮提，如大寶花。於花臺

上，有頗梨幢。頗梨幢端，有頗梨鏡，十方無量諸佛淨國皆於中現。

時會大眾，覩見諸佛。或見佛身，量同虛空，純黃金色。或見佛身，如須彌山，四寶所成。或見佛身，毘琉璃色，長十丈者。或見佛身，作白銀色，長百千丈。見釋迦文身，故長丈六，或見七尺，或見三尺，或見遍至梵世；或見七寸，見入鉢支，諸鬼神等見如微塵、見如芥子、見如金粟。諸鬼見已，小身鬼等皆大歡喜。

④ 觀佛心品

爾時，佛心如紅蓮花。蓮花葉間有八萬四千諸白色光，其光遍照五道眾生。此光出時，受苦眾生皆悉出現。

所謂苦者：阿鼻地獄、十八小地獄、十八寒地獄、十八黑闇地獄、十八小熱

地獄、十八刀輪地獄、十八劍輪地獄、十八火車地獄、十八沸屎地獄、十八鑊湯地獄、十八灰河地獄、五百億劍林地獄、五百億刺林地獄、五百億銅柱地獄、五百億鐵機地獄、五百億鐵網地獄、十八鐵窟地獄、十八鐵丸地獄、十八尖石地獄、十八飲銅地獄。如是等眾多地獄。

佛告阿難：云何名阿鼻地獄？阿，言無；鼻，言遮。阿言，無；鼻，言救。阿，言無間；鼻，言無動。阿，言極熱；鼻，言極惱；阿，言不閑；鼻，言不住。不閑不住，名阿鼻地獄。阿，言大火；鼻，言猛熱。猛火入心，名阿鼻地獄。

佛告阿難：阿鼻地獄，縱廣正等八千由旬。七重鐵城，七層鐵網，下十八鬲，周匝七重，皆是刀林。七重城內，復有劍林。下十八鬲，鬲八萬四千重。

於其四角，有四大銅狗。其身廣長四十由旬，眼如掣電，牙如劍樹，齒如刀山，舌如鐵刺，一切身毛皆出猛火，其烟臭惡，世間臭物無以可譬。

有十八獄卒，頭羅剎頭，口夜叉口。六十四眼，眼散迸鐵丸，如十里車。狗牙上出，高四由旬。牙頭火流，燒前鐵車。令鐵車輪，一一輪輞化為一億火，刀鋒、刃、劍、戟，皆從火出。如是流火，燒阿鼻城，令阿鼻城，赤如融銅。獄卒頭上，有八牛頭。一一牛頭，有十八角。一一角頭，皆出火聚。火聚復化成十八輞，火輞復變作火刀輪，如車輪許，輪輪相次，在火焰間滿阿鼻城。

銅狗張口，吐舌在地，舌如鐵刺。舌出之時，化無量舌，滿阿鼻地。七重城內，有七鐵幢，幢頭火踊，如沸踊泉，其鐵流迸滿阿鼻城。

阿鼻四門，於門闌上有八十釜，沸銅踊出，從門漫流，滿阿鼻城。

一一鬲間，有八萬四千鐵蟒大蛇，吐毒吐火，身滿城內。其蛇哮吼，如天震雷，雨大鐵丸滿阿鼻城。

此城苦事，八萬億千。苦中苦者，集在此城。五百億蟲，蟲八萬四千嘴，嘴頭火流如雨而下，滿阿鼻城。此蟲下時，阿鼻猛火，其焰大熾。赤光火焰，照八萬四千由旬。從阿鼻地獄，上衝大海，沃燋山下。大海水滴，如車軸許，成大鐵尖滿阿鼻城。

佛告阿難：若有眾生，殺父害母，罵辱六親。作是罪者，命終之時，銅狗張口，化十八車，狀如金車，寶蓋在上，一切火焰，化為玉女。罪人遙見，心生歡喜：「我欲往中，我欲往中。」風刀解時，寒急失聲：「寧得好火，在車上坐，然火自爆。」作是念已，即便命終。揮霍之間，已坐金車。顧瞻玉女，皆

捉鐵斧，斬截其身。身下火起，如旋火輪。譬如壯士屈伸臂頃，直落阿鼻大地獄中。從於上鬲如旋火輪，至下鬲際，身遍鬲內。銅狗大吼，嚙骨咬髓。獄卒羅刹，捉大鐵叉，叉頭令起，遍體火焰滿阿鼻城。鐵網雨刀，從毛孔入。化閻羅王大聲告敕：「癡人獄種！汝在世時，不孝父母，邪慢無道。汝今生處，名阿鼻地獄。汝不知恩，無有慚愧，受此苦惱，為樂不耶！」作是語已，即滅不現。

爾時，獄卒復驅罪人，從於下鬲乃至上鬲，經歷八萬四千鬲中，捽身而過，至鐵網際，一日一夜爾乃周遍。阿鼻地獄一日一夜，此閻浮提日月歲數六十小劫。如是壽命，盡一大劫。五逆罪人，無慚無愧，造作五逆，五逆罪故，臨命終時，十八風刀如鐵火車，解截其身。以熱逼故，便作是言：「得好色花，清

涼大樹，於下遊戲，不亦樂乎！」作此念時，阿鼻地獄八萬四千諸惡劍林，化作寶樹，花果茂盛，行列在前。大熱火焰，化為蓮花，在彼樹下。罪人見已：「我所願者，今已得果。」作是語時，疾於暴雨坐蓮花上，坐已須臾，鐵嘴諸虫從火花起，穿骨入髓，徹心穿腦，攀樹而上。一切劍枝，削肉徹骨。無量刀杖，當上而下。火車爐炭十八苦事，一時來迎。此相現時，陷墜地下，從下鬲上。身如花敷，遍滿下鬲。從下鬲起，火焰猛熾，至於上鬲。至上鬲已，身滿其中，熱惱急故，張眼吐舌。此人罪故，萬億融銅、百千刀輪，從空中下，頭入足出。一切苦事，過於上說，百千萬倍。具五逆者，其人受罪，足滿五劫。

復有眾生，犯四重禁，虛食信施；誹謗邪見，不識因果，斷學般若，毀十方佛，偷僧祇物；姪洸無道，逼掠淨戒諸比丘尼、姊妹親戚，不知慚愧。毀辱所

親，造眾惡事。此人罪報，臨命終時，風刀解身，偃臥不定，如被楚撻。其心荒越，發狂癡想，見己室宅男女大小，一切皆是不淨之物，屎尿臭處，盈流于外。

爾時，罪人即作是語：「云何此處無好城郭及好山林使吾遊戲，乃處如此不淨物間？」作是語已。獄卒羅刹，以大鐵叉，擎阿鼻獄及諸刀林，化作寶樹及清涼池，火焰化作金葉蓮花，諸鐵嘴虫化為鳧鴈，地獄痛聲如詠歌音。罪人聞已：「如此好處，吾當遊中。」念已，尋時坐火蓮花。諸鐵嘴虫，從身毛孔啜食其軀，百千鐵輪從頂上入，恒沙鐵叉挑其眼睛，地獄銅狗化作百億鐵狗競分其身取心而食。俄爾之間，身如鐵花，滿十八鬲。一一花葉，八萬四千。一一葉頭，身手支節，在一鬲間。地獄不大，此身不小，遍滿如此大地獄中。此等

罪人，墮此地獄，經歷八萬四千大劫，此泥犁滅。

復入東方十八鬲中，如前受苦。此阿鼻獄，南亦十八鬲、西亦十八鬲、北亦十八鬲。謗方等經、具五逆罪、破壞僧祇、污比丘尼，斷諸善根。如此罪人具眾罪者，身滿阿鼻獄，四支復滿十八鬲中。此阿鼻獄，但燒如此獄種眾生，劫欲盡時，東門即開。見東門外，清泉流水花果林樹，一切俱現。是諸罪人，從下鬲見，眼火暫歇。從下鬲起，婉轉腹行，捩身上走，到上鬲中，手攀刀輪。時，虛空中雨熱鐵丸。走趣東門，既至門闕，獄卒羅刹手捉鐵叉逆刺其眼，鐵狗嚙心，悶絕而死，死已復生。見南門開，如前不異。如是西門、北門，亦皆如是。如此時間，經歷半劫。阿鼻獄死，生寒冰中。寒冰獄死，生黑闇處。八千萬歲，目無所見，受大蟲身，婉轉腹行。諸情闇塞，無所解知。百千狐狼，

牽掣食之。命終之後，生畜生中，五千萬身，受鳥獸形，還生人中，聾盲、喑啞、疥癩、癰疽、貧窮、下賤，一切諸衰，以為嚴飾。受此賤形，逕五百身，後復還生餓鬼道中。

餓鬼道中，遇善知識諸大菩薩，呵責其言：「汝於前身，無量世時，作無根罪，誹謗不信，墮阿鼻獄受諸苦惱，不可具說。汝今應當發慈悲心。」時，諸餓鬼聞是語已，稱「南無佛」！稱佛恩力，尋即命終，生四天處。生彼天已，悔過自責，發菩提心。諸佛心光，不捨是等，攝受是輩，慈哀是等如羅睺羅，教避地獄如愛眼目。

佛告大王：欲知佛心光明所照，常照如此無間無救諸苦眾生。佛心所緣，常緣此等極惡眾生。以佛心力，自莊嚴故，過算數劫，令彼罪人發菩提心。

佛告阿難：云何名十八寒地獄？

寒地獄者：八方冰山，山十八鬲。復有十八諸小冰山，如頗梨色。此等寒冰滿冰山間，如凡蓮花，高十八由旬，上有冰輪，縱廣正等十二由旬，如天雨雹從空而下。世間自有無慈心者，劫奪無道，抄盜剝脫，凍殺眾生。此人罪報，欲命終時，一切刀風，化為熱火。罪人作念：「我今云何不臥冰上？」為火所逼，作是念時，獄卒羅刹，手執冰輪，如白鶴翔，躡虛而至。罪人見已，除熱清涼，心便愛念，氣絕命終，生冰山上。既生之後，十八冰山，如以扇扇，一切寒冰，從毛孔入。十八鬲中，遍滿一鬲。剖裂擗坼，如赤蓮花。冰輪上下，遍覆其身。八方冰山，一時俱合，更無餘辭，但言阿羅囉。爾時，罪人即作是念：「我於何時，當免寒冰，生熱火中？」

爾時，空中有諸鐵鳥，口嘴吐火，從空中下，破頭啄腦，罪人即死。命終之後，獄卒復以鐵叉打地，喚言「活！活！」應聲即蘇。起已思念：「我今身上大火猛熾，願得前冰，以滅此火。」獄卒復以冰輪迎接，置餘獄中。如是十八鬲中，無不經歷。此寒地獄壽命歲數，如四天王日月八千萬歲。罪既畢已，生賤人中，貧窮鄙陋。五百世中，為人奴婢，衣不蔽形，食不充口。此罪畢已遇善知識，發菩提心。

佛告阿難：云何名黑闇地獄？

黑闇地獄者：十八重黑山、十八重黑網、十八重鐵床、十八重鐵縵。一一山高八萬四千由旬，一一縵亦厚八萬四千由旬。一一縵間十八重黑鐵圍山，羅列如林陰闇此山。世間自有愚癡眾生，偷佛法僧燈明，偷盜父母、師長、和上，

謗說法者，亦毀世俗論義師等。不忌尊卑，不知慚愧。以此罪故，命欲終時，眼有電光，睽睽不停，即作是念：「我有何罪常見是火？」即閉兩目，不願欲見及日月光。命欲終時，獄卒羅剎，擎大鐵床，張大鐵傘，如大隊雲，乘空而至。

爾時，空中無形有聲：「此處黑闇，汝欲往不？」罪人聞聲，尋即起心欲往彼所。氣絕命終，坐鐵床上，如鴈王翔，落黑闇處。既入中已，刀輪上下，斬剉其身。有大鐵鳥，嘴距長利，從山飛來，搯啄罪人。痛急疾走，求明不得。足下蒺藜，穿骨徹髓。如是悼惶，經五百萬億歲，亦如四天王日月歲數。彼人頭打諸黑闇山，腦流眼出。獄卒羅剎，以鐵叉叉還安眼眶。罪畢乃出，為貧窮人，眼目角眵，盲冥無見，或被癩病人所驅逐。如是罪報，經五百身，過是以

後，遇善知識，發菩提心。

佛告阿難：云何名為十八小熱地獄？

十八小熱地獄者，如阿鼻獄，亦七重城、七重鐵網，無量諸惡以為莊嚴。自有眾生，不順師教，興惡逆心，不知恩養，盜師害師，污師淨食，坐師床座，捉師鉢盂藏棄不淨，作五種惡。云何為五：所謂：罵師、謗師、打師、殺師、以諸毒藥持以飲師。若沙門、婆羅門，作諸非法害師謗師，此罪惡人，無有慚愧，剝像破塔，劫法寶物，殺伯叔、父母、兄弟姊妹。如是罪人，命欲終時，阿鼻地獄十八獄卒，各以鐵叉擎一鬲獄，如是眾獄如大寶蓋，雨微細雨，雨滴如花。此人罪報，熱惱入心。如火燒已，見雨清涼。即作念言：「願我得坐陰蓋之下，涼雨灑我，不亦樂耶！」作是語已，氣絕命終，如擲毬頃，即便坐於

大劍床上，百億劍刃，刃皆出火燒刺其身。空中寶蓋，化為火輪，從上而下，直劈其頂。其身碎裂為數千段，上雨銅丸從毛孔入。獄卒羅刹，以大鐵叉刺罪人眼，或以鐵箭射其心者，悶絕而死。須臾還活，坐劍床上。旋嵐猛風，吹墮地獄。既入獄已，時閻羅王與宮殿俱在虛空中，告言：「獄種！汝作眾惡，殺師謗師。汝今生處，名拔舌阿鼻，汝在此獄，當經三劫。」作是語已，即滅不現。此獄苦痛，如上所說。

佛告阿難：云何名十八刀輪地獄？

刀輪地獄者：四面刀山，於眾山間，積刀如塼。虛空中，有八百萬億極大刀輪，隨次而下，猶如雨滴。自有眾生，樂苦惱他，殺害眾生。命終之時，患逆氣病，心悶煩滿，心堅如石。即作是願：「得一利刀削此諸患，不亦快乎！」

是時，獄卒頂戴刀輪，翳令不現，至罪人所，卑言遜辭：「我有利刀，能割重病。」罪人歡喜，即自念言：「唯此為快」。氣絕命終，生刀輪上，如醉象走墮刀山間。是時，四山一時俱合，四種刀山割切其身，不自勝持，悶絕而死。獄卒羅剎驅蹙罪人令登刀山，未至山頂，刀傷足下，乃至于心。畏獄卒故，匍匐而上。既至山頂，獄卒手執一切刀樹，撲殺罪人。未死之間，鐵狗嚙心，楚毒百端。鐵蟲啖食，肉皆都盡，尋復唱活。脚著鐵輪，從空而下，一日一夜，六十億生六十億死。如是眾多凡十八種。此人罪故，遂更增劇，如四天王壽八千萬歲。罪畢生世，墮在畜生，五百世中，身供眾口，復五百世受卑賤形。然後乃遇大善知識，發菩提心。

佛告阿難：云何名劍輪地獄？

劍輪地獄者：縱廣正等五十由旬，滿中劍樹。其樹多少，數如稻、麻、竹、葦。一一劍樹，高四十由旬。八萬四千劍輪為葉，八萬四千劍輪為花，八萬四千劍輪為果，八萬四千沸銅為枝。世間自有愚癡眾生，樂殺無厭。如此罪人，臨命終時，遇大熱病，即作念言：「我今身體，時熱時寒，舉身堅強，猶如鐵碓。」即作願言：「得金剛劍，割却此患，樂不可言。」是時獄卒即自化身，如己父母親友之形，在其人前而告之言：「我有祕法，如卿所念當用相遺。」罪人聞已，心甚愛念，急急欲得。氣絕命終，如馬奔走，生劍花中，無量劍刃削骨破肉，碎如豆許。復有鐵鳥從樹上下，挑眼啄耳。有大羅刹，手捉鐵斧，破頭出腦，鐵狗來舐。死已唱活，驅令上樹，未至樹端，身碎如塵。一日之中身經諸樹，一夜之中復經諸樹。一日一夜，殺身如塵，不可稱數。殺人罪故，

受如此殃。經八萬億歲，生畜生中，身常負重，死復剝皮。經五百世，還生人中，貧窮短命，多病消瘦。過是已後，遇善知識，發菩提心。

佛告阿難：云何名火車地獄？

火車地獄者：一一銅鑊，縱廣正等四十由旬，滿中盛火，下有十二輪，上有九十四火輪。自有眾生，為佛弟子，及事梵天九十六種，出家徒眾及在家者，誑惑邪命，諂曲作惡。如此罪人，欲命終時，風大先動身冷如冰，即作是念：

「何時當得大猛火聚，入中坐者，永除冷病？」作是念已，獄卒羅剎，化作火車如金蓮花，獄卒在上，如童男像，手執白拂，鼓舞而至。罪人見已，心生愛著：「如此金花，光色顯赫，照我令熱，必除寒冷。若得坐上，快不可言。」

作是語已，氣絕命終，載火車上，支節火燃，墮火聚中，身體焦散。獄卒唱活

應聲還活。火車轆身，凡十八返，身碎如塵。天雨沸銅遍灑身體，即便還活。如是往返，上至湯際，下墮鑊中。火車所轆一日一夜，九十億死九十億生。此人罪畢，生貧賤家，為人所使，繫屬於他，不得自在，償利養畢，爾乃得脫。由前出家善心功德，遇善知識為其說法，心開意解，成阿羅漢。

佛告阿難：云何名沸屎地獄？

沸屎地獄者：八十由旬十八鐵城，一一鐵城有十八鬲。一一鬲中四壁，皆有百億萬劍樹，地如刀刃，刃厚三尺。於其刃上，百千蒺藜，不可稱計。一一蒺藜及劍樹間，生諸鐵蟲，其數無量。一一鐵蟲，有百千頭。一一頭有百千嘴，嘴頭皆有百千虺蟲，口吐熱屎，沸如融銅。滿鐵城內，上有鐵網鐵鳥。世間自有眾生，破八戒齋，污沙彌戒、沙彌尼戒、污式叉摩尼戒、自污淨戒、污比丘

戒、比丘尼戒、污優婆塞戒、優婆夷戒。諸比丘、比丘尼、諸優婆塞及優婆夷、沙彌、沙彌尼、式叉摩尼，如是七眾及餘一切，污僧淨飯、污父母食，偷竊先啖，不淨手捉。及僧知事，以自恃故，污僧淨食。四部弟子，以不淨身，坐僧祇床。犯偷蘭遮，久不懺悔，虛食僧食。坐僧眾中與僧布薩。如是眾多，無量不淨惡業罪人，臨命終時，舉身皆香，如麝香子，不可堪處。即作是念：「當於何處不聞此香，如此香氣猶如狂風來熏我心。」作此念已，獄卒羅刹自化己身，猶如畫瓶中盛糞穢，至罪人所，以手摩觸，令彼罪人，心生愛着。氣絕命終，猶如風吹墮沸屎中，墮已糜爛，眾蟲啖食。東西走時，削骨徹髓，飢渴逼故，飲熱沸屎。虻蟲、疽蟲，啖其舌根，一日一夜，九十億生九十億死。罪畢乃出生貧賤家，繫屬於他，不得自在。設生世時，恒值惡王，屬邪見主，

種種惡事，逼切其身。癭瘡惡瘡，以為衣服。宿世聞法善因緣故，遇善知識，出家學道，成阿羅漢，三明六通，具八解脫。

佛告阿難：云何名十八鑊湯地獄？

鑊湯地獄者，有十八鑊，一一鑊縱廣正等四十由旬。七重鐵網，滿中沸鑊。五百羅剎，鼓大石炭燒其銅鑊。此石火焰，焰焰相承，經六十日，火不可滅。閻浮提日，滿十二萬歲。如是鑊沸，上湧如星，化成火輪，還入鑊中。自有眾生毀佛禁戒，殺生祠祀，為啖肉故，焚燒山野，傷害眾生，生燔眾生，以火焚燒。如此罪人，欲命終時，身心煩悶，失大小便，不自禁制，或熱如湯，或冷如冰。即作是念：「得大溫水，入中沐浴，不亦樂乎！」獄卒羅剎化作僮僕，手擎湯瓮至罪人所。罪人心喜，愛樂此瓮。氣絕命終，生鑊湯中，速疾消爛，

唯餘骨在。鐵叉搯出，鐵狗嚼之，嘔吐在地，尋復還活。獄卒驅蹙還令入鑊，畏鑊熱故，攀劍樹上，骨肉斷壞，落鑊湯中。殺生罪故，一日一夜恒河沙死恒河沙生。罪畢乃出，生畜生中，猪羊鷄狗短命之處，無不經歷。如是受身八千萬歲。命終之後，還生人中，受二種報：一者多病，二者短命。短命多病以為眷屬。過算數劫，遇善知識，受持五戒，行六波羅蜜。

佛告阿難：云何名灰河地獄？

灰河地獄者，長二百由旬一廣十二由旬，下有利刀、岸上劍樹，滿中猛火厚十二丈。復有融灰，以覆火上，厚四十丈。世間自有無慚眾生，偷盜父母、偷盜師長、偷盜善友兄弟姊妹。如是癡人，無有慚愧，不識恩養，心無反復，貪利欲得，不識殃禍，不順師教。此人罪報，欲命終時，氣滿心腹，喘息不續。

即作是念：「我心如泥，氣滿胸中，得一微火爆我身者，不亦快乎！」獄卒羅剎應念即至，化作妻子，手擎火爐，微灰覆上，至罪人所。是時，罪人心大歡喜。以歡喜故，氣絕命終，生灰河中。諸劍樹間，有一羅剎，手執利劍，欲來傷害。是人恐怖，走於灰河，舉足下足，刀傷其脚。劍樹雨刀，從毛孔入。羅剎以叉，叉其心出，躄地悶死，尋復還活。是人偷盜師長父母罪因緣故，一日一夜五百億生五百億死。飢渴逼故，張口欲食，劍樹雨刀，從舌頭入，劈腹裂胸，悶絕而死。由前聞佛法僧名故，罪畢之後，得生人中，貧窮下賤。覺世非常，出家學道。世無佛時，成辟支佛。世若有佛，成阿羅漢。

佛告阿難：云何名劍林地獄？

劍林地獄者：八千由旬滿中劍樹，有熱鐵丸以為其果。如此劍樹，高二十四

由旬。自有眾生，不孝父母，不敬師長，作惡口業，無慈愛心，刀杖加人。此人罪報，臨命終時，心如胡膠，處處生著。即作此念：「我心縛著觸事不捨，耽酒嗜色。身雖遇患，心猶不息，得一利刀割截此愛。」獄卒羅刹應聲即至，化為侍者，執明鏡示，語罪人言：「汝心多著可觀此鏡。」觀此鏡時，見於鏡中有利劍像，即作是念：「我今體羸，不堪欲事，得此利劍，割斷我心，不亦快乎！」作此念時，氣絕命終，受餓鬼身。諸劍樹間，忽然化生。生已，鐵丸從頂上入，從口而出，腸胃焦爛躄地。獄卒復以鐵叉打撲，驅令上樹。上一樹已，鐵嘴蟲啖。以恐怖故，踊身上樹。如是展轉，悉經劍林，一日一夜八萬生八萬死。罪畢之後，生飢饉世及疾疫劫。為人卑賤，口氣恒臭，人所惡見。過算數劫，遇善知識，發菩提心。

佛告阿難：云何名五百億刺林地獄？

刺林地獄者：八千由旬滿中鐵刺，一一刺端有十二劍，樹上復有大熱鐵鉗。世間自有愚癡眾生，惡口、兩舌、綺語、不義語，調戲無節，枉說是非，說經典過、毀論義師。如此罪報，命欲終時，咽燥舌乾，即作此念：「得一利刺刺頸出血，令眾脈間，流注眾水，不亦快乎！」作是念時，獄卒羅剎化作父母，手執月珠，珠頭生刺，持用擬口，如水欲滴。罪人歡喜：「我所願者，今已得果。」作是念已，氣絕命終，如大電頃，生刺林間。既生之後，獄卒羅剎，手執鐵鉗，拔舌令出。八十鐵牛，有大鐵犁，耕破其舌。刺林諸樹，有風吹來，撲打其軀。一日一夜六百生六百死。過是已後，得生人中，脣吶面皺，語言謇吃。如此罪人，體生諸創，膿血盈流，經五百世，人所惡見。過是已後，雖有

所說，人不信受。遇善知識，發菩提心。

佛告阿難：云何名五百億銅柱地獄？

銅柱地獄者：有一銅柱，狀如大山，高六百由旬，下有猛火，火上鐵床，上有刀輪，諸刀輪間，有鐵嘴蟲，鐵烏在傍。世間自有愚癡眾生，貪惑滋多，染愛不淨，犯邪淫行，非處非時行不淨業。設有比丘、比丘尼、婆羅門等諸梵行者，若於非時非處犯不淨法，乃至一切犯邪行者，作不淨業。如此罪人，臨命終時，舉身反強，振掉不定，猶如弓弩，不自勝持。即作此念：「得一堅大銅鐵柱者，縛此身體，令不動搖。」獄卒羅剎應時即至，化作僮僕，手執鐵杖，至罪人所，白言：「長者！汝今身強，餘物皆弱，可捉此杖。」心即歡喜，氣絕命終。如弄杖頃，生銅柱頭，猛火焰熾，焚燒其身。驚怖下視，見鐵床上，

有端正女。若是女人，見端正男，心生愛著。從銅柱上，欲投于地，銅柱貫身鐵網絡頸，鐵嘴諸蟲咬食其軀，落鐵床上。男女俱時，六根火起，有鐵嘴蟲，從眼而入，從男女根出。若污戒者，別有九億諸小蟲輩，如癩疽蟲有十二嘴，嘴頭出火咬食其體。此邪淫報，一日一夜九百億生九百億死。罪畢乃出，生鳩鴿中。受鳩鴿身，經五百世。復生龍中，經五百身。後生人中，無根、二根及不定根、黃門之身，經五百世。設得為人，妻不貞良、子不慈孝、奴婢不順。過是已後，遇善知識，發菩提心。

佛告阿難：云何名五百億鐵機地獄？

鐵機地獄者：有一鐵床縱廣正等四百由旬，上安諸棍，棍間皆有萬億鐵弩，鐵弩鏃頭百億鋒刃。世間自有愚癡眾生，為貪欲故，不孝父母，不敬師長，不

順善教，殺害眾生，食諸姦人。此人罪報，命欲終時，身體振動，身諸六竅，汁自流出。如此罪人，見自己床如兜羅綿，即生是念：「何時得一堅冷之處，安身臥眠，不亦快耶！」作是念時，獄卒羅刹，以叉擎床，敷大榻毼，至罪人所。罪人見已，心生歡喜，欲臥榻毼，氣絕命終，生鐵機上。萬億鐵棍關從下動，鐵棍低昂，無量鐵弩同時皆張，一一鐵箭射罪人心。一日一夜六百億生六百億死。如是罪人，受罪畢已，生畜生中，經五百世，還生人間，貧窮下賤，為人所使，多墮刑獄，恒受鞭撻。過是已後，遇善知識，發菩提心。

佛告阿難：云何名鐵網地獄？

鐵網地獄者：八十九重諸鐵羅網，一一網間，百億鐵針。一一鐵針，施五關棍。世間自有虛妄眾生，邪心諂曲，妖媚惑人，心懷讒賊，晝夜惡念，刹那刹

那頃，成就惡念。此人罪報，臨命終時，身體搔痒，即作此念：「得一束針鑱刺疥蟲，不亦樂乎！」作是念時，獄卒羅刹化為良醫，手執利針，唱言：「治病」。罪人心喜，氣絕命終，生鐵網間，摔身下過，眾棍皆動，無量諸針，射入毛孔。如是婉轉諸鐵網間，刹那頃死刹那頃生。罪畢乃出，生於邊地無佛法處，亦不聞說世間善語，何況正法！雖生人中，三惡道攝。過算數劫，遇善知識，雖得聞法，心不解了。

佛告阿難：云何名鐵窟地獄。

鐵窟地獄者：餓鬼道中，最上苦法，有一鐵山，縱廣正等二十五由旬，山上復有五百萬億大熱鐵丸。一一鐵丸，團圓正等十三由旬，山間復有百千刀劍。是時，彼山，東向開張有一小孔，如摩伽陀斗，口但出黑烟。世間自有愚癡眾

生，慳貪縛著，心如金剛，但樂求索，無有厭足。父母妻子，悉不給與。師長教授，視如糞穢。奴婢親友，不施衣食。如是慳人，不慮無常，護惜財物，猶如眼目。此人罪報，命欲終時，諸情閉塞，口噤不語。心中默念：「我死之後是諸惡人，食我財物如啖鐵丸，居我屋宅如處闇室。」作是念已，獄卒羅刹化為慳人，幻收財物，至罪人所，以火焚之。罪人心喜，氣絕命終，生火山上，猶如融銅鑄鐵窟中。既入窟中，劍蟲刀蟲，啖食其軀，烟熏其眼，不見火炎，周慄惶怖東西馳走，頭打鐵山。鐵丸上下，從頂而入，從足而出。一念頃死一念頃生。罪畢乃出，生餓鬼中，其身長大數十由旬，咽如針筒，腹如大山，東西求食，融銅灌咽，經八千歲，乃得苦畢，生食唾鬼、食膿鬼、食血鬼中。罪畢復生廁神猪狗，罪畢復生貧窮卑賤無衣食處。遇善知識，發菩提心。

佛告阿難：云何名鐵丸地獄？

鐵丸地獄者：八十由旬滿中鐵城八十八鬲，一一鬲中有五刀山持用覆上，下有十八大惡鐵蛇，蛇皆吐舌，舌出鐵劍，劍頭火燃。世間自有愚癡眾生，毀辱布施，言「施無報」，勸人藏積。如是癡人，向國王、大臣、沙門、婆羅門及一切眾說「施無因亦無果報」。如此罪人，臨命終時，頸強脈縮，迴轉不語，不喜見人，低視而臥。心中但念：「我積財寶，得與我俱，快不可言。」獄卒羅刹，化作其妻，捉熱鐵丸，化作寶器，在其人前，語言：「我隨汝死，婉轉相著，終不相離。」氣絕命終，生鐵城中，東西馳走。鐵蛇出毒，纏繞其身，節頭火然。即作是念：「願天愛我，降注甘雨。」應念即雨大熱鐵丸，從頂而入，足下而出。罪畢，乃為貧窮孤獨喑啞之人。是人歲數，如鐵窟說。遇善知

識，發菩提心。

佛告阿難：云何名尖石地獄？

尖石地獄者：有二十五石山，一一石山，有八冰池。一一冰池，有五毒龍。世間自有愚癡眾生，比丘、比丘尼、沙彌、沙彌尼、式叉摩尼、優婆塞、優婆夷、九十六種諸梵志等，法說非法，非法說法。或犯輕戒，久不懺悔，心無慚愧，猶如猿猴。此人罪報，命欲終時，心下氣滿，腹脹如鼓，飲食噎吐，水漿不下。即作是念：「得一石尖塞我咽喉，不亦快乎！」作是念時，獄卒羅剎化作良醫，幻捉石尖作大藥丸，著其口中。告言：「閉口」。心生歡喜，氣絕命終，生石山間，無量尖石，從背上入，從胸前出。獄卒復以鐵叉叉口，以石內中。一日一夜六十億死六十億生。此是生報，從此命終，墮黑繩地獄。黑繩地

獄者：八百鐵鎖，八百鐵山，豎大鐵幢，兩頭繫鎖，獄卒羅刹驅蹙罪人，令負鐵山、鐵繩上走。不勝落地，墮鑊湯中，羅刹驅起，渴急飲鐵，吞石而走。一日一夜經歷是苦，凡十萬遍。罪畢生世，為人僮僕。遇善知識，為說實法，如好白麩，易染受色，得阿羅漢，三明六通，具八解脫。

佛告阿難：云何名十八飲銅地獄？

飲銅地獄者：千二百種雜色銅車，一銅車上六千銅丸。自有眾生，慳貪嫉妬邪見惡說，不施父母、妻子、眷屬，及與一切。心生慳嫉，見他得利，如箭入心。如是罪人，欲命終時，多病消瘦，昏言囁語，口中自說：「欲得果食」。作是語時，獄卒羅刹化為銅車，滿車載果，至罪人所。罪人得已，心生歡喜，即作念言：「得此美果，食不知厭，甚適我願。」歡喜踊躍，氣絕命終。未經

幾時，生銅車上，不久即往生銅山間，銅車轆頸。獄卒羅刹，以鉗柁口，飲以烱銅。飲烱銅已，迷悶蹙地，唱言「飢！飢！」尋時，獄卒擘口令開，以銅鐵丸置其口中，吞十八丸，節節火燃，東西馳走。經於一日，爾乃命終。獄卒唱言：「汝前身時，諂諛邪見，慳貪嫉妬。以是因緣，受鐵丸報。或曾出家，毀犯輕戒，久不悔過，虛食信施。以此因緣，食諸鐵丸。」此人罪報，億千萬歲不識水穀。受罪畢已，還生人中，五百世中言語謇吃，不自辯了。以宿習故，食後啖炭及啖土塊。過是以後，遇善知識，發菩提心。

⑤ 觀四無量心品

爾時，世尊說是語時，佛心力故，十種白光從佛心出，其光遍照十方世界。一一光中，無量化佛，乘寶蓮花。時會大眾見佛光明如頗梨水，或見如乳。見

諸化佛，從佛胸出，入於佛臍，遊佛心間，乘大寶船，經往五道受罪人所。一一罪人，見諸化佛，如己父母善友所親，漸漸為說出世間法。是時，空中有大音聲告諸大眾：汝等今者，應觀佛心。諸佛心者，是大慈也。大慈所緣，緣苦眾生。

佛告阿難：云何名慈心？

慈心者：應當繫念緣苦眾生。苦眾生者，謂三惡道極苦惱者。

佛說是語，時會大眾，見於地獄、餓鬼、畜生。解脫相三昧力故，令諸眾生自識宿命。見受苦者，皆是前世無量劫中，父母師徒諸善親友，見已啼泣，為佛作禮，白言：世尊！我等今者，因佛力故，見苦眾生，悉是我等父母師長。

佛告大眾：三界眾生，輪迴六趣，如旋火輪，或為父母、兄弟、宗親。三界

一切，無不是汝所親之者。云何起意，生殺嫉心？

作是語已，淨飯王等一切大眾白佛言：世尊！云何名為慈心三昧？惟願，世尊！為我略說。

佛告大眾：夫慈心者，應當起想，先緣所親。繫念之時，念己父母，受諸苦惱有不孝者；念己妻子、所愛眾生，受諸苦惱；有見眾生，癩病癰瘡。見已作念：「當云何救？」一想成已，應作二想。二想成已，應作三想。三想成已，滿一室想。一室想成已，滿於僧坊。一僧坊成已，滿一由旬。一由旬成已，滿一閻浮提。閻浮提成已，滿弗婆提。弗婆提成已，滿三天下。如是，漸廣滿十方界。

見東方眾生盡是其父，見西方眾生悉是其母，見南方眾生悉是其兄，見北方

眾生悉是其弟，見下方眾生悉是妻子，見上方眾生悉是師長。其餘四維悉是沙門、婆羅門等。見是眾生，皆受苦惱，或遇重病。或見在於刀山、劍樹、火車爐炭，一切苦事。見已悲泣，欲拔其苦，自作我想，乘寶蓮花，詣諸人所，調身按摩，為洗癩瘡。見地獄火，憂悲雨淚，欲滅其火。見諸餓鬼，刺身出血，化作乳想，供給餓鬼，令得飽滿。既飽滿已，為其說法，讚佛、讚法、讚比丘僧。作是讚已，益更憂悲，心無暫捨。如是慈心，極令通利。事事廣說，如慈三昧。如是慈心，名習慈者。

既習慈已，次當行悲。悲者見眾受苦，如箭入心，如破眼目。心極悲苦，遍體雨血，欲拔彼苦。如此悲者，有百億門，廣說如大悲三昧。

行慈悲已，次行大喜。見諸眾生安隱受樂，心生歡喜，如己無異。

既生喜已，次行捨法。是諸眾生，無來去相，從心想生（心想生者，因緣和合假名為心）。如此心想，猶如狂花從顛倒起，苦從想起、樂從想生，心如芭蕉中無堅實，廣說如經十譬。作是觀時，不見身心。見一切法，同如實性。是名菩薩身受心法。依因此法，廣修三十七助菩提分。若取證者，是聲聞法。不取證者，是菩薩法。

作是語已，佛心光明，益更明顯。從佛心端，諸光明中，生諸寶花。一一寶花，恒沙寶花以為眷屬。一一花上，無量無邊微妙化佛，方身丈六如釋迦文。此相現時，佛身毛孔八萬四千諸寶蓮花，一一花上，八萬四千諸大化佛，身量無邊。如是化佛，身諸毛孔，及心光明，亦如向說。

如是光明遍照十方，從佛頂入，從佛眉間白毫相出。從白毫出，遍照十方，

猶如金幢，令十方地作真金色。卷諸化佛，入佛口中，從佛口出。亦照十方，來入佛胸。從佛胸出，復照十方，來入佛臍。此光入時，佛身之內，如琉璃水澄清不動。三界五道一切眾生，映現佛心。見諸化佛，乘大寶臺，猶如寶船遊佛心間。一一化佛，讚說不殺、讚歎念佛、讚歎念法、讚歎念僧、讚歎念戒、讚歎念施、讚歎念天、讚六和敬、讚慈三昧。如此六念，能生善法。此六念者是諸佛因，佛心者是六念心，因六和敬而得此法。欲成佛道，當學佛心。

說是語已，如來身光，倍更明顯。佛身化佛及寶蓮花，數不可知。一一花光如《雜花》說。

如是觀者，名為正觀。若異觀者，名為邪觀。

佛滅度後，佛諸弟子，修六念者，名念佛心。念佛心者，除十二億劫生死之

罪。作是觀者，生生之處，終不邪見，心不僻謬，恒得值遇無生菩薩。如是之人，若生邊地無佛法處，念佛功力，自然悟解，成辟支佛。

爾時，世尊說是語已，還攝身光，如本無異。

佛告父王：如大人相，白毫光明及一切相，有能逆觀、順觀、分別觀者。全觀圓光及丈六者，但發是心如見不見除却眾罪，如向所說。設有施主，具五神通，得如意珠，飛遍十方，十方世界一一世界，眾生之數，不可得知，但以無量無邊總為其數。如是眾生皆是阿羅漢，是大施主盡算數劫，供養賢聖四事無乏。是人得福，寧為多不？

父王白言：但使供養一方阿羅漢，得福無量，何況十方無量阿羅漢！

佛告父王：正使有人成熟邪見眾生，數如上說，皆令彼人得阿羅漢道、三明

六通，具八解脫。不如發心趣向佛慧，念佛須臾。

佛說是語時，釋子眾中一億釋子，發阿耨多羅三藐三菩提心，自誓不求聲聞、辟支佛道。白佛言：世尊！諸佛身分，乃至一毛無量化佛。諸聲聞身，如焦敗種，為何所益？

⑥ 觀四威儀品

爾時，世尊，於大眾中，即便起行，足步虛空。父王觀見，心甚歡喜，亦隨佛行。佛舉足時，足下千輻相輪。一一輪相，皆雨八萬四千眾寶蓮花。一一蓮花，復化八萬四千億那由他花。一一蓮花，化為一臺。一一花臺，一一花葉，遍覆十方無量世界。一一蓮花，八萬四千葉，釋迦牟尼足步虛空，悉雨寶花。如是，眾花復有無量微塵數佛足步虛空。父王見已，心大歡喜，得阿那含，五

體投地，為佛作禮。

時會大眾，皆覩此事，白佛：世尊！十方世界無數化佛，何者真佛？誰是化佛？

佛告大眾：諸佛如來入空寂處，解脫三昧，隨意自在，無有真、化。

所以者何？佛心空寂，復入空寂解脫光明王三昧。此定力故，諸佛如來，化無邊身。無邊身者，是薩婆若。薩婆若者，名無著三昧。無著三昧故，如來現行，若現乞食、若或經行，如是二法饒益眾生。若有眾生，佛在世時，見佛行者，步步之中，見千輻輪相，除却千劫極重惡罪。佛去世後，三昧正受想佛行者，亦除千劫極重惡業。雖不想行見佛跡者、見像行者，步步亦除千劫極重惡業。

佛告阿難：汝從今日，持如來語，遍告弟子：「佛滅度後，造好形像，令身相足，亦作無量化佛色像，及通身光及畫佛跡，以微妙彩及頗梨珠安白毫處，令諸眾生得見是相。但見此相，心生歡喜，此人除却百億那由他恒河沙劫生死之罪。」

說此語已，如來還坐。

父王復問佛：出世間有何利事，能令眾生得安樂耶？

爾時，世尊告大王言：舍衛城中須達長者，有一老母名毘低羅，謹勤家業，長者敕使守執庫鑰，出內取與，一切委之。須達長者請佛及僧供給所須。時，病比丘，多所求索。老母慳貪，瞋嫌佛法及與眾僧，而作是言：「我家長者，愚癡迷惑，受沙門術。是諸乞士，多求無厭，何道之有？」作是語已，復發惡

願：「何時當得不聞佛名、不聞僧名、不見剃髮染衣之人？」如是惡聲，一人聞已，復聞二人，展轉遍滿舍衛城中。

末利夫人聞此語已，而作是言：「云何須達如好蓮花人所樂見？云何復有毒蛇護之？」

作是語已，敕須達言：「遣汝婦來，吾欲與語。」

阿那邠坻馳詣王宮，到作禮畢，却住一面。

末利夫人命令就座，坐已語言：「汝家老婢，惡口誹謗，何不驅擯？」

阿那邠坻跪白：「夫人！佛日出世，多所潤益。鴛掘摩羅大惡之人，尼提賤人氣噓梅陀羅，佛能調伏。何況老婢，而不能調！」

末利夫人聞是語已，心大歡喜：「我欲請佛，汝遣婢來，明日食時，請佛及

僧，於宮供養。」

長者遣婢持滿瓶金摩尼珠蓋，勸助王家供養眾僧。告言：「可往，汝持此物貢上王家。」

婢聞是語，歡喜踊躍，持寶瓶走。

末利夫人見彼婢來：「此邪見人，佛當教化。我見此人受化之時，必獲法利。」

爾時，世尊從正門入，難陀在左，阿難在右，羅睺佛後。老母見佛，心驚毛豎：「可惡！此人隨我後至。」

即時欲退，從狗竇出。狗竇即閉，四方小巷，一時閉塞，唯正路開。老母覆面以扇自障，不憚見佛。佛在其前，令扇如鏡，無所障礙。迴頭東視，東方有

佛。南視，南方有佛。西視，西方有佛。北視，北方有佛。舉頭仰看，上方有佛。低頭伏地，地化為佛。以手覆面時，手十指皆化為佛。老母閉目，心眼即開，見虛空中一切化佛，滿十方界。

此相現時，舍衛城中，有二十五旃陀羅女，五十婆羅門女及諸雜類，并未利夫人宮中合五百女，心生誹謗，不信佛法，見佛如來足步虛空，為於老母現無數身，心大歡喜，裂邪見網，頭腦頂禮世尊足下。

爾時，世尊，以梵音聲，安慰諸女告言：「諸女！汝今可稱釋迦牟尼，稱我名故，觀我身相，可得解脫。」

作是語已。諸女同聲稱「南無佛」。

佛放眉間白毫相光照諸女心，女見佛行威儀詳序，足下雨花猶如花蓋，化佛

如林不可稱計。諸女見已，發阿耨多羅三藐三菩提心。老母見佛，邪見不信，猶能除却八十萬億劫生死之罪，況復善意恭敬禮拜！

爾時，老母以得見佛，巷陌還開，疾走歸家，白大家言：「我於今日，遇大惡對沙門瞿曇，在王宮門多眾之前，作諸妖幻。身如金山，眾花映飾，目踰青蓮，有萬億光，不可具見。沙門善幻，世間無比。大家年少，可不熹見。」

作是語已，入木籠中，以百張皮覆木籠上。白氎纏頭，却臥闇處。

爾時，世尊還祇陀林，末利夫人白言：「世尊！願化邪女，莫還精舍。」

佛告末利：「此女罪重，於佛無緣。於羅睺羅，有大因緣。佛今日行，為其除罪。」

作是語已，即還精舍，告羅睺羅：「汝詣須達大長者家，度惡老母。」

作是語時，千二百五十沙門皆作是言：「我等今日，願欲隨從。」

爾時，羅睺承佛威神，入如意定，禮拜既畢，遶佛七匝，即自化身作轉輪聖王，阿難侍左、難陀侍右，千二百五十比丘化為千子。阿難為典藏臣，難陀為主兵臣，七寶四兵皆悉具足。時，金輪寶在虛空中，乘蓮花臺，徑往須達大長者家。夜叉唱言：「聖王出世，擯諸惡人，宣揚善法。」

老母聞已，心大歡喜：「聖王出者有如意珠，無所求索，此當可言。」

爾時，聖王椎鍾鳴鼓，乘大寶輿，至須達家。

老母見已，甚大歡喜：「聖王出世，多所潤益，識別善惡，必當不為沙門所惑。」

從木籠出，敬禮聖王。聖王即遣主寶藏臣往至女所，告言：「姊妹！汝宿有

福，應王者相。聖王今者，欲以姊妹為玉女寶。」

老母白言：「我身卑賤，猶如糞穢。聖王顧問，喜慶無量，何所堪任應玉女寶？若見念者，敕我大家放我令脫，所賜已多。」

爾時，聖王告須達言：「卿家老女，眾相巍巍，吾今欲以充玉女寶。」

須達白言：「惟命是從，願上大王。」

老婢聞放，喜悅非常。

聖王即便以如意珠照耀女面，令女自見如玉女寶。

倍大歡喜，而作是言：「諸沙門等高談大語，自言有道，無一效驗。聖王出世，弘利處多，令我老婢如玉女寶。」

作是語已，五體投地，禮於聖王。

時，典藏臣宣王優令，揚十善法。女聞十善，心大歡喜，即作是念：「聖王所說，義無不善。」

為王作禮，悔過自責，心即調伏。

時，羅睺羅還復本身。老母舉頭，見千二百五十比丘，即作此言：「佛法清淨，不捨眾生。如我弊惡，猶尚化度。」

作是語已，求受五戒。

時，羅睺羅為說三歸，受五戒法。母聞此法，未舉頭頃，成須陀洹。

地神歡喜，從地踊出，告須達言：「善哉！長者裂邪見網，如來出世，正為此耳！」

時，羅睺羅將此老母詣祇陀林。

到已，見佛身相紫金，歡喜合掌，為佛作禮，懺悔前罪，求佛出家。

佛告羅睺：「汝將此母詣憍曇彌」。

未至中間，羅睺為說苦、空、非常、無我等法。

老母聞已，頭髮白落，成比丘尼，三明六通具八解脫，身昇虛空作十八變。

波斯匿王末利夫人，見此變化，心大歡喜：「善哉！佛日出現世間，破無明闇，能令邪見得應真道。」

作是語已，為佛作禮，白言：「世尊！如此老母，宿有何罪，生卑賤處，為人婢使。復何福慶，值遇世尊，如好白麤，易受染色，應時即得阿羅漢道？」

佛告大王：諦聽！諦聽！善思念之！如來為王分別解說。

過去久遠無數劫時，有佛世尊名一寶蓋燈王如來，十號具足。彼佛滅後，於

像法中，有王名曰雜寶花光，其王有子名曰快見，求欲出家，父即聽許。王子詣山，到僧坊中，求欲出家。時，有比丘聰明多智，深解實相，受為弟子。復有比丘名德花光，善說法要，誘進初學。

王子比丘，雖復出家，猶懷憍慢。和上為說甚深妙法般若波羅蜜大空之義，王子聞已，謬解邪說。比丘滅後，即作此言：「我大和上空無智慧，但能讚歎虛無空事，願我後生，不樂見也。我阿闍梨智慧辯才，願於生生為善知識。」

王子比丘作是語已，法說非法、非法說法，教諸徒眾皆行邪見。雖持禁戒，威儀不缺。以謬解故，命終之後，如射箭頃，墮阿鼻獄，八十億劫恒受苦惱。罪畢乃出為貧賤人，五百身中聾癡無目，千二百身恒為人婢。

佛說是時，末利夫人有五百婢，懺悔自責，發菩提心，願於來世解深空法。

佛告大王：爾時，和上者，今我身是！阿闍梨者，今羅睺羅是！王子比丘，此老母是！徒眾弟子，今日邪見女等發菩提心者是。

佛說此時，舍衛城中二萬優婆塞，發菩提心，得念佛定。常於定中，見佛說法。

佛告父王：邪見惡人見佛行時，尚得如此無量福德，何況觀佛行及像行者！

父王白佛：佛母摩耶生忉利天，佛今光相神通具足，云何當往為母說法？

佛告大王：如來當如轉輪聖王足行之法，從閻浮提上忉利天，問訊檀越，為說妙法。

爾時，會中有菩薩摩訶薩，名曰持地，即從座起，入首楞嚴三昧。三昧力故從金剛際，金剛為輪、金剛為根、金剛為花，花花相次，出閻浮提。

時，四龍王：難陀、跋難陀、阿耨達多、娑伽羅龍王等，各持七寶，詣持地所，奉上七寶，為佛世尊作三道寶階，左白銀、右頗梨、中黃金。從閻浮提金剛地際上忉利宮。一一寶階，七重欄楯。是諸欄楯，百億寶成，百億光明。一一光明，百億寶花。一一花中，無量樂器自然踊出。

爾時，持地以恒河沙七寶蓮花敷佛蹈處，於階道側豎諸寶幢，無量寶幡懸其幢頭，百億寶蓋彌覆其上，忉利諸天雨曼陀羅花、摩訶曼陀羅花、曼殊沙花、摩訶曼殊沙花，嚴飾其間。

時，梵天王手擎香爐，與萬梵俱，侍立階側。一一香烟，如琉璃雲，彌滿虛空。於其雲中，百千妓樂，不鼓自鳴。

難陀龍等，持海此岸栴檀末香，漫散道中。香光上出，如金光焰，高一多羅

樹，化為金臺。無量諸天，持天瓔珞嚴飾階道。如是供具，不可稱計。

爾時，世尊於閻浮提執持三衣，告敕阿難、難陀、羅睺羅等五百比丘，足步大地。始舉足時，地六種動。下足之時，地生寶宮如梵王宮，宮宮相次，懸在空中，隨映佛後，在階道側。

持地菩薩并彌勒等一千菩薩，一時合掌，以萬億音歌詠如來無量德行。

爾時，梵王無數百千諸梵天等，手擎香爐無量伎樂，以供養佛，立侍左階。釋提桓因，無數天子、百千天女，鼓樂絃歌，亦立左階。無數聲聞、菩薩、大眾，侍立右階。

爾時，世尊放大光明，照階道邊。其光如雲，百千億色，猶如重閣。佛處其中，八萬四千化佛圍繞，五百分身諸佛與佛正等，執持衣鉢，威儀詳序。分身

諸佛，亦有阿難、難陀，以為侍者。

時，魔波旬，於虛空中，與諸魔眾，讚誦妙偈，歎如來功德。

釋提桓因白摩耶言：「如來世雄，為報恩故，來至此處。」

摩耶夫人聞佛已來，遣諸天女持諸天寶及天妓樂、曼陀羅花，在階道邊，以迎世尊。

爾時，如來舉足下足無數宮殿。一一宮殿，五百化佛結加趺坐。一一如來，五百菩薩以為侍者。

爾時，五百分身諸釋迦文入忉利天宮，諸天歡喜，而說此偈：

毘婆尸佛 吉祥中尊 亦放光明 來至此處

尸棄如來 大吉祥尊 化身無數 來至此處

毘舍浮月	放白毫光	普照一切	來至此處
拘樓孫佛	面門出光	照十方界	來至此處
迦那含佛	化身無數	放大光明	來至此處
迦葉世尊	身如寶臺	足步虛空	來至此處
釋迦牟尼	分身五百	無數化佛	
照耀一切	來至此處		
彌勒菩薩	賢劫尊者	亦放光明	當至此處
此處吉祥	安隱無為	諸佛所遊	
牟尼生地	名涅槃窟	慧者智度	

爾時，世尊入忉利宮，即放眉間白毫相光。其光化作七寶大蓋，覆摩耶上。

七寶飾床，奉摩耶坐。

佛母摩耶見佛入宮，合掌恭敬，為佛作禮。五百化佛一時伸手，諸天扶持，不聽禮敬。八萬四千諸化如來，皆悉起立。

爾時，摩耶夫人宮中自然踊出五百億光。此光明中，有大寶臺。一一臺上，有十方佛。如是諸佛，自說名字，安慰佛母。

東方善德佛，持妙寶花，散釋迦牟尼及摩耶上，化成花蓋。此花蓋中，百億化佛，合掌起立，問訊佛母。

南方栴檀德佛，持寶蓮花，散釋迦牟尼及散佛母上，化成花蓋。於花蓋中，無數化佛，合掌起立，問訊佛母。

西方無量明佛，以寶蓮花，散釋迦牟尼及佛母上，化成花蓋。無數化佛，合

掌起立，問訊佛母。

北方相德佛，以寶蓮花，散釋迦牟尼及佛母上，化成花蓋。無數化佛，合掌起立，問訊佛母。

東南方無憂德佛、西南方寶施佛、西北方花德佛、東北方三乘行佛、上方廣眾德佛、下方明德佛，如是等佛，各以寶花，散釋迦牟尼佛上及散佛母，化成花蓋。一一蓋中，無數化佛，合掌起立，問訊佛母。

時，忉利宮滿中化佛，佛母摩耶頂上自然出眾供具，無量幢幡供養諸佛。時幢幡中，有妙音聲，讚佛、讚法、讚比丘僧。

佛告阿難：是名如來從閻浮提昇忉利宮，色相光明諸神化事。

佛滅度後，佛諸弟子，若如是觀，是名正觀。若異觀者，名為邪觀。

作此觀者，除一億劫生死之罪，臨命終時，見十方佛，必生他方淨佛國土。

佛告阿難：汝持是語，為未來世諸眾生等當廣宣說。聞此語者、思是義者，當知是人十方諸佛之所覆護，命終必當生諸佛前。

佛告父王：云何名如來從忉利天下閻浮提時光相變應？

我初下時，無數天子百千天女侍從世尊，獨見一佛圓光一尋放千光明，足步虛空躡階而下。

時，佛光中七佛像現，從佛光出，導佛前行。

時，優填王戀慕世尊，鑄金為像。聞佛當下，象載金像，來迎世尊。

蓮花色比丘尼，化作瑠璃山，結加趺坐，在山窟中，無量供具奉迎世尊。

爾時，金像從象上下，猶如生佛，足步虛空，足下雨花，亦放光明，來迎世

尊。

時，鑄金像合掌叉手，為佛作禮。

爾時，世尊亦復長跪合掌向像。

時，虛空中百千化佛，亦皆合掌長跪向像。

爾時，世尊而語像言：「汝於來世，大作佛事。我滅度後，我諸弟子，以付囑汝。」

空中化佛，異口同音，咸作是言：「若有眾生，於佛滅後，造立形像，幡、花、眾香，持用供養。是人來世，必得念佛清淨三昧。若有眾生，知佛下時種種相貌，繫念思惟，必自得見。」

佛告阿難：佛滅度後，佛諸弟子，知佛如來下忉利天及見佛像，除却千劫極

重惡業。

如是觀者，名為正觀。若異觀者，名為邪觀。

佛告阿難：云何如來至曠野澤伏鬼大將？

我從舍衛祇陀精舍，放金色光，照舍衛城，令作金色。

舍衛國內，有一長者名曰財德。長者有子，年始三歲，父教其子令受三歸。

散脂鬼神，飢火所逼，入舍衛城，接取嬰兒。

爾時，嬰兒稱「南無佛」！以稱佛故，鬼王口噤，不能得食，但眼出火，以怖嬰兒。

嬰兒見鬼，形狀醜惡，胸有三面、臍有二面、兩膝二面。面如象面，狗牙上出。眼復出火，火皆下流。童子驚怖，稱「南無佛、南無法、南無僧！」

爾時，世尊天耳遠聞，獨將阿難，足步虛空。

阿難在後，從佛不及。佛以神力，化作寶花，其花光明，接取阿難。

阿難坐花，見閻浮提滿中化佛。一一化佛，身滿三千大千世界。是諸化佛說三乘法，勸進菩薩，修行念佛。阿難見聞，即憶過去九十億佛所說經藏，憶持不失。

爾時，世尊到曠野澤，放眉間白毫大人相光，其光直照怖小兒身。

小兒見光，如見父母，心無驚懼。

時，曠野鬼舉一大石，厚十二丈，欲擲世尊。眼出雷電，雨雹如雨。一一雹下，如赤鷄子從空而下，未至佛上，化成化佛。一一化佛，入火光三昧，諸火光明，燒曠野澤，大地洞然，鬼王不怖。擲石住空，化成寶臺，臺中復有百億

化佛，異口同音，讚歎慈心，鬼猶不伏。

時，金剛神，手奮金杵，揮大利劍，髭如劍竦，眼如電光。以金剛杵，擬鬼王額，攘臂大叫，聲振天地。

鬼王驚怖，抱持小兒，長跪上佛，白言：「沙門！惟願慈愛，救我生命。」

時，金剛神，化金剛杵為大鐵山，四面火起，繞鬼七匝，猛火炎熾，焚燒鬼身。

嬰兒舉手，敕鬼王言：「稱南無佛！我稱佛故，從死得生。汝今可稱『南無諸佛』！」

爾時，鬼王驚怖失聲，稱「南無佛」！

白言：「瞿曇！可救護我。」

爾時，世尊以梵音聲，猶如慈父，安慰諸子，撫慰鬼王亦復如是！

密迹金剛敕鬼王言：「汝今速伏，歸依佛、法，及與眾僧。汝若不伏，碎汝眷屬萬億八千令如微塵。」

時，曠野鬼以驚怖故，五體投地，為佛作禮，白言：「世尊！我恒啖人。今者不殺，當食何物？」

佛敕鬼王：「汝但不殺，我敕弟子常施汝食，乃至法滅。以我力故，令汝飽滿。」

鬼王聞已，歡喜合掌，受佛五戒。受五戒已，見諸火山，焰焰相次，變成化佛。滿曠野澤，皆是化佛。一一佛後，有一阿難。一一化佛，異口同音，皆說五戒。

時，曠野鬼白金剛神：「因大德故，得服甘露無上法味。」

時，金剛神擲杵空中。佛神力故，令金剛杵猶如百億金須彌山。一一須彌，百億龕室。一一龕室，百億化佛遊步經行。是諸化佛，舉足下足，足下自然生七寶臺。一一臺上，恒沙化佛結加趺坐。

佛告大王：佛滅度後，佛諸弟子，欲知如來伏曠野鬼自在神通。

如是觀者，名為正觀。若異觀者，名為邪觀。

佛滅度後，若有眾生，思是法者、觀是法者、得此想者，除百千億劫生死之罪。生生之處，不受鬼身，值遇諸佛，間無空缺。設無佛時，遇辟支佛。無辟支佛，恒遇仙人，為說正道。

佛告阿難：汝今持是境界念想，為未來世一切眾生，當廣宣說。是名諸佛神

通境界。若失此事，則名謗佛，斷菩提種。持是法者，鬼魅不著，恒為諸佛之所護助。

佛告阿難：云何名如來到那乾訶羅國、古仙山蒼蔔花林毒龍池側、青蓮花泉北羅剎穴中、阿那斯山巖南？

爾時，彼穴有五羅剎，化作女龍，與毒龍通。龍復降雹、羅剎亂行，飢饉疾疫，已歷四年。

時，王驚懼，禱祠神祇，於事無益。召諸呪師，令呪毒龍。羅剎氣盛，呪術不行。

王作是念：「得一神人，驅此羅剎，降是毒龍。唯除我身，其餘無惜。」

時，有梵志，聰明多智，白言：「大王！迦毘羅城淨飯王子，其生之日，萬

神侍御，七寶降瑞。阿私陀相：『處國，當為轉輪聖王。若不樂天下，成自然佛。』今者道成，號釋迦文，巨身丈六三十二相、八十種好，足躡蓮花，項佩日光，身相端嚴，如真金山。」

王聞是語，心大歡喜，向佛生地，自歸作禮：「若梵志語審實不虛，有佛出世名釋迦文！然，我相法却後九劫，乃當有佛名釋迦文！云何今日佛日已興？云何不哀至此國界？」

空中有聲，告言大王：「汝莫疑佛，釋迦牟尼精進勇猛超越九劫。」

聞是語已，復更長跪，合掌讚歎：「佛通明慧，應知我心。願屈慈悲，光臨此國。」

爾時，香烟至佛精舍，如白琉璃雲，繞佛七匝，化作金蓋。其蓋有鈴，出妙

音聲，其聲請佛、請比丘僧。

爾時，如來敕諸比丘：「諸得六通者，隨從佛後，受那乾訶羅王弗巴浮提請。」

摩訶迦葉，徒眾五百，化作琉璃山。山上皆有流泉、浴池、七寶行樹。樹下皆有金床銀光，光化為窟。摩訶迦葉坐此窟中，常坐不臥，敕諸弟子行十二頭陀。其山如雲，疾於猛風，詣古仙山。

大目犍連，徒眾五百，化百千龍，盤身為座。龍口吐火，化成金臺、七寶床座，寶帳寶蓋，及諸幢幡，皆悉備足。目連處中，如琉璃人，表裏清徹，詣那乾訶。

舍利弗以神通力，化作雪山，白玉為窟。均提等五百沙彌，坐七寶窟，圍繞

雪山。

時，舍利弗坐白玉窟，如黃金人，放金色光，其光雜色，映耀雪山，敷揚大法，沙彌聽受，往詣彼國。

摩訶迦梅延與其眷屬五百比丘化作蓮花，猶如金臺，比丘處上，身下出水，化為流泉，流諸花間，水不滴地，上有金蓋，彌覆比丘，亦往彼國。

如是千二百五十大弟子，各有五百比丘作諸神通，如舍利弗、目犍連等，踊身虛空，如鴈王翔，往詣彼國。

爾時，世尊著衣持鉢，敕語阿難：「持尼師檀」。

爾時，世尊足步虛空。佛舉足時，四天王、釋提桓因、梵天王，無數天子百千天女，繞佛七匝，為佛作禮，侍從佛後。

爾時，世尊放項金光，化作一萬八千諸大化佛。一一化佛，復放光明。如此項光，亦復化作一萬八千諸大化佛，佛佛相次，滿虛空中，如鴈王翔，往至彼國。始到國界，王出奉迎，為佛作禮。

爾時，龍王見世尊來，父子徒黨十六大龍，興大雲雷，震吼雨雹。眼中出火口亦吐火，鱗甲身毛，俱出烟焰。五羅刹女現醜惡形，眼如掣電，住立佛前。

時，龍王子見虛空中滿中化佛，白其父言：「父王吐火，欲害一佛。試看空中，有無數佛！」

時，龍吐毒心意猛盛，訶責其子：「唯有一佛，何處有多？」

時，金剛神，手把大杵，化身無數。杵頭火燃，如旋火輪，輪輪相次，從空中下，火焰熱熾，猶如融銅，燒惡龍身。龍王驚怖，無走遁處，走入佛影，佛

影清涼，如甘露灑。龍得除熱，仰頭視空，滿空中佛。一一如來，放無數光。一一光中，無量化佛。一一化佛，亦放無數百千光明。時，諸光中一切皆是執金剛神奮金剛杵。龍見諸佛，極大歡喜；見諸金剛，極大惶怖。合掌恭敬，為佛作禮。五羅剎女，亦禮如來。

時，諸天子雨曼陀羅花、摩訶曼陀羅花、曼殊沙花、摩訶曼殊沙花，而以供養。天鼓自鳴，諸天叉手，空中立侍。

時，彼國王眷屬五千，燒眾名香，頭面禮佛，請佛就座。

時，彼龍王從龍池出，獻七寶床，手擎敷置，白佛：「世尊！惟願救我，莫使力士傷害我身。」

爾時，如來以梵音聲，猶如慈母撫卹嬰兒，令彼龍王及羅剎女受法王化，請

佛就座。

爾時，國王復敷高床毳毼毳毼極細軟者，張白氎縵，真珠羅網彌覆其上，請佛世尊令處縵中。

爾時，世尊舉足欲行，佛鹿王踴踴出五光，光有五色，繞佛七匝，如天妙花化成花帳。眾花葉間，百千無數諸化菩薩，合掌讚偈，有萬億音，空中化佛，放踴光明亦復如是。十六小龍，手執山石，霹靂起火，來至佛所。大眾驚怖，入佛光中。

爾時，世尊出金色臂，張合縵掌，指網縵間雨大寶花。大眾皆見化成化佛，唯諸龍見是金翅鳥欲搏噬龍。龍畏金翅，走入佛影，為佛作禮，叩頭求救。

佛至縵前，敕阿難言：「敷尼師檀」。

是時，阿難即入縵中，先舉右手，從左肩上取尼師檀。

時，尼師檀即復化成五百億金臺，七寶校飾。欲敷之時，即復化成五百億蓮花七寶莊嚴。正四角時，一角生五百億七寶蓮花，行行相次，遍滿縵內。

爾時，世尊就七寶床，結加趺坐。諸蓮花上，皆有佛坐。

時，諸比丘見佛坐已，為佛作禮，右繞七匝，各敷坐具。比丘坐具，皆悉化成琉璃之座。比丘就座時，琉璃座放琉璃光，作琉璃窟。諸比丘等，入火光三昧，身作金色。

時，彼國王見佛神變，歡喜合掌，遶佛七匝，為佛作禮。覩佛神化，應時即發阿耨多羅三藐三菩提心，敕諸臣下皆使發心。

爾時，龍王怖畏金剛大力士故，亦發阿耨多羅三藐三菩提心，五羅刹女亦發

菩提心。

爾時，大王為佛及僧欲設中饌。

佛告大王：「但辦食器，餘無所須。」

王受佛敕，具諸寶器。佛神力故，令諸器內，天須陀味自然盈滿。

時，諸大眾食是食已，自然得入念佛三昧，見十方佛身量無邊，復聞說法微妙音聲，其音純讚念佛、念法、念比丘僧，亦有廣說六波羅蜜、三十七品助菩提法。聞是語已，倍更歡喜，繞佛千匝。

爾時，國王請佛入城。

龍王怒曰：「汝奪我利，吾滅汝國。」

佛告大王：「檀越先歸，佛自知時。」

爾時，國王為佛作禮，逡巡而退。

爾時，龍王及羅剎女，五體投地，求佛授戒。佛即如法為說三歸五戒之法。

龍王聞已，心大歡喜。龍王眷屬百千諸龍，從池而出，為佛作禮。如來應時隨龍音類，為其說法，聞法歡喜。佛敕目連為其受戒。

爾時，目連入如意定，即自化身作百千億金翅鳥王。一一鳥王，足躡五龍，住在虛空。

時，諸小龍而作是言：「佛敕和上為我受戒，和上云何作恐怖像？」

目連告曰：「汝於多劫，不恐怖中橫生怖想、於無瞋恚生瞋恚想、於無害所橫生害想。我實是人，汝惡心故，見我是鳥。」

爾時，龍王以恐怖故，自誓不殺，不惱眾生，以發善心。

目連即時，還復本身，為說五戒。

爾時，龍王長跪合掌勸請世尊：「惟願，如來！常住此間。佛若不在，我發惡心，無由得成阿耨多羅三藐三菩提。惟願，如來！留神垂念，常在於此。」

殷懃三請，如是不止。

時，梵天王復來禮佛，合掌勸請：「願婆伽婆為未來世諸眾生故，莫獨偏為此一小龍。」

百千梵王，異口同音，皆作是請。

爾時，如來即便微笑，口出無量百千光明，一一光中無量化佛。一一化佛，萬億菩薩以為侍從。

時，彼龍王於其池中，出七寶臺，奉上如來：「惟願，天尊！受我此臺。」

爾時，世尊告龍王曰：「不須此臺，汝今但以羅剎石窟持以施我。」

時，梵天王無數天子先入窟中。時，彼龍王以諸雜寶以莊校窟。

佛告阿難：「汝教龍王淨掃石窟。」

諸天聞已，各脫寶衣，競以拂窟。

爾時，如來還攝身光，卷諸化佛來入佛頂。

爾時，如來敕諸比丘皆在窟外，唯佛獨入，自敷坐具。敷坐具時，令此石山暫為七寶。

時，羅剎女及以龍王，為四大弟子、尊者阿難，造五石窟。

爾時，世尊坐龍王窟，不移坐處。亦受王請，入那乾訶城，耆闍崛山、舍衛國、迦毘羅城、及諸住處，皆見有佛。

時，虛空中蓮花座上無量化佛，一切世界滿中化佛。龍王歡喜，發大誓願：「願我來世，得佛如此。」

佛受王請，經七日已，王遣一人乘八千里象，持諸供具遍一切國供養眾僧，到處皆見釋迦文佛。

信返白王：「如來世尊不但此國，餘國亦有！餘國諸佛皆說苦、空、無常、無我、六波羅蜜。」

王聞是語，豁然意解，得無生忍。

爾時，世尊還攝神足，從石窟出。與諸比丘，遊履先世為菩薩時，兩兒布施處、投身餓虎處、以頭布施處、剜身千燈處、挑目布施處、割肉代鴿處。如是諸處，龍皆隨從。

是時，龍王聞佛還國，啼哭雨淚，白言：「世尊！請佛常住，云何捨我？我不見佛，當作惡事，墜墮惡道。」

爾時，世尊安慰龍王：「我受汝請，坐汝窟中，經千五百歲。」

時，諸小龍合掌叉手，勸請世尊還入窟中。諸龍見佛坐己窟中，身上出水，身下出火，作十八變。小龍見已，復更增進堅固道心。

釋迦文佛踊身入石，猶如明鏡，人見面像。諸龍皆見佛在石內，映現於外。

爾時，諸龍合掌歡喜，不出其池，常見佛日。

爾時，世尊結加趺坐，在石壁內。眾生見時，遠望則見，近則不現。諸天百千供養佛影，影亦說法。

時，梵天王合掌恭敬，以偈頌曰：

如來處石窟 踊身入石裏 如日無障礙 金光相具足

我今頭面禮 牟尼救世尊

爾時，世尊化五百寶車，佛處車中，分身五百。

爾時，寶車住虛空中，迴旋自在，車轂輞間百千光明，一一光明無數化佛，不動不轉，到迦毘羅城，坐師子座，如入三昧。一毛孔中，有一佛出。一毛孔中，還一佛入。如是，出入滿虛空中。無量化佛，結加趺坐，是名如來坐時境界。

佛滅度後，佛諸弟子，若欲知佛行者，如向所說。

若欲知佛坐者，當觀佛影。觀佛影者，先觀佛像，作丈六想，結加趺坐，敷草為座，請像令坐。見坐了了，復當作想，作一石窟，高一丈八尺，深二十四

步，清白石想。此想成已，見坐佛像住虛空中，足下雨花。復見行想，入石窟中。入已，復令石窟作七寶山想。此想成已，復見佛像踊入石壁，石壁無礙猶如明鏡。此想成已，如前還想三十二相，相相觀之，極令明了。此想成已，見諸化佛，坐大寶花，結加趺坐，放身光明，普照一切。一一坐佛，身毛孔中，雨阿僧祇諸七寶幢。一一幢頭，百千寶幡。幡極小者，縱廣正等，如須彌山。此寶幡中，復有無數百千化佛。一一化佛，踊身皆入此石窟中佛影、臍裏。此想現時，如佛心說。

如是觀者，名為正觀。若異觀者，名為邪觀。

佛滅度後，如我所說觀佛影者，是名真觀如來坐。觀如來坐者，如見佛身，等無有異，除百千劫生死之罪。若不能見，當入塔觀一切坐像。見坐像已，懺

悔障罪。此人觀像因緣功德，彌勒出世，見彌勒佛，初始坐於龍華樹下結加趺坐。見已歡喜，三種菩提，隨願覺了。

云何名觀如來行詣拘尸那時降諸力士？

佛告父王：如來不久，當於彼國入般涅槃。爾時，五百力士除妨路石，盡力士力，不能令去。爾時，世尊化作沙門，以手挑石，石飛住空中。力士驚怖，此石設墮，走避無所，仰看空石皆成化佛，猶如金山，諸佛圍繞。力士見已，心大歡喜。時，化沙門倚臥樹下，如人晝眠，有日光明，從左脇出，如百億日入右脇中，一一日中有二寶樹，有大寶床，諸佛臥上，如是光明，遍照十方無量世界。一一世界，無量諸佛，倚臥樹下，皆有光明，從右脇入，左脇而出。如是光明，變成寶臺。行者悉見十方世界有一寶臺，此寶臺上，有一大佛，身

量巨小，與十方等，倚臥臺側。爾時，彼佛左脇流水，如琉璃珠。一一寶珠，如須彌山。一一山內，百千臥佛。一一臥佛，出大光明，亦如上說。右脇復出萬億乳河流注于下，滴滴化成百千化花，花有化佛臥蓮花上，各以右手灑甘露雨，令一切眾皆得服食。餓鬼眾生見此相時，自然飽滿。

爾時，空中，有妙音聲，讚四無量心，然後分別空無境界，無心心想寂滅境界。作是觀者，名觀如來臥。觀如來臥者，先當觀臥像，見臥像已當作是念：「佛在世時，所以現臥，諸佛如來體無疲倦，但為降伏剛強力士及諸邪見不善眾生，或復慈愍諸比丘故，現右脇臥。」

如來臥者，是大悲臥。欲觀佛臥，當行慈心。行慈心者：緣一切眾生，見受苦時，不惜身分成熟安樂，受苦眾生令得無患。

大悲心者：見諸眾生受苦惱時，如己父母、師長、善友，生悲哀心，淚如猛雨。如是等心，名為大悲。

見他受樂，心生歡喜，譬如比丘得第三禪，是名為喜。

捨者：一切眾生，無眾生相。作是觀時，先觀自身：地大，是眾生耶？水火風大，是眾生耶？色，是眾生耶？受想行識，是眾生耶？空，是眾生耶？非空，是眾生耶？如，是眾生耶？非如，是眾生耶？實際，是眾生耶？非實際，是眾生耶？有為空，是眾生耶？無為空，是眾生耶？如是分別解析時，不見眾生、不得眾生、無眾生想，心無所著，亦無志求，解如是等清淨法者，名為行捨。

佛告阿難：若有眾生樂觀佛臥者，是則真觀清淨慈定。若有眾生聞佛臥法，

及諸比丘隨順佛語，不壞威儀右脇臥者，當知是人，著慚愧衣服忍辱藥，如此比丘現世坐禪，見十方佛為說大法。若不坐禪不毀戒故，於未來世見十方佛，十方諸佛為說大法，聞法易悟，猶如壯士屈伸臂頃，應時即得阿羅漢道，三明六通，具八解脫。如來臥者，饒益眾生，以饒益故，名慈、悲、喜、捨。此四法者，出生諸佛諸菩薩母。

說是語已。佛於眾中，舉身放光，前八萬四千、左八萬四千、右八萬四千、後八萬四千、頂八萬四千。是諸毛孔，一一毛孔一毛旋生。一一毛端，有百萬億塵數蓮花。一蓮花上，無量無數微塵化佛。諸化佛身，高顯莊嚴，如千萬億諸須彌山。一一佛臍中，有五百萬億師子。一一師子，吐五百萬億諸供養具。一一供具，有五百萬億七寶花雲。一一寶花雲，有五百萬億諸偈頌雲，聲聲相

次，猶如雨滴。

爾時，如來復更明顯八十種好，金色光明，從白毫出。一一光明，遍照十方化成諸佛。是諸世尊，行者無數、住者無數、坐者無數、臥者無數。是諸化佛說大慈悲、說三十七品助菩提分法、說六波羅蜜，說佛如來十力、無畏、十八不共。此相現時，一億諸釋，心無所著，悟無生忍，佛為授記：「於未來世，過算數劫，當得作佛，號三昧勝幢，如來。應供。正遍知，十號具足。次第作佛，凡有一億。彼佛出時，娑婆世界清淨莊嚴，猶如聖伏幢世界光明佛剎，等無有異。是諸菩薩得佛道時，國土無有毀禁亂意不善之名，純是菩薩。雖有聲聞，不謗大乘。」

時，諸釋子聞佛授記，心大歡喜，各脫瓔珞，以散佛上。是諸瓔珞，當佛上

住，化成花樹。一一花樹，有恒沙花。一一花上，有恒沙寶樓。一一樓中，有恒沙化佛。一一化佛，演說八萬四千諸波羅蜜。

復有化佛教諸聲聞數息安般，流光白骨，白骨流光；心淨想，心不淨想；起結使想，滅結使想；斷使支想，殺使根想。如是諸想，九百億塵數，如數息安般說，是名聲聞法。

菩薩法者，唯有四法。何等為四？一者、晝夜六時說罪懺悔。二者、常修念佛，不誑眾生。三者、修六和敬，心不恚慢。四者、修行六念，如救頭燃。

佛告父王：如是等，名未來世觀佛三昧，亦名分別佛身，亦名知佛色相，亦名念佛三昧，亦名諸佛光明覆護眾生。

說是語時，天、龍、夜叉、八部鬼神，十二億眾發阿耨多羅三藐三菩提心，

自發誓願：「願於來世，常入三昧，見佛色身，如今無異。」

時，梵天王、釋提桓因、無數天子，為佛作禮，長跪合掌，而白佛言：「世尊！我等今者，得見如來色中上色，願當來世濁惡眾生，繫念思惟見佛色身。此願不虛，我今所說，及我所見，真實不虛，願令我等及諸天眾猶如佛身。」

作是語時，自見心中百萬光出，一一光明化成無量百千化佛。自見己身，身真金色，猶如難陀，等無有異。

時，諸梵天白佛言：如來世雄出現於世，必當利益一切眾生。昔弘誓願，今已得滿，不捨眾生，此語不虛故，我自見心想境界。未來眾生，亦當如是想佛真身！

佛告梵天：如汝所說，真實不虛。未來眾生但發是念，得無量福身相具足，

何況憶想！

佛說是語時，淨飯王及諸釋子、比丘尼、優婆夷，同時俱起，禮佛而退。

爾時，父王還至宮中，為諸婁女說佛相好。千二百五十婁女，聞佛白毫相，心生歡喜，除百萬億那由他生死之罪。空中有聲告諸女言：「汝聞佛相，除諸罪咎，應發無上三菩提心。」聞是語已，即見空中無量諸佛，見諸佛已，亦皆同時得念佛定。

時，諸比丘即從坐起，敬禮佛足，繞佛七匝，却住一面。

爾時，阿難偏袒右肩，合掌長跪白佛言：世尊！佛說三十二相，餘有一相。

如來云何不顯說耶？

爾時，世尊敕諸比丘各令還坐。

爾時，世尊自化左右，作五百億寶山。一一寶山，有四佛坐，四佛世尊讚歎念佛。佛即微笑，口五色光舌十四光，如此光明化成一佛，其佛臍中，流出五水，其色各異。一一色中，有九億菩薩。一一菩薩，頂上皆有梵摩尼光，光中皆有恒沙化佛。一一化佛，臍中出水，亦復如是。如是眾水流入佛臍，是諸化佛并化菩薩，皆入佛臍。是時，佛身表裏俱淨，過於淨妙勝琉璃珠，於佛身內有師子座。一一師子座，如須彌山。一座上，有一如來，九十億菩薩以為侍者。是諸菩薩頂上諸佛，如須彌山。如是十方無量諸佛臍中出水，皆與水俱，來入釋迦文佛臍。時，諸佛不大，釋迦不小。釋迦不大，諸佛不小。釋迦文佛身內心中有無量佛，一一佛不相障翳，舉身毛孔，說念佛法。時，諸化佛各申右手摩阿難頂：「汝今善持觀佛三昧，莫使忘失一心憶念，為未來眾生開光明

目。」

作是語時，過去七佛像住立空中，各申右手摩阿難頂，囑累是事。

時，虛空中有無數光，一一光中有無數化佛，異口同音囑累斯法。

⑦ 觀馬王藏品

佛告阿難：未來眾生，云何當觀如來陰馬藏相？

陰馬藏相者：我在家時，耶輸陀羅及五百侍女咸作是念：「太子生世，多諸奇特。唯有一事，於我有疑？」

嫫女眾中，有一女子名修曼那，即白妃言：「太子者，神人也。《毘陀經》說：若有神人質性清淨，以梵行故，身根平滿。太子今者，似梵行人，納妃多載，其諸嫫女奉事歷年，不見身根，況有世事？」

復有一女，名曰淨意，白言：「大家！我事太子經十八年，未見太子有便利患，況有諸欲！」

爾時，諸女各各異說，皆謂太子是不能男。

太子晝寢，皆聞諸女欲見太子陰馬藏相。

是時，太子誓願力故，應諸女人，安徐轉身，內衣被發，見金色身，光明晃耀，雙膝暫開，咸覩聖體，平如滿月，有金色光，猶如日輪。

諸女歡喜：「如此神人，實可敬愛。但於我等，世情望絕！」

作是語已，悲泣雨淚。

爾時，太子於其根處出白蓮花，其色紅白，上一下二，三花相連。

諸女見已，復相謂言：「如此神人，有蓮花相，此人云何心有染著？」

作是語已，噎不能言。

是時，花中忽有身根如童子形。諸女見已，更相謂言：「太子今者，現奇特事，忽有身根如是漸漸如丈夫形。」

諸女見此，滿己情願，不勝悅喜。

現此相時，羅睺羅母，見彼身根，花花相次，如天劫貝。一一花上，乃有無數大身菩薩，手執白花圍繞身根，現已還沒，如前日輪。此名菩薩陰馬藏相。

如來今者成菩提道，是大丈夫，具男子身，復當為汝顯現男相。

佛告阿難：汝未出家時，摩偷羅王有一乳母名頭牟婆，乳養彼王經十五載。王既長大，合掌長跪，從王求願，白言大王：「我雖卑賤，乳養大王，勤劬歷年，伏惟大王乞賜一願。」王白：「乳母欲求何等？」乳母即言：「在王宮中

如功德天，一切無乏，唯闕一事，所謂女人情願所幸。」王白乳母：「當以乳母配一大臣，義同伉儷。」乳母不願，白言大王：「貴人多事，非我所樂。願敕國內一切男子，十五已上，三十已還，皆悉從我。若能來者，我施彼人一大金錢。形醜陋者，當施銀錢。」時，彼國王報乳母恩，造一高樓，宣令國內敕諸男子：『如上所願，皆悉來集。』經歷年歲，乳母衰老，多招諸女，遂有五百，一一女人，復買諸婢，種種莊飾，數滿八千。

時，彼國王遘疾崩亡，太子紹位。智臣白言：「先王報恩，恣此老婢，令王國土如姪女村，損辱國望，實自不少。用此何為？宜時擯徙！」白已出外，焚燒高樓，驅逐諸女。

諸女惶怖，詣舍衛國。既到舍衛，於四衢道，造立姪舍，作妖如前。舍衛大

國多諸人眾，湊諸女家，經一宿者，輸金錢二百。國有長者名如閻達，積財百億，長者有子名曰華德，兄弟三人，遊蕩無度，競奔姪舍。始初一往，各各皆輸金錢十五，日日夜夜，恒輸金錢過倍常人，經一月中，一藏金盡。其父長者案行諸藏，見一藏空，問守藏者：「此藏中金，為何所在？」典藏白言：「大家諸子，日日持金往姪女舍，若不制止，用金當盡。」長者聞已，椎胸大哭：「嗚呼！賊子破我家居。」手執大杖打兒母頭，其婦號哭：「嗚呼！賊子生兒無益，偷金藏盡。父無訓範，素不嚴敕，見打何為？」長者瞋恚，號哭詣王，腹拍王前，白言：「大王！國內荒亂。摩偷羅國諸羅剎女，來住此城，破我家業。」王語長者：「汝甚大富，金藏猶盡，況餘凡下，寧不困耶？」長者白王：「惟願，大王！速誅惡人。」王告長者：「吾受佛戒，猶不傷蟻，況欲殺

人？」長者聞此，舉手拍頭，白言：「大王！臣聞『王者，誅罰惡人。』為國除患，當有何罪？今日，大王與惡為伴，縱諸姪女，壞亂正法，國荒民窮，戒將安存？」

王告長者：「如來出世，多所調伏。鴛掘摩羅，氣噓旃陀羅。大力鬼王、羅剎、魁膾，一切皆化。今當詣佛，啟白此事，卿可小忍。」安慰臣已，駕乘名象，與諸侍從，往詣祇洹，為佛作禮，繞佛三匝，合掌長跪，白言：「世尊！摩偷羅國諸姪女等，今來此間，惑諸年少，願佛化之。」

佛告大王：「却後七日，佛自知之。」

時，波斯匿王禮佛而退。

佛告摩訶迦葉：汝往須達大長者家，可白檀越：「却後七日，佛詣試場化諸

姪女。」

須達聞已，歡喜踊躍，辦諸供具，作七寶花，高十一丈，置佛坐處，懸諸繪蓋，香汁灑地。其日已至，王擊金鼓，令諸國內諸論議師皆詣試場。

須達長者請諸比丘、比丘尼、優婆塞、優婆夷，一切皆集，當設供養。

明日時到，王與諸人詣論議場，長者如閻達，遣旃陀羅喚諸姪女。

須達長者亦白時到。

是時，如來敕千二百五十比丘：「汝諸比丘！各隨定意，現大神通。」

上座憍陳如與四比丘，化作一窟，大如香山百千蓮花，一一花上有五比丘結加趺坐，身出金光令身金色，端嚴可愛，猶如彌勒。

復有化人作十八變，一一變中有十八比丘，作十八變神通可觀。中有入三昧

者、中有經行者，光明迴旋，猶如金山生諸寶花。比丘在窟，身心不散，飛到試場，坐於上位。

鬱毘迦葉，踊身空中，化作六龍，蟠身相結，為比丘座。在其座上，作十八變，飛至試場。

伽耶、那提兄弟二人，踊身虛空，化作大石窟，入火光定，作十八變，飛至試場。

大德摩訶迦葉，著千納衣，手擎鉢盂，執持威儀，足步虛空。步步之中，化一寶樹。一一樹下，有化迦葉，經行林中，作十八變，亦至試場。

大智舍利弗，踊身空中，作十八變，身上出千日，光明赫奕，不相障蔽；身下出千月，如秋滿月，團圓可愛，作十八變，飛至試場。

大目犍連，踊身空中，化作八萬四千師子座，一一師子，閉目伏地，白如雪山。大目犍連坐其背上，作十八變，飛至試場。

尊者優波離，踊身空中，於虛空中敷尼師檀，結加趺坐，入慈三昧，身諸毛孔，流出金光，作十八變，飛至試場。

大迦旃延，踊身空中，化作十五摩醯首羅，一一天子乘一牛王，頭上生花，大迦旃延處此花座，作十八變，飛至試場。

須菩提，踊身空中，冥然不現，但聞語聲，說如是偈：

一切法如性 無我無眾生 亦無婬欲想 當復教化誰

諸法本無性 亦無名字想 愛著故起欲 當復教化誰

說是語已，作十八變，飛至試場。

時，阿那律，踊身空中，化萬梵王，作諸梵宮。比丘處中，作十八變，飛至試場。

羅睺羅、難陀，時二比丘踊身空中，化作寶樓，比丘處中，入深禪定，作十八變，飛至試場。

如是千二百五十比丘各現異變，亦作十八種神通，飛至試場。

爾時，世尊獨將阿難，持尼師檀，手執澡罐，世尊在前，阿難在後，從佛鉢盂中有六蓮花，一一蓮花放金色光，照舍衛國，令作金色。澡罐水中，有大金幢。其金幢頭，有五百光。一一光明，化千化佛，三十二相皆悉具足，足步虛空，飛至試場。

波斯匿王及諸大眾，散花燒香，為佛作禮，百千天樂，不鼓自鳴，歌詠如來

無量功德。

波斯匿王長跪合掌，勸請如來令化姪女。

佛坐花座，為諸大眾，略說苦、空、無常、諸波羅蜜，諸女不受。

時，女眾中，有一姪女，名曰可愛，告諸女言：「沙門瞿曇本性無欲，人言不男，故於眾中演說苦空，毀欲不淨。若有身分皆具足者，於大眾中，應去慚愧，如尼撻子，出身示我。審有此相，我等歸伏，為其弟子。若無此相，虛說不淨。此無根人，性自無欲，云何不說欲為不淨？」

說是語已，如來爾時化作一象，如轉輪聖王象寶，時象脚間出一白花，猶如象支，漸漸跂地。

諸女見已，歡喜大笑，各相謂言：「沙門善幻，乃化作此。」

佛復化作一馬王像，出馬王藏，如琉璃筒，下垂至膝。

諸女見已，彌言是幻。

末利夫人見此化相，白諸比丘尼及優婆夷：「我等諸女，宜各退還。姪女所說，不可聽聞。世尊大慈，今欲化之，必作異變，我等宜避。」禮佛而退。

佛敕阿難：「汝告波斯匿王及諸比丘，各自遊戲。」

波斯匿王白諸大德：「如來大慈欲化姪女，我等今者，宜各遠去。」

作是語已，却行而退，唯此千二百五十比丘侍立佛後。

佛告憍陳如：「將汝徒眾經行林中。」

五百比丘大智舍利弗為眾上首，猶故合掌，侍佛左右。

佛告舍利弗：「汝亦隨意，與諸論師論講所宜。」

五百比丘隨舍利弗後至華林中，為波斯匿王更說四諦。

唯阿難在。佛告阿難：「汝留坐具，汝亦宜去。」

作是語已，是時世尊獨往女所。

是時，諸女見佛獨在，高聲大笑，白言：「沙門！汝今為有身分不耶？」

佛言：「我具男身，是大丈夫。」

諸女聞已，掩口而笑。

爾時，世尊敷尼師檀，金剛地神化作金床，七寶為脚在坐具下，佛坐其上。

褻僧伽梨，披僧祇支，示胸卍字，令女見之。諸女見字，如百千男子，年皆盛壯，顏貌奇特，甚適女意。佛復披泥洹僧，見佛身體，泯然平滿，有金色光猶如千日。諸女見已，皆言：「瞿曇是無根人。」佛聞此語，如馬王法，漸漸出

現，初出之時，猶如八歲童子身根，漸漸長大，如少年形。諸女見已，皆悉歡喜。

時，陰馬藏漸漸長大如蓮花幢，一一層間有百億蓮花。一一蓮花，有百億寶色。一一色中，有百億化佛。一一化佛，百億菩薩無量大眾，以為侍者。

時，諸化佛異口同音，毀諸女人惡欲過患，而說偈言：

若有諸男子 年皆十五六 盛壯多力勢 數滿恒河沙

持以供給女 不滿須臾意

時，諸女人聞此語已，心懷慚愧，懊懣蹙地，舉手拍頭，而作是言：「嗚呼惡欲，乃令諸佛說如此事。我等懷惡，心著穢欲，不知為患，乃令諸佛聞如此弊，猶如盛火焚燒我等！」

說是語時，見虛空中一切化佛，廣為諸女說不淨觀，所謂：九想、十想、三十想、數息安般。

諸女聞說不淨觀法，樂禪定樂，不樂愛欲。

爾時，世尊還攝身光，端坐金床，大眾雲集，還到佛所。

波斯匿王白言：「世尊！如來出世，多所利益，乃於此處，現大光明，況餘身分無量功德！」

一切諸天在虛空中，亦讚如來百千梵行：「如來梵行乃得如此，勝陰馬藏沒無處所，顯出金花化佛無數，是持戒報功德巍巍。」

時，諸女人聞此說已，四千女等發阿耨多羅三藐三菩提心，二千女人遠塵離垢得法眼淨，二千女人於未來世過十二劫，次第當得辟支佛道。

長者如閻達見佛現化惡魔女人，讚言：「善哉！善哉！如來昔者破波旬軍，今化諸女與本無異。此相現時，無量諸天發菩提心。」

波斯匿王所將士眾有五百人求佛出家，鬚髮自落，身所著衣，變成袈裟，應時即得阿羅漢道。

是時，大眾見馬王藏，心歡喜者，除五十億劫生死之罪，禮佛而退。

佛告阿難：我昔夏安居時，波羅捺國有一婬樓，樓上有女名曰妙意。昔日，於佛有重因緣。

我與難陀及將汝往此婬女舍，日日乞食。此女，於我不曾恭敬。於難陀所，偏生愛著。

已經七日。女心念言：「沙門瞿曇若能遣弟難陀、阿難，從我願言，我當種

種供養沙門。」

佛告阿難、難陀：汝從今日，莫往彼村。

世尊自獨執鉢而行，至女樓所，一日至三日，放金色光，化諸天人，此女不悟。

後日，世尊復將阿難、難陀，在樓下行。姪女愛敬二比丘故，遙以眾花散佛及二比丘。

阿難告言：「汝可禮佛」。

女愛阿難，應時作禮。

爾時，世尊化三童子，年皆十五，面貌端正，勝諸世間一切人類。

此女見已，身心歡喜，為化年少，五體投地，敬禮年少。白言：「丈夫！我

今此舍如功德天，福力自在，眾寶莊嚴。我今以身及與奴婢奉上丈夫，可備灑掃。若能顧納隨我所願，一切供給，無所愛惜。」

作是語已，化人坐床。未及食頃，女前親近，白言：「丈夫！願遂我意。」

化人不違，隨己所欲，即附近已。一日一夜，心不疲厭。至二日時，愛心漸息。至三日時，白言：「丈夫！可起飲食。」

化人即起，纏綿不已。女生厭悔，白言：「丈夫！異人乃爾。」

化人告言：「我先世法，凡與女通，經十二日，爾乃休息。」

女聞此語，如人食噎，既不得吐，又不得咽，身體苦痛，如被杵擣。

至四日時，如被車轢。至五日時，如鐵丸入體。至六日時，支節悉痛，如箭入心。

女作念言：「我聞人說『迦毘羅城淨飯王子，身紫金色，三十二相，愍諸盲冥，救濟苦人。恒在此城，常行福慶。放金色光，濟一切人。』今日，何故不來救我？」

作是念已，懊惱自責：「我從今日，乃至壽終，終不貪色。寧與虎狼師子惡獸，同處一穴，不貪色欲受此苦惱。」

作是語已。復起飯食，行坐共俱，無奈之何。

化人亦瞋：「咄！弊惡女廢我事業。我今共汝合體一處，不如早死。父母宗親若來覓我，於何自藏？我寧經死，不堪受恥。」

女言：「弊物，我不用。爾欲死，隨意。」

是時，化人取刀刺頸，血流滂沱，塗污女身，萎沱在地。女不能勝，亦不得

免。

死經二日，青瘀臭黑。三日臃脹，四日爛潰，大小便利，及諸惡虫，迸血諸膿，塗漫女身。女極惡厭，而不得離。至五日時，皮肉漸爛。至六日時，肉落都盡。至七日時，唯有臭骨，如膠如漆，粘著女身。

女發誓願：「若諸天神及與仙人、淨飯王子能免我苦，我持此舍一切珍寶以用給施。」

作是念時，佛將阿難、難陀，帝釋在前，擎寶香爐，燒無價香。梵王在後，擎大寶蓋，無量諸天鼓天妓樂。佛放常光，明耀天地，一切大眾皆見如來詣此女樓。

時女見佛，心懷慚愧，藏骨無處。取諸白氎無量眾香纏裹臭骨，臭勢如故，

不可覆藏。

女見世尊，為佛作禮。以慚愧故，身映骨上，臭骨忽然在女背上。女極慚愧流淚，而言：「如來功德，慈悲無量。若能令我離此苦者，願為弟子，心終不退。」

佛神力故，臭骨不現。女大歡喜，為佛作禮，白佛言：「世尊！我今所珍一切施佛。」

佛為呪願，梵音流暢。女聞呪願，心大歡喜，應時即得須陀洹道。五百侍女聞佛音聲，皆發無上菩提道心。無量梵眾，見佛神變，得無生忍。帝釋所將諸天子等，有發菩提心者，有得阿那含者。

佛告阿難：我昔初成道時，伽耶城邊住熙連河側，有五尼捷。第一尼捷名薩

闍多，五百徒眾。餘四各有二百五十弟子。時，諸尼捷自稱得道，來至我所，以其身根繞身七匝，來至我所，敷草而坐，即作是語：「瞿曇！我無欲故，梵行相成。我之身根，乃能如此如自在天。我今神通過踰沙門百千萬倍。沙門作一，我當作二。」

即於地中化作一樹，以其身根絞繞著樹，滿七匝已，令樹雲霧如龍王氣。高聲大喚，舉手唱言：「瞿曇！我梵行相，事驗如此。汝稱男子，言大丈夫，以何為證？」

爾時，世尊化作寶枷，寶枷兩頭有十四珠，一一明珠有千光明。一一光明，化成化佛，作十八變，住立空中。世尊現化，倒住空中，脚在枷上。時，佛二足出千蓮花，一一蓮花萬億光明。一一光中，有百億寶臺。一一臺中，無數化

佛。一一化佛，各攝一脚，猶如卷琉璃，令脚不現。一切化佛及釋迦文，悉懸一脚，倒住空中。唯諸尼捷見佛倒住，無量天龍八部鬼神，見佛世尊安坐講堂敷演大法，所謂：無相、無我等法。

時，空有聲告諸尼捷：「佛已作一，汝可作二。」

時，諸尼捷即自騰擲，手搏樹枝，抱樹而立，盡尼捷術，不能倒立。

樹神現身手搏其耳，罵言：「狂人！汝如小虫，敢與獸王師子共戰。汝向大喚：『佛若作一，我當作二。』佛今已住大神通力，汝何不為？」

樹神罵已。地神堅牢即從地出，住立空中，以大鐵鎖鎖尼捷脚，倒懸空中。

有五夜叉以杖撻之，尼捷痛急，自掣墜地。未至地頃，有一尼捷稱：「南無佛！」世尊以手接管尼捷，令身不痛。

時，諸尼捷既至地已，妬心不歇，語地神言：「汝無慈心，偏為瞿曇。汝宿罪故受夜叉身在此地下，今日復更無慈普愛，但為瞿曇困苦我等。」

時，恒河神飛住空中，手執大石，告言：「尼捷！如汝癡人，服食牛糞，石灰塗頭，令髮禿落，裸形無恥。猶如驢馬，亦如貧龍，不能潤益。如來佛日普照一切，汝今云何持黑闇身與日爭光？」

爾時，水神唱是語已，勸請世尊伏諸尼捷。

爾時，世尊告諸尼捷：汝等不知如來身分。若欲見者，隨意觀之。如來積劫修行梵行，在家之時無邪欲想，心不染累，故得斯報。猶如寶馬，隱顯無常。今當為汝，少現身分。

爾時，世尊從空而下，即於地上化作四水如四大海，四海之中有須彌山，佛

在山下，正身仰臥，放金色光，其光晃耀，映諸天目。徐出馬藏，繞山七匝，如金蓮花，花花相次，上至梵世。從佛身出一億那由他雜寶蓮花，猶如花幢覆蔽馬藏。此蓮花幢有十億層，層有百千無量化佛。一一化佛，百億菩薩，無數比丘，以為侍者。化佛放光，照十方界。

尼捷見已，大驚心伏：「佛梵行相，乃至如此不可思議。形不醜惡，猶如蓮花，我今頂禮佛功德海，佛智無邊不可窮盡，受我懺悔，攝取我等。」

作此語已，五百尼捷合掌叉手，長跪在地，求佛出家。

佛言：善來比丘！

佛敕迦葉為辦衣服。

迦葉，爾時至仙人所，告大仙人：「今日，世尊伏諸尼捷！惟願仙士施少衣

裳。」

時，諸仙人取好樹皮，多羅樹葉裁縫為衣。

時，諸仙人師名曰光目，合掌叉手，告諸弟子：「佛德無量，弘誓周普，乃攝受此著邪見人。我宜辦衣給裸形者，亦敬佛寶，可脫諸苦。」

說是語已，從迦葉後，至世尊所。五百仙人見蓮花臺從佛身出，如眾蓮花圍繞須彌上至梵世。

時，諸仙人見此事已，歡喜合掌敬禮世尊。諦觀世尊，目不暫捨，見佛眉間白毫相光右旋婉轉，及見佛身一切眾相。作是思惟：「此相好者，必從前世，無縛無著、無我無作、無心無識、無人無物、無施無受、清淨檀波羅蜜生，亦隨一切平等無相、大智空慧般若波羅蜜生。」

思是義已，應時即逮無生法忍。

五百尼撻著僧伽梨，為佛作禮。未舉頭頃，應時即得阿羅漢道，三明六通，具八解脫。

一一尼撻，誓願當度。五百尼撻現此相時，無量諸天、龍、夜叉眾，見佛梵行清淨果報，身心歡喜，發阿耨多羅三藐三菩提心。

佛告阿難：佛滅度後，天眾、龍眾、夜叉眾、沙門眾、婆羅門眾，問「佛世尊過去世時清淨無欲修諸梵行得何果報？」汝當答言：「佛有馬王藏相，與身平等，七合盈滿，如金剛器中外俱淨，為度眾生，出現是相，化佛光明，妙蓮花雲，其數無量。如此身者，從無數世無染安隱善持戒、慧、尸波羅蜜生。」

佛敕阿難：佛滅度後，佛諸弟子，欲觀如來陰馬藏相，當作是觀。

如是觀者，是名正觀。若異觀者，名為邪觀。

佛滅度後，佛諸弟子，若有繫心正念思惟佛梵行相化佛光明者，常於夢中見十方佛。此人生生，恒修梵行，除却二十萬劫生死之罪。

說是相時，夜叉眾中八千夜叉身心歡喜，讚歎如來無量德行，應時即發阿耨多羅三藐三菩提心。

⑧ 本行品

佛告阿難：如來有三十二大人相、八十種隨形好，金色光明。一一光明，無量化佛。身諸毛孔，一切變現，及佛色身略中略者，我今為此時會大眾及淨飯王，略說相好。

佛生人間，示同人事。同人相故，說三十二。勝諸天故，說八十好。為諸菩

薩，說八萬四千。諸妙相好，佛實相好。我初成道，摩伽陀國寂滅道場，為普賢、賢首等諸大菩薩，於《雜花經》已廣分別。此尊法中，所以略說，為諸凡夫及四部弟子。謗方等經、作五逆罪、犯四重禁、偷僧祇物、姪比丘尼、破八戒齋、作諸惡事、種種邪見，如是等人，若能至心一日一夜繫念在前，觀佛如來一相好者，諸惡罪障，皆悉盡滅。

是故，如來名婆伽婆、名阿羅呵、名三藐三佛陀、名功德日、名智滿月、名清涼池、名除罪珠、名光明藏、名智慧山、名戒品河、名迷衢導、名邪見燈、名破煩惱賊、名一切眾生父母、名大歸依處。

若有歸依佛世尊者、若稱名者，除百千劫煩惱重障，何況正心修念佛定！

佛告阿難：如來往昔無量無邊阿僧祇劫，以智慧火燒煩惱薪，修無相定不非

時證。是故，獲得如是勝相，一一相中無量化佛，何況多相！

若能繫心觀一毛孔，是人名為行念佛定。以念佛故，十方諸佛常立其前，為說正法。此人即為能生三世諸如來種，何況具足念佛色身！

如來亦有無量法身，十力、無畏、三昧解脫諸神通事。如此妙處，非汝凡夫所學境界，但當深心起隨喜想。起是想已，當復繫念念佛功德。

念佛功德者，所謂：戒、定、智慧、解脫、解脫知見、金色三十二相、八十隨形好、十力、四無所畏、十八不共法、大悲三念處是。

若有眾生，一聞佛身如上功德相好光明，億億千劫，不墮惡道，不生邪見雜穢之處。常得正見，勤修不息。但聞佛名，獲如是福，何況繫念觀佛三昧！

爾時，世尊說此語時，於虛空中有七寶臺，一一臺上有億寶蓋，天雨寶花供

養釋迦牟尼佛。

時，文殊師利法王子，結加趺坐，坐寶臺中，與十億菩薩住虛空中，讚言：「善哉！善哉！釋迦牟尼大悲世尊！說佛身相，示佛威儀，現佛光明，顯諸化佛，為未來世凡愚眾生不見佛者，作見佛因。善哉！阿難！慈悲法子！汝名歡喜。依名定實，善持佛語，慎勿忘失。未來眾生聞汝說者，即是見佛；思此義者，具足見佛微妙色身。」

爾時，文殊說此語已，與諸菩薩眷屬大眾從空而下，敬禮佛足，繞佛七匝，却住一面。

佛告文殊：佛子！汝今在座作此觀時，地生蓮花縱廣正等滿一由旬。

文殊師利及諸菩薩，坐蓮花上。

爾時，文殊師利法王子既已坐竟，白佛言：世尊！我今自欲說於往昔本生因緣。惟願，世尊！加我威神。

佛告文殊：速說勿疑！

文殊師利告諸大眾，對尊者阿難：阿難！當知：我念過去無量數劫，復倍是數不可思算阿僧祇劫，彼世有佛名寶威德，如來。應供。正遍知。明行足。善逝。世間解。無上士。調御丈夫。天人師。佛世尊。彼佛出時，眾生弊惡，與今無異。彼佛世尊，亦長丈六，身紫金色，說三乘法如釋迦文。爾時，彼國有大長者名一切施，長者有子名曰戒護。在母胎時，母信敬故，豫為其子受三歸依。子既生已，年至八歲，父母請佛於家供養。童子見佛安行徐步，足下生花有大光明。見已歡喜，為佛作禮。禮已諦觀，目不暫捨。一見佛已，即能除却

百萬億那由他劫生死之罪。從是已後，恒得值遇百億那由他恒河沙佛。於諸佛所，殖眾德本。是諸世尊皆說如是觀佛三昧，亦讚白毫大人相光，勸多眾生懺悔繫念。

過是已後，復得值佛，名摩尼光多陀阿伽度，阿羅呵。三藐三佛陀。摩尼光佛出現世時，常放光明以作佛事度脫人民。

如是，二萬佛皆同一號，名摩尼光。

時，諸世尊皆以化佛微妙光明誘接眾生。

次復有佛，名栴檀摩尼光，十號具足。如是，百億佛皆號摩尼光。是諸世尊誓願力故，正以眉間白毫相光，覆護眾生，除滅眾罪。

復有佛出，名栴檀海，如來。應供。正遍知。如是，百萬佛皆同一字，名栴

檀海。是諸世尊！以胸德字卍字印光化度眾生。

時，彼童子親侍諸佛，間無空缺。禮拜供養合掌觀佛，觀佛功德因緣力故，復得值遇百萬阿僧祇佛。彼諸世尊，亦以身色化度眾生。從是已後，即得百千億念佛三昧，得百萬阿僧祇旋陀羅尼。既得此已，諸佛現前說無相法，須臾之間，得首楞嚴三昧。

時，彼童子受三歸依。一禮佛故，諦觀佛相，心無疲厭。由此因緣，值無數佛，何況繫念具足思惟觀佛色身！

時，彼童子豈異人乎？今我身是！

爾時，世尊讚文殊師利言：善哉！善哉！文殊師利！乃於昔時一禮佛故，得值爾許無數諸佛，何況未來我諸弟子勤觀佛者！

佛敕阿難：汝持文殊師利語，遍告大眾及未來世眾生：「若能禮拜者、若能念佛者、若能觀佛者，當知此人與文殊師利等無有異，捨身他世，文殊師利等諸大菩薩為其和上。」

說是語時，菩薩眾中有一佛子名曰財首，即從座起，繞佛七匝，恭敬禮拜，亦禮文殊師利足。以天曼陀羅花、摩訶曼陀羅花、曼殊沙花、摩訶曼殊沙花，而散佛上，及散文殊師利上，亦散尊者阿難。是諸天花當於佛上化為花臺，於花臺內有十方佛結加趺坐。

東方善德佛告大眾言：汝等！當知：我念過去無量世時，有佛世尊，名寶威德上王，如來。應。正遍知，彼佛出時，亦如今日說三乘法。時，彼佛世有一比丘有九弟子，與諸弟子，往詣佛塔禮拜佛像。見一寶像，嚴顯可觀。既敬禮

已目諦視之，說偈讚歎，隨壽修短，各自命終。既命終已，生於東方寶威德上王佛國土，在大蓮花結加趺坐忽然化生。從此已後，恒得值遇無量諸佛，於諸佛所，淨修梵行，得念佛三昧海。既得此已，諸佛現前即與授記，於十方面隨意作佛。東方善德佛者，則我身是。南方栴檀德佛、西方無量明佛、北方相德佛、東南方無憂德佛、西南方寶施佛、西北方花德佛、東北方三乘行佛、上方廣眾德佛、下方明德佛，如是等十佛世尊，因由禮塔一讚偈故，於十方面得成為佛，豈異人乎？我等十方佛是！

時，十方佛從空而下，放千光明，顯現色身白毫相光，各各皆坐釋迦佛床，各伸右手摩阿難頂告言：法子！汝師和上釋迦牟尼！百千苦行，無數精進，求佛智慧，報得是身。光明色相，今為汝說。汝持佛語，為未來世，天、龍、大

眾、比丘、比丘尼、優婆塞、優婆夷，廣說觀佛法及念佛三昧。

說是語已，然後問訊釋迦文佛起居安隱！

既問訊已，放大光明，各還本國。

時會大眾見十方佛，及諸菩薩國土大小，如於明鏡見眾色像。

財首菩薩所散之花，當文殊上，即變化成四柱寶臺。於其臺內，有四世尊，放身光明，儼然而坐。東方阿閼、南方寶相、西方無量壽、北方微妙聲。

時，四世尊以金蓮花散釋迦佛。未至佛上，化為花帳，有萬億葉，一一葉間百千化佛，化佛放光，光中復有無數化佛。寶帳成已，四佛世尊，從空而下，坐釋迦佛床，讚言：「善哉！善哉！釋迦牟尼！乃能為於未來之世濁惡眾生，說三世佛白毫光相，令諸眾生得滅罪咎。所以者何？我念昔曾空王佛所出家學

道，時四比丘共為同學，習學三世諸佛正法，煩惱覆心，不能堅持佛法寶藏，多不善業，當墮惡道。空中聲言：『汝四比丘！空王如來雖復涅槃，汝之所犯謂無救者，汝等今當入塔觀佛，與佛在世，等無有異。』我從空聲，入塔觀像眉間毫相，即作是念：『如來在世，光明色身，與此何異？佛大人相，願除我罪。』作是語已，如大山崩，五體投地，懺悔諸罪，觀佛眉間。懺悔因緣，從是已後八十億阿僧祇劫，不墮惡道，生生常見十方諸佛，於諸佛所，受持甚深念佛三昧。得三昧已，諸佛現前授我記莂。東方有國，國名妙喜，彼土有佛，號曰阿閼，即第一比丘是。南方有國，國名歡喜，佛號寶相，即第二比丘是。西方有國，國名極樂，佛號無量壽，第三比丘是。北方有國，國名蓮花莊嚴，佛號微妙聲，第四比丘是。」

時，四如來各申右手摩阿難頂，告言：「法王子！汝持佛語，廣為未來諸眾生說。」

三說此已，各放光明，還歸本國。

財首菩薩所散諸花住阿難上者，化成花雲遍滿十方。一一雲間，無數化佛，各申右手摩阿難頂，告言：「法王子！諸佛如來所有化身，亦如我等，等無有異。汝今親見，當為未來一切眾生廣分別說，令諸眾生修行念佛。若念佛者，得見化佛，與今無異。若有眾生聞汝所說，則為見佛，除無量罪。」

爾時，財首菩薩白佛言：世尊！我念過去無量世時，有佛世尊，亦名釋迦牟尼。彼佛滅後，有一王子名曰金幢，憍慢邪見，不信正法。知識比丘，名定自在，告王子言：「世有佛像，眾寶嚴飾，極為可愛，可暫入塔，觀佛形像。」

時，彼王子隨善友語，入塔觀像，見像相好，白比丘言：「佛像端嚴，猶尚如此，況佛真身！」作是語已。比丘告言：「汝今見像，若不能禮者，當稱『南無佛』。」是時，王子合掌恭敬，稱「『南無佛』」！還宮繫念念塔中像，即於後夜夢見佛像。見佛像故，心大歡喜，捨離邪見，歸依三寶，隨壽命終，由前入塔稱南無佛因緣功德，恒得值遇九百萬億那由他佛，於諸佛所，常勤精進，逮得甚深念佛三昧。三昧力故，諸佛現前為其授記。從是以來百萬阿僧祇劫，不墮惡道。乃至今日，獲得甚深首楞嚴三昧。爾時，王子，今我財首是也！

如是等諸大菩薩其數無量，各說本緣，依念佛得，如《本生經》說。

爾時，世尊告諸大眾：我念過去無數劫時，爾時，有佛，號栴檀窟莊嚴，如來。應供。正遍知。明行足。善逝。世間解。無上士。調御丈夫。天人師。佛

世尊，十號具足。在閻浮提諸德山中，於彼山中出家學道，足滿七劫，成阿耨多羅三藐三菩提。爾時，彼世有二童子，多聞無厭，遊行國界，問諸婆羅門。時，有一婆羅門名牢度叉伽，告言：「童子！世間有佛名栴檀窟，汝等二人可詣彼所，求論義法。」時，二童子，長者名為一切喜見，第二童子名勇猛鎧，共詣佛所，各持天花共散如來。爾時，世尊寂然禪定，入三昧王三昧，身心不動，普現一切諸佛色身，光明無數如般若波羅蜜說。時，二童子見佛色身，及見光明，即時超越那由他恒河沙阿僧祇劫生死之罪，恒得值遇無量無數百千諸佛，於諸佛所，修行甚深念佛三昧，現前得見十方諸佛，為其演說不退法輪。爾時，第一童子，豈異人乎？今彌勒菩薩是。第二童子，今我釋迦牟尼是！我與賢劫諸菩薩，曾於過去栴檀窟佛所，聞是諸佛色身變化觀佛三昧海，以是因

緣功德力故，超越九百萬億阿僧祇劫生死之罪。於此賢劫，次第成佛，最後樓至如來，亦於此處說觀佛三昧。

佛告阿難：此觀佛三昧，是一切眾生犯罪者藥、破戒者護、失道者導、盲冥者眼、愚癡者慧、黑闇者燈、煩惱賊中是勇健將，諸佛世尊之所遊戲，首楞嚴等諸大三昧始出生處。

佛告阿難：汝今善持，慎勿忘失。過去未來三世諸佛，是諸世尊皆說如是念佛三昧。我與賢劫諸大菩薩，因是念佛三昧力故，得一切智威神自在。如是，十方無量諸佛，皆由此法成三菩提。

爾時，尊者阿難佛神力故，自識宿命無數劫事，白佛言：世尊！我念過去無數億劫，有佛世尊名日月燈明，十號具足。我於彼世，見佛如來放大光明，其

光遍照十方世界，皆作金色。一一光中有諸化佛，我見是已，身心歡喜，稱：「南無佛」！從是以來，常得值遇百千諸佛，聞佛說法，猶如瀉水置之異器，憶持不忘。是故，我今得見世尊，親自供侍。

作是語已，說諸偈頌，讚歎諸佛微妙色身。

爾時，空中有無數佛，皆現光明，身身毛孔中所出化佛如釋迦文，皆告阿難言：「法子！汝今持是觀佛三昧，廣為一切大眾分別，令諸凡夫種見佛因。」

說是語已，化佛不現。

爾時，世尊為囑累此事故，住立空中，威儀自在，作十八變，顯一切光，告阿難言：若有眾生欲觀佛者，當如此觀。

佛說此語時，十二億天子得念佛三昧，現前受記。

⑨ 觀像品

爾時，會中有菩薩摩訶薩名曰彌勒，即從座起，偏袒右肩，頂禮佛足，脫身瓔珞，奉上如來。以真珠花。散佛世尊及文殊師利，所散瓔珞，自然踊住於虛空中，化成八萬億寶臺。一一臺中，有百億釋迦文佛，皆放光明，普現色身，山林河海一切眾生所有妙色，星宿日月諸須彌山，諸天龍神及諸宮殿，亦於中現。五通神仙百億呪術，九十六種諸邪見道，醫方技藝工巧文詠，皆於一毛顯現此事。世間邪見穢欲眾生所希見者，亦於光明悉自踊出。地獄、畜生、諸阿修羅，八難、四倒諸不祥事，受報好醜，亦於此相自得覺知。所散珠花住佛上者，化作百億白色光明。住文殊上者，化作百千億微妙色光。此諸光明，互相交絡，如大龍王蟠身相向。一一光中，五億寶光，如僧伽梨割截分明，以金色

光，縫持令住，縷出入處，生四寶花。一一花中，賢劫菩薩結加趺坐，十方諸佛及諸化佛坐寶蓮花，為此賢劫諸大菩薩說〈般舟甚深三昧〉，亦讚觀佛最初因緣，惟無三昧念佛境界金剛譬定。

說是法已，是諸如來，各申右手摩阿難頂，告言：「法子！汝今應當善持佛語，慎勿忘失。」

爾時，彌勒菩薩白佛言：世尊！惟願，天尊大慈大悲，憐愍一切未來世中，多有眾生造不善業，佛不現在，何所依怙，可除罪咎？

佛告彌勒：阿逸多！諦聽！諦聽！善思念之！如來滅後，多有眾生，以不見佛，作諸惡法。如是等人，當令觀像。若觀像者，與觀我身，等無有異。

說是語時，空中有花，十方諸佛住立空中，叉手合掌，讚言：善哉！佛子！

善問此事。惟釋迦文救世苦者，為諸末後盲冥眾生說觀像法，今正是時，慎勿疑慮。

彌勒菩薩重更殷懃勸請世尊說觀像法。

爾時，世尊放常光明照尼拘樓陀精舍及十方國，皆作金色。佛神力故，令金色地，分為二分。一一分中，五百億佛，從下方界皆自踊出，住立空中，合掌讚歎彌勒菩薩摩訶薩，言：「善哉！佛子！乃能憐愍未來眾生生末法者，勸請世尊說觀像相。」

時，諸化佛說此語已，踊身虛空，作十八變。

釋迦文佛即自微笑，笑時口中生大蓮花。其花有光，如合百億日月星宿，眾宿月間百億化佛，結加趺坐，坐師子床。

爾時，釋迦文佛告彌勒菩薩言：諦聽！諦聽！善思念之！如來今者，為未來世五苦眾生、犯禁比丘、不善惡人、五逆誹謗、行十六種惡律儀者，為如是等說除罪法。

爾時，阿難白佛：世尊！佛涅槃後，此等愚人，無依無怙，無歸依處。云何如來說除罪法？

佛告阿難：汝於佛法，心未具解。如我在世，歸依我者，名歸依佛、名歸依法、名歸依僧。佛滅度後，濁惡世中，諸眾生等欲除罪咎，欲於現世得須陀洹至阿羅漢、欲發三菩提心、欲解十二因緣，當勤修習觀佛三昧。

阿難白佛言：世尊！如來在世，眾生現見。觀佛相好、觀佛光明，尚不了了，況佛滅後，佛不現在，當云何觀？

佛告阿難：佛滅度後，現前無佛，當觀佛像。觀佛像者，若比丘、比丘尼、優婆塞、優婆夷、天龍八部、一切眾生，欲觀像者，先入佛塔，以好香泥及諸瓦土，塗地令淨。隨其力能，燒香散花，供養佛像。說己過惡，禮佛懺悔。如是伏心，經一七日。復至眾中，塗掃僧地，除諸糞穢，向僧懺悔，禮眾僧足，復經七日。如是供養，心不疲厭。若出家人，應誦毘尼極令通利。若在家人，孝養父母恭敬師長，調心令軟。心若不軟，當強折伏，令心調順，如調象馬，不令失御。心柔順已，住於靖處燒眾名香，禮釋迦文而作是言：「南無大德、我大和上。應。正遍知，大悲世尊！願以慈雲覆護弟子。」作是語已，五體投地，泣淚像前，從地而起，齊整衣服，結加趺坐，繫念一處，隨前眾生繫心鼻端、繫心額上、繫心足指。如是種種隨意繫念專置一處，勿令馳散使心動搖。

心若動搖，舉舌拄腭。閉口閉目，叉手端坐，一日至七日，令身安隱。身安隱已，然後想像。

樂逆觀者：從像足指，次第仰觀。初觀足趾，繫心令專，緣佛趾指，經一七日，閉目開目，令了了見金像足趾。漸次復觀兩足趺上，令了了見。次觀鹿王躡。心既專已，次第至髻。從髻觀面，若不明了，復更懺悔，倍自苦策。以戒淨故，見佛像面，如真金鏡，了了分明。作是觀已，觀眉間毫，如頗梨珠右旋婉轉。此相現時，見佛眉眼，如天畫師之所畫作。見是事已，次觀頂光，令分明了。如是眾相，名為逆觀。

順觀像者：從頂上諸蚤文間，一一蚤文繫心諦觀，令心了了。見佛蚤文，猶如黑絲，右旋婉轉。次觀佛面，觀佛面已，具足觀身，漸下至足。如是往返凡

十四遍，諦觀一像，極令了了。觀一成已，出定入定，恒見立像在行者前。見一了了，復想二像。見二像已，次想三像。乃至想十，皆令了了。見十像已，想一室內滿中佛像，間無空缺。滿一室已，復更精進燒香散花，掃塔塗地，澡浴眾僧，為父母師長案摩調身，洗浴身體，上塗足油。四方乞食得好美者，先上師長，分奉父母。作是行已，發大誓願：「我今觀佛，以此功德，不願人、天、聲聞、緣覺，正欲專求佛菩提道。」發是願已，若實至心求大乘者，當行懺悔。行懺悔已，次行請佛。行請佛已，次行隨喜。行隨喜已，次行迴向。行迴向已，次行發願。行發願已，正身端坐，繫念在前，觀佛境界，令漸廣大。一僧坊中，滿中佛像，方身丈六，足下蓮花圓光一尋，及通身光摩尼焰相，及眾化佛化佛侍者，光明眾色，皆令了了。一僧坊已，令心復廣一頃地中滿中佛

像。此想成已，心得安隱，身體悅樂，若行若止，心想利故，見一頃地滿中佛像，香花供具及諸幢幡，皆隨像行，以心利故，左右前後，盡見像行。心漸廣大，見百頃地滿中佛像。開目閉目，皆令心想，想想不絕，心心相續，如渴思飲。此想成已，見一由旬滿中佛像，漸增廣遠，滿百由旬。見一切像，三十二相、八十隨形好，皆悉炳然。此想成已，想一閻浮提八千由旬滿中佛像。此想成已，次想東方弗婆提界八千六十由旬滿中佛像。此想成已，復想西方瞿耶尼界廣八千九百由旬滿中佛像。此想成已，復觀北方鬱單越界一萬六千由旬滿中佛像。此想成已，復更廣遠見百閻浮提滿中佛像。此想成已，見百億四天下滿中佛像。此想成已，唯除食時，除便轉時，一切時中，恒見佛像，虛空及地滿中佛像，像像相次，間無空缺。念想成已，身心歡喜，倍加精進，頂戴恭敬十

二部經。於說法者，起大師想。於佛法僧，起父母想。令心調柔，不起瞋想。設瞋恚時，當於般若波羅蜜前，五體投地，誠心懺悔。如上所說五法，次第應行。念想成已，閉目叉手，端坐正受，更作遠想，滿十方界，見一切像，身純金色，放大光明。若有犯戒作不善者，先身犯戒及以今身，見諸佛像，或黑或白。以懺悔故，漸見紅色。見紅色已，漸見金色。見金色已，身心歡喜，勸請諸像使放光明。起此想時，念想利故，見一切像舉身毛孔皆放光明，一一光明百億寶色，一一色中無量雜色，微妙境界悉自踊出，此念想成，名觀立像。

佛告阿難：如是觀者，名為正觀。若異觀者，名為邪觀。

餘相現者，別境界出，當疾除之。作是觀者，除却六十億劫生死之罪，亦名見佛，於未來世心想利故，值遇賢劫千佛世尊，為其和上。於佛法中，次第出

家。一一佛所，見佛身相，了了分明，聞佛說法，憶持不忘。於星宿劫光明佛所，現前受記。鹿心觀像，尚得如是無量功德，況復繫念觀佛眉間白毫相光！

說是語時，大梵天王無量梵眾，持諸天花奉散世尊。脫身瓔珞，以奉上佛。其花如雲，在空中住。所上瓔珞，變成金臺。於金臺中，有金色光，其光變為七佛尊像，端嚴微妙，色相悉具。

蚤髻梵王長跪合掌，勸請世尊，而作是言：如來大悲慈愍眾生，願為來世盲冥眾生，具足演說觀像相法，令諸眾生依佛所說，恒得值遇諸佛世尊，得念佛三昧。三昧力故，令諸眾生遠離罪惡。以罪滅故，現見諸佛。

佛告梵王：如是。如是，如汝所說。

爾時，世尊復為來世諸眾生故，更說觀像坐法：觀像坐者，至心繫念，令前

立像足下生花。此花生時，當起想念：「令此大地，作黃金色、作七寶色。」隨想而現，一一寶色黃金為界。一一界間，生寶蓮花。作此想時，有寶蓮花千葉具足，應想而現。既見花已，請諸想像令坐寶花。眾像坐時，大地自然出大白光，如琉璃色，白淨可愛。眾白光間，百億菩薩白如雪山，從想像身毛孔中出，一一菩薩身毛孔中，出金色光，其光如山。百千金色閻浮檀金，光明赫奕數不可知，應想而現。一一山頂，有一想像，高顯可觀，閻浮檀金色，其光大盛，照十方界皆作金色，見地及空亦作金色，滿中金像、金光、金蓋、金臺、金花、金幡。見想菩薩純白玉色，手執白拂，有執白花，當起想念極令鮮白。若餘雜想異境界現，當疾除滅。若不除滅隨逐餘想，隨他境界，喜發風病。此念佛想，是大甘露利益眾生，觀佛三昧，如服良藥，利益四大。服此藥者，不

老不死。

佛告阿難：若有眾生欲觀像坐，當如是觀。

作是觀者，名為正觀。若他觀者，名為邪觀。

若有眾生觀像坐者，除五百億劫生死之罪。未來值遇賢劫千佛，過賢劫已，星宿劫中，值遇諸佛數滿十萬。一一佛所，受持佛語，身心安隱，終不謬亂。一一世尊現前授記，過算數劫，得成為佛。

爾時，世尊告阿難言：若有眾生觀像坐已，當觀像行。

觀像行者：見十方界滿中像行，虛空及地，見一一像，從座而起。一一像起時，五百億寶花。一一花中，有無數光。一一光中，無數化佛隨心想現。坐像起立，未起中間，當動身時，眉間白毫，旋舒長短，猶如真佛放白光明，為百

千色，映飾金光。眾白光間，無數銀像身白銀色，銀光，銀花、銀蓋、銀幡、銀臺，悉皆是銀。時，眾金像與銀像俱，動身欲起，諸像臍中各生蓮花。其蓮花中，踊出無數百千化佛。一一化佛，放金色光，照行者身。是時，行者入定之時，自見己身三十六物惡露不淨。不淨現時，當疾除滅，而作是念：「三世諸佛身心清淨，我今學佛真淨法身。此不淨觀，從貪愛生。虛偽不實，用此觀為？」作是念已。當自觀身，使諸不淨，變為白玉。自見己身如白玉瓶，內外俱空。作是觀時，宜服酥藥，勿使身虛。此想成時，諸像皆起，如前立住。見像立時，當作想念，請像令行。像既行已，步步之中，足下生花成蓮花臺，見十方界滿中行像供具妓樂，諸天大眾恭敬圍遶。行像放光照諸大眾令作金色，銀像放光照諸大眾皆作銀色，白玉菩薩放白玉光令諸大眾作白玉色，雜色諸像

放雜色光映飾其間。此想成已，更起想念：「請諸行像皆令以手悉摩我頭。」爾時，諸像各申右手摩行者頭。是時，眾像放大光明，照行者身。光照身時，行者自見身黃金色。此想成已，出定歡喜。復更至心禮敬諸佛，修諸功德。以是功德，迴向菩提。

爾時，復當更起想念：「我今想見眾多金像，行坐隨意，未見神通。」起心作想，請諸行像及菩薩像作十八變。應念，即作十八種變，見滿十方一切眾像踊身空中作十八變威神自在，普現色身，令行者見。見已歡喜，請一切像令轉法輪。應念，即時一一眾像異口同音讚歎持戒、讚歎念佛。想聞此已，心大歡喜，復加精進。以精進故，心想得成，心想成時，見十方界，一切大地山河石壁，皆悉變化為金剛地。金剛地上踊出白光。眾白光間，無數化佛坐寶蓮花。

一一化佛，放無數億百千光明。一一光明，復化無數百千化佛。此想現時，行者自見身諸毛孔出金色光，遍照一切。若餘境起，當疾除滅。如此心想，疾於猛風，須臾之頃見無數化佛。行者心利，如明眼人執頗梨鏡自觀面像。行者觀像，亦復如是。

此想成已，當作是念：「諸佛世尊住大寂滅，身心清淨，無來無去。如我身者，四大五陰所共合成。如芭蕉樹，中無堅實。如水上沫、如水中月、如鏡中像、如熱時焰、如野馬行、如乾闥婆城。」作是想已，諸像尋滅。有金色光，於金光間有金佛影，如鏡中像，行住坐臥四威儀中，現一切色。

此想成時，當念如來戒身。念戒身時，見諸佛影，眉間光明，猶如白絲。空中清淨，至行者前。行者見已，當作是念：「釋迦牟尼多陀阿伽度。阿羅訶。

三藐三佛陀，過去世時以大戒身而自莊嚴。是故，今日得戒、定、慧、解脫、解脫知見。」作此念時，釋迦文佛坐琉璃窟，身紫金色端嚴微妙，與諸比丘、菩薩、大眾，以為眷屬，住行者前，告言：「法子！汝修觀佛三昧力故，我以涅槃相力示汝色身，令汝諦觀。汝今坐禪，不得多觀，汝後世人多作諸惡，但觀眉間白毫相光。作此觀時，所見境界，如上所說。」爾時，一念情無所著，心大歡喜，應時即得念佛三昧。念佛三昧者：見佛色身，了了分明。亦見佛心一切境界，亦如上來觀佛心說，亦見佛身一切光明，亦如上觀佛身光說，亦見佛身一切毛孔，一一毛孔，悉生八萬四千蓮花，一一花中復有八萬四千化佛，佛佛相次，滿十方界。

爾時，釋迦牟尼佛即申右手摩行者頂。一切化佛亦申右手摩行者頂。得此觀

者，名佛現前三昧，亦名念佛三昧，亦名觀佛色身三昧。

爾時，諸佛異口同音，各各皆為行者說法，雖未得道，見佛聞法總持不失，此名凡夫念佛三昧。得此三昧者，剎那剎那頃恒見諸佛，於念念頃聞佛說法，所謂大乘方等經典，一日一夜，即得通利。父母生身惱濁惡世，以念佛故，得聞總持，捨身他世，必得見佛，於諸佛所，得千萬億旋陀羅尼。得陀羅尼已，八十億佛各申右手摩行者頂，一一諸佛皆說決言：「汝念佛故，過星宿劫，得成為佛。身相光明，與我無異！」說是語已，八十億佛一時放光，光中復有無量化佛，一一化佛皆說是語。

佛告阿難：如是眾法，名觀像法。若觀像時，自當更有無量百千諸勝境界。

如是觀者，名為正觀。若異觀者，名為邪觀。

⑩ 念七佛品

佛告阿難：若有眾生，觀像心成，次當復觀過去七佛像。觀七佛者，當勤精進，晝夜六時，勤行六法。端坐正受，當樂少語，除讀誦經廣演法教，終不宣說無義之語，常念諸佛心心相續，乃至無有一念之間不見佛時。心專精故，不離佛日。

過去久遠，有佛世尊，名毘婆尸佛，身高顯長六十由旬。其佛圓光百二十由旬，身紫金色八萬四千相。一一相中，八萬四千好。一一好中，無數金光。一一光中，有恒沙化佛。一一化佛，有恒沙色光。一一光中，無數諸天、聲聞、比丘、菩薩大眾以為侍者。人人各持一大寶花，花上皆有百千億寶摩尼網豔。網豔相次，高百千丈，以為佛光。是時，佛身益更明顯，如百千日照紫金山。

光明豔起，化佛無數。一一化佛，猶如百億日月俱出，令行者見。毘婆尸佛偏袒右肩，出金色臂，摩行者頂，告言：「法子！汝行觀佛三昧。得念佛心故，我來證汝。汝今可觀我真色身，從一一相，次第觀之。汝當至心，立金剛誓。我等先昔行佛道時，與汝無異。」

爾時，毘婆尸佛慰行人已，即時化作大寶蓮花如須彌山。佛在花上，結加趺坐。為於行者說念佛念法，及說百億旋陀羅尼。行者見已，倍加歡喜，敬禮彼佛。彼佛告曰：「若有眾生，聞我名者、禮拜我者，除却五百億劫生死之罪。汝今見我，消除諸障，得無量億旋陀羅尼。於未來世，當得作佛。」

佛告阿難：爾時，行者見毘婆尸，心歡喜故，我與六佛現其人前。上座毘婆尸，為此法子說念佛三昧。

尸棄世尊，身長四十二由旬，身紫金色，圓光四十五由旬，通身光明一百由旬。其光網中，無數化佛，及諸菩薩、聲聞大眾、諸天眷屬，以為圍遶，隨從佛後，右旋婉轉。是時，行者見尸棄佛，復更增益無量百千陀羅尼門，復更增廣得見百千無數化佛。於未來世，過算數劫，於其中間，恒得值遇諸佛世尊，生菩薩家。

說是語時，復有無數百千天子，聞是事已，見佛色身端嚴微妙，同時皆發三菩提心。

毘舍世尊，舉身放光，住行者前，其佛身長三十二由旬，圓光四十二由旬，通身光六十二由旬，身紫金色。光明威相，如前無異。見此佛已，復更增進諸陀羅尼三昧門。於未來世，必定不疑生諸佛家。

拘留孫佛，亦放光明住行者前，其佛身長二十五由旬，圓光三十二由旬，通身光五十由旬。相好具足，如紫金山。見此佛者，常生淨國，不處胞胎。臨命終時，諸佛世尊必來迎接。

拘那含牟尼佛，放大光明，住行者前，其佛身長二十由旬，圓光三十由旬，舉身光長四十由旬，光相具足。見此佛者，即得百億諸三昧門無數陀羅尼。若出定時，常得諸佛現前三昧。如此三昧，證明行者，所以名諸佛現前三昧者。得此三昧，出定、入定、行住坐臥，恒得覩見一切諸佛，以妙色身現其人前。

迦葉世尊，放大光明住其人前，佛長十六丈，身紫金色，相好具足。見此佛者，得寂滅光無言相三昧。於未來世，恒住大空三昧海中。

釋迦牟尼佛，身長丈六，放紫金光，住行者前。

彌勒世尊，身長十六丈。

如是，諸佛各入普現色身三昧，現其人前，令其行者心得歡喜。以歡喜故，是諸化佛各申右手摩行者頂。

見七佛已，見於彌勒。見彌勒已，賢劫菩薩，一一次第，逮及樓至，各放光明住行者前。時，千菩薩各各讚歎念佛三昧，及為行者說諸菩薩性、說諸菩薩解脫、說諸菩薩慧，是名因觀像心得念佛三昧。

佛告阿難：佛滅度後，佛諸弟子，如是觀者，是名正觀。若異觀者，名為邪觀。

修此三昧者，雖具煩惱，不為煩惱之所使也。以是念佛三昧力故，十方諸佛放大光明現其人前，光明無比，三界特尊。

佛說是語已。

時，梵天王復更勸請：願佛世尊說十方佛住行者前光明色相。

⑪ 念十方佛品

佛告阿難：云何行者觀十方佛？

觀十方佛者：東方為始。東方有世界，國名寶安隱，無量億寶有億千色以用合成。佛號善德，亦放無數光普照百千國。亦與無數億分身諸化佛，住於行者前。身色如金山，端嚴甚無比，坐大金剛窟，無數雜寶光莊嚴為堂閣。一一堂閣前，無量微塵數百億諸寶樹。一一寶樹下，八萬四千師子座。一一師子座，有一分身佛，結加趺坐三昧，坐於寶樹下。善德佛世尊，身長二百五十億那由他由旬。一身毛孔，無數億微塵一切勝相好。一一相好中，有無數化佛。一

一化佛，高顯巍巍，如須彌山，放大光明，坐寶蓮花，住虛空中。分身諸佛各各開現微妙光明，顯出無數百千化佛。一一化佛，坐寶蓮花。一一蓮花，有千幢幡。一一幢幡，演出百億微妙音聲。是諸聲中，教觀十方無數佛身。此相現時，見十方界，猶如金剛，百億寶色不滅不壞。見此相已，於諸佛前受法王子位。如是境界，名性地菩薩。

南方栴檀德佛，身相高顯。其佛國土，琉璃為地，恒沙寶色。於佛光中，亦有無數百千堂閣。寶樹行列，敷師子座，座上諸佛，結加趺坐。寶幢幡蓋說法音聲，如佛海三昧說。

西方無量明佛，國土清淨，黃金為地，五百億寶色。佛身光明，重閣講堂，寶樹行列，寶師子座，分身諸佛結加趺坐坐寶樹下。寶幢幡中，亦說念佛海。

北方相德佛，其地頗梨色，有五百億寶光，寶樹行列，寶師子座，重閣講堂，幢幡光明，與向無異。

東南方無憂德佛，其地七寶色，一一色上有七百億雜色，寶樹行列，重閣光明，百億萬種。一一光明，說佛功德海，如佛海說。

西南方寶施佛，其地五寶色，一一寶上五百億光明。一一光明，化為五百億蓮花雲。一一蓮花雲上，有百億重閣。一一重閣，如百千萬億梵王宮。一一梵王宮中，無數床座，光明蓮花所共合成。是諸座上，有諸分身佛結加趺坐，演說諸佛大慈悲法。光明幢幡，亦說佛海。

西北方花德佛，其佛國土琉璃頗梨色。一一色上，有無數百千光。一一光，化為五百億寶窟。一一窟中，無數寶蓋。一一蓋中，百億光明。一一光中，無

數分身佛，結加趺坐，放大光明。其光明中，說念佛三昧。因念佛三昧中，復更得見無數諸佛。

東北方三乘行佛，其佛國土，純白銀色，百億萬光，光有千色，莊嚴國界極令清淨。分身化佛，寶樹幢幡，行列莊嚴，數不可知。

上方廣眾德佛，其地五百億寶色。一一寶色，無數光明。一一光明，化為無數百億化佛。一一佛光中，無量寶樹行列莊嚴；一一樹下百億寶師子座。諸佛在上結加趺坐，無數菩薩以為侍者。一切大眾，皆悉住佛光明雲中。

下方明德佛，其地金色、金光、金雲。於光雲中，無數金堂七寶樓閣，百寶行樹羅列莊嚴。寶幢幡蓋，數億千萬。一一樹下，百億寶座諸堂樓閣，無數坐具，狀如寶花，無數分身一切諸佛，坐寶樹下，琉璃座上，眾花色間，無數佛

會。是諸世尊，皆悉講說菩薩行法。如是十方無數化佛，一一化佛顯現光明。

時，十方佛各各悉坐金剛窟中。身量光明，如善德佛及諸化佛。威神國土，令行者見，如於明鏡，自見面像，了了分明。見十方佛，心歡喜故，不染諸法住於初心。

時，十方佛廣為行者各說相似六波羅蜜，聞是法已，於初地下十心境界，無有疑慮。見此事者，必聞諸佛說般若波羅蜜，聞第一義空，心不驚疑，於諸法中，得入空三昧。是名相似空相三昧。

佛告阿難：佛滅度後，佛諸弟子欲觀十方佛者，於念佛三昧中，但知麤相，當自然知無量妙相。

如是觀者，是名正觀。若異觀者，名為邪觀。

得此觀者，見佛無數，不可限量。入此定者，名見一切諸佛色身，亦得漸漸入三空門。遊此空者，諸佛力故，心不著空，於未來世當成阿耨多羅三藐三菩提，得不退轉。是名不忘菩提之心正順佛道。

說觀十方佛時，十方佛坐金剛山百寶窟中，各申右手摩阿難頂，告言：「法子！汝持佛語，為未來世諸眾生等，當廣宣說，慎勿妄傳，當為堅發三菩提心行念佛定正受者說。」

佛告阿難：此念佛三昧若成就者，有五因緣。

何等為五？一者、持戒不犯。二者、不起邪見。三者、不生憍慢。四者、不恚不嫉。五者、勇猛精進如救頭然。行此五事，正念諸佛微妙色身令心不退，亦當讀誦大乘經典。以此功德念佛力故，疾疾得見無量諸佛。

見諸佛者，獨一心淨，不與他共，應當供養十方諸佛。

云何供養？是人出定、入塔見像、念持經時，若禮一佛，當作是念：「正遍知諸佛心智無有限礙。我今禮一佛，即禮一切佛。若思惟一佛，即見一切佛。見一一佛前有一行者，接足為禮，皆是己身。」

若以一花供養佛時，當作是念：「諸佛法身，功德無量，不住不壞，湛然常安，我今以花奉獻諸佛，願佛受之。」作是念已，復當起想：「我所執花，從草木生，持此供養，可用擬想。」即當作想身諸毛孔，令一毛孔出無數花雲，以此花雲，運想擬意供一切佛。一一佛上，化成花臺，諸佛受之，於十方界，施作佛事。

供養香時，亦復如是。香烟香雲，於十方界，施作佛事。作佛事已，還成金

臺在行者前。若凡夫人欲供養者，手擎香爐，執花供養，亦當起意作花香想，當發是願：「願此花香滿十方界，供養一切佛、化佛，并菩薩、無數聲聞眾，受此香花雲，以為光明臺，廣於無邊界，無邊作佛事。」禮佛若坐禪起，是供養心，常當發是願。

繪蓋、幢幡、音樂、偈頌，當作是願：「我今設此少分供具，願此供具，遍供十方一切諸佛，諸佛受之，於幢幡中化光明雲。於伎樂中、偈頌之中，演妙法音。」作是願已，坐時應想，令身毛孔一一孔中作無量幢幡想。一一幢幡中作無量偈頌雲想。作是想時，心如香爐，流出金色香烟香雲。身毛孔中，如好花樹，踊出阿僧祇無量雜花雲。是諸花雲，於十方界諸佛之上，化為一切諸供養具。爾時，當於身心分中，起一切供養具想。若得食飲、若施人一錢，當起

空、無我想，檀波羅蜜。如是等無量供養，皆當起心，從心想出，供養十方一切諸佛。是名坐時無量功德從心想海生。

如是坐時，入深禪定無量境界諸三昧海。但於心中，出息、入息、念念想想相續不絕。於一心中，運其心意，作無數供具雲。上供諸佛，下施一切，作是念者，名學普施。此想成時，漸漸減消諸煩惱結。觀法無相，無相力故，當得甚深六波羅蜜。

⑫ 觀佛密行品

佛告阿難：未來眾生，其有得是念佛三昧者、觀諸佛相好者、得諸佛現前三昧者，當教是人，密身口意，莫起邪命、莫生貢高。若起邪命及貢高法，當知此人是增上慢，破滅佛法，多使眾生起不善心，亂和合僧，顯異惑眾，是惡魔

伴。如是惡人，雖復念佛，失甘露味。此人生處，以貢高故，身恒卑小，生下賤家，貧窮諸衰，無量惡業以為嚴飾。如此種種眾多惡事，當自防護，令永不生。若起如是邪命業者，此邪命業猶如狂象壞蓮花池。此邪命業，亦復如是壞敗善根。

佛告阿難：有念佛者，當自防護，勿令放逸。念佛三昧人，若不防護，生貢高者，邪命惡風，吹憍慢火，燒滅善法。善法者：所謂一切無量禪定。諸念佛法，從諸心想生，是名功德藏。

佛告阿難：譬如長者多財饒寶，唯有一子。長者自知將死不久，以諸庫藏，委付其子。其子得已，隨意遊戲。忽於一時，值有王難，無量眾賊從四面來，競取藏物，不能遮護。唯有一金，乃是閻浮檀那紫金，重十六兩，金挺長短亦

十六寸。此金一兩，價直餘寶百千萬兩。為賊所逼，無奈金何，即以穢物纏裹真金，置泥團中。眾賊見已，不識是金，脚踐而去。賊去之後，財主得金，心大歡喜。念佛三昧，亦復如是，當密藏之。

復次，阿難！譬如有人，貧窮薄福，依諸豪賢以存性命。時，有王子遇行出遊，執大寶瓶。於寶瓶內，藏王印綬。是時，貧者詐來親附，得王寶瓶，擎持逃走。王子覺已，遣六大兵乘六黑象，手執利劍，疾往追之。時，持瓶人走入深草空野澤中，見曠野澤，滿中毒蛇，四面吐毒吸持瓶者。時，貧窮人惴惶驚怖，馳走東西，蛇亦隨之，無藏避處。於空澤中見一大樹，蒼蔚扶疏，甚適其意，頭戴寶瓶，攀樹而上。既上樹已，六兵乘象駛疾如風，尋復來至。貧人見已，吞王寶印，持瓶冠頭，以手覆面，坐貪惜故，不忍見之。時，六黑象以鼻

絞樹，令樹倒蹙。貧人落地，身體散壞，唯金印在。寶瓶現光，諸蛇見光，四散馳走。

佛告阿難：住念佛者，心印不壞，亦復如是！

復次，阿難！譬如長者，多饒財寶，無諸子息，唯有一女。是時，長者年過百歲，自知朽邁將死不久：「我此財寶，無男兒故，財應屬王。」作是思惟，喚其女子，密告之言：「今有妙寶，寶中上者，當用遺汝，汝得此寶，密藏令堅，莫令王知。」女受父敕，持摩尼珠及諸珍寶，藏之糞穢。室家大小皆亦不知。值世飢饉，女夫告妻：「我家貧窮，困於衣食，汝可他行，求自活處。」妻白夫言：「我父長者臨命終時，以寶賜我，今在某處，君可取之。」時，夫掘取，大獲珍寶并如意珠。持如意珠，燒香禮拜，先發願言：「為我雨食」。

隨語，即雨百味飲食。如是，種種隨意得寶。時，夫得已，告其妻言：「卿如天女，能賜我寶。汝藏此寶，我尚不知，況復他人！」

佛告阿難：念佛三昧，堅心不動，亦復如是！

復次阿難！譬如有王，暴虐違道，民罹其毒，人怨神怒，國大亢旱，求請神祇，不能得雨。有臣白言：「大王！當知：今此境內林藪之中，有一仙士，五通無礙，王可祈請，令其呪龍。」大王聞已，欣踊無量，遣人詣林祈請仙人。神仙飛往大王殿前，高聲唱言：「大王無道，諸天龍神皆四散去，不護王國，云何使我令請雨也？」王聞此語，極懷慚愧，改悔先行所作惡事。仙人知王心已軟善，應念誦呪，神通力故，天降甘露，地出湧泉潤澤一切。

佛告阿難：欲念佛者，如王棄惡。得念佛者，如善呪人。

復次，阿難！譬如力士，自恃大力，數犯王法。王遣五人收捕力士，幽閉囹圄。五處枷鎖極令牢固，奮力大怒，舉體血現，枷鎖摧折，踰牆逃逝，到海岸邊，解髻明珠，持雇船師，船師語言：「如此白石，海中無數，我用是為？」力士長跪，白船師言：「我此明珠，有六種色。」即以黃繒裹珠，置之水中，水即金色。復還收珠以白繒裹，置之水中，水即變白。收取復以綠繒裹，置之水中，水色變作綠琉璃色。收取以碧繒裹，置之水中，水即變作真金精色。收取復以絳繒裹，置之水中，水即變作車渠色。收取復以紫繒裹，置之水中，水即變成天金剛色。水上復有紫摩尼光。船師見已，即取寶珠，以大寶輿，輿勇猛士，置大船上，望風舉帆，疾如射箭，到於彼岸。到彼岸已，心意泰然，安隱無懼，大取珍寶，報船師恩。

佛告阿難：行念佛者，如大力士，拋心王枷鎖，到慧彼岸。

復次，阿難！譬如劫欲盡時。二日竝出，山林樹木河池枯涸。三日出時，眾色火起。四日出時，大海消滅，三分留一。五日出時，大海竭盡。六日出時，須彌崩倒。七日出時，大地炯然乃至色界，唯金剛山不可摧破還住本際。念佛三昧，亦復如是。行是定者，住過去佛實際海中。

佛告阿難：吾今欲與十方諸佛報念佛三昧恩。

爾時，世尊說是語已，及十方諸佛賢劫菩薩，入一切色身光明三昧。

時，諸佛身一一毛孔，踊出眾多不可稱數妙化佛雲。是諸化佛，結加趺坐，住立空中。如是無數一切化佛，各申右手摩阿難頂，及敕釋提桓因：「汝等二人！持是妙法，慎莫忘失，為未來世濁惡眾生滅眾罪障故。如來正遍知，今於

大眾中，說一切佛身相。

爾時，尊者阿難即從座起，頂禮佛足，白佛言：世尊！當何名此經？此法之要，當云何持？

佛告阿難：此經，名《繫想不動》，如是受持。亦名《觀佛白毫相》，如是受持。亦名《逆順觀如來身分》，亦名《一一毛孔分別如來身分》，亦名《觀三十二相八十隨形好諸智慧光明》，亦名《觀佛三昧海》，亦名《念佛三昧門》，亦名《諸佛妙花莊嚴色身》，亦名《說戒定慧解脫解脫知見十力四無所畏十八不共法果報所得微妙色身經》。汝好受持，慎勿忘失。

佛說是語時，比丘、比丘尼、優婆塞、優婆夷，及菩薩大眾、天龍八部、一切鬼神，聞佛說是微妙身相，有得須陀洹、斯陀含、阿那含、有得阿羅漢者，

有種辟支佛道因緣者，有發阿耨多羅三藐三菩提心者，有得無生法忍者，數甚眾多，不可稱說。

時，諸大眾聞佛說法，恭敬頂禮，奉行佛語，作禮求退。

是時，阿難即從座起，合掌長跪，白言：世尊！如來今者，一切身相皆已說竟，唯不顯說無見頂相。唯願，天尊！少說頂相光明瑞應，令未來世凡愚眾生知佛勝相。

爾時，世尊即入頂三昧海，令佛頂上肉髻之中一一毛孔踊出琉璃光。其光如水蠶文右旋，遍滿十方無數世界，如百億世界微塵數海，如是八萬四千諸毛髮中，皆出是水相。一一水相，復過是百千萬倍，數不可知。是諸琉璃水上，生眾多天寶蓮花，花有無數百千億葉，葉作無數百千億寶色。葉極小者，遍覆三

千大千世界。如是花上，一一鬚間有無量阿僧祇百千萬億恒河沙化佛。一一化佛，頂肉髻相，流出眾光亦復如是。

時，諸佛身量同虛空，不可得知。如是諸佛，佛佛相次，盡世界海際。

此相現時，於十方面，各有百億微塵數菩薩，身昇虛空，現大神變，至釋迦牟尼佛所。

時，諸菩薩以佛神力故，暫見一毛孔中少分瑞相，應時即得無量百千金剛相陀羅尼。

佛現是相時，賢劫千菩薩及十方諸佛皆現此相。

時會大眾見此少分相者，須陀洹人，如剎那頃成阿羅漢。觀因緣者，不緣諸緣，成阿羅漢。發心菩薩，超越境界，增進甚深三昧海門，住於性地。無生菩

薩，倍加增進無量勝法，住首楞嚴三昧。

佛告阿難：佛滅度後濁惡世中，若有眾生聞佛勝相，心不驚疑，不生怖畏。當知：是人能滅一切煩惱業障。聞佛勝相，生隨喜者，除却千億劫極重惡業，後世生處，不落三塗，不生八難處。

佛說是語時。

長老憍陳如等諸大比丘，彌勒等諸大菩薩、無量大眾聞佛所說，皆大歡喜，頂戴奉行。

佛說觀佛三昧海經

受持及讀誦 讚歎並宣說 福慧俱增長 災障悉消除 現眷咸安康 先親得超昇 見聞與隨喜 皆共成佛道



妙法寺 香港新界屯門藍地 <https://www.mfbm.hk>